

學海君道部卷之十三

茅綯編

世系類

三十

閏位世次

序曰仲尼有言化合神者稱皇德合天者稱帝德合仁義者稱王
斯並穹皇有命歷數在躬大庇生民奄宅區宇者也其或真人未
應中夏多難本非靈心之所眷漸爲人望之攸屬或紹承於大統
或專據於一隅雖復置宗祏改正朔建國以治嚮明以朝然與受
河洛之符應龍鳥之紀者殊矣故載籍譬之閏餘明其非正焉自
赤符之末三國鼎峙典午之後南北派分逮唐之李五代迭興洎
宋之隆遼金擅命固非四海之大君寔亦一方之共主其於族之
本系年之脩促號謚之稱傳襲之數咸用討於史牘類例比次蓋

有條而不紊披文而可觀也

冊府元龜閏位部舊序刪改

三國篇

卮言曰陳壽撰三國志以魏爲紀而稱漢吳曰傳又改漢曰蜀先儒皆議其失然名爲三國未大失也朱子綱目旣以漢承正統矣故不系之此篇

魏世章

太祖武皇帝姓曹氏名操沛國譙人漢相國參之後

王沈魏書曰其先出於黃帝當高陽世陸終之子曰安是爲曹姓周武王克殷存先世之後封曹奭於邾春秋之世與於盟會逮至戰國爲楚所滅子孫分流或家於沛漢高祖之起曹參以功封平陽侯世襲爵土絕而復紹至今適嗣國於容城

祖騰桓帝世爲中常侍大長秋封費亭侯

司馬彪續漢書曰騰父節字元偉素以仁厚稱鄰人有豕者與節豕相類詣門認之節不與爭後所豕自還其家豕主人大慙送所認豕并辭謝節節笑而受之由是鄉黨貴歎焉長子伯興次子仲興次子叔興騰字季興少除黃門後官永寧元年鄧太后詔黃門令選中黃門從官年少溫謹者配皇太子書騰應其選太子特親受騰飲食賞賜與衆有異順帝卽位爲小黃門遷至中常侍大長秋在省闈三十餘年歷事四帝未嘗有過好進達賢能終無所毀傷其所稱薦若陳留虞放邊韶南陽延固張溫弘農張奐潁川堂谿典等皆致位公卿而不伐其善蜀郡太守因計吏修敬於騰益州刺史科高於函谷關搜得其牋上太守并奏騰內臣外交

所不當爲請免官治罪帝曰朕自外外來騰書不出非其罪也乃寢焉奏騰不以介意常稱難高以爲高得事上之節高後爲司徒語人曰今日爲公乃曹常侍恩也騰之行事皆此類也桓帝卽位以騰先帝舊臣忠孝彰著封費亭侯加位侍進太和三年追尊騰曰高皇帝

父嵩騰養子騰卒嵩嗣官至大尉

魏志曰騰養子嵩官至太尉莫能審其生出本末

續漢書曰嵩字巨高質性敦慎所在忠孝爲司隸校尉靈帝擢拜大司農大鴻臚代崔烈爲太尉黃初元年追尊嵩曰太皇帝吳人作曹瞞傳及郭頒世語並云嵩夏侯氏之子夏侯惇之叔父太祖於惇爲從父兄弟

其說之曰陳壽三國志高簡有法如不言曹操本生而載夏侯氏及淵於諸曹傳中則見高本夏侯氏之子也

謝氏曰曹瞞以奸雄篡漢古今稱爲曹魏而不攷其實夏侯氏之子爲中常侍曹騰養子之孫也騰自安帝時與蔡倫等並爲黃門義養夏侯氏之兒爲其假子冒曹姓名高後與十九侯孫程等五侯左悺等俱進中常侍勢傾朝野悉廢其養子爲郎父兄弟虺蛇布滿於朝廷姻戚宗親豺虎爭獍於郡邑生殺任情與奪恣志劉陶所謂手握王侯口銜天憲三公如唐珍張顥乃唐衡張奉之母弟酷吏如王吉王萌乃王甫之假子也其餘不可殫述曹嵩襲騰費侯爵費侯於靈帝中平四年代崔烈爲太尉富貴鉅億及操與袁術構兵遣太守應劭迎嵩而陶謙士卒利其財寶邀嵩截殺

操止讐謙可也顧遷怒坑徐民百萬墟邑無復行人何其慘耶曹
不宜復祖姓而仍冒曹氏者以曹自騰奕世貴顯而夏侯無聞人
且欲隱宦蔭以欺後世也然夏侯惇淵之後恩寵無異宗親是作
僞心勞欲蓋彌彰矣嗚呼漢末亂亾之禍肇於宦寺而曹操以常
侍之養孫馴致潛移漢鼎唐末滅亾之酷發於宦寺而劉季尉述
以中尉之權明以社稷輸之於朱溫漢主庇護羣閹過於父兄靈
帝至呼張讓爲我父趙忠爲我母唐主畏懼羣宦甚於虎狼文宗
自比赧獻宣宗自謂畏之昭宗被數十罪虐焰熏天則漢唐一律
也易曰履霜堅冰至噫爲國家者防微杜漸可不慎哉

武帝以中平元年甲子起兵討黃巾己巳冬從袁紹起兵討董卓壬
申據兗州自稱刺史丙子入朝遷帝於許自爲大將軍封武平侯癸
丑封魏公丙申進爵爲王庚子正月薨文帝初追尊謚

卮言曰通鑑云操少機警有權數而任俠放蕩不治行業時人未
之奇也惟橋玄及何顛異焉後舉孝廉爲郎及平賊遷濟南相操
乘時之亂卒以篡漢夫操至猾也至亾行也當時月旦嚴矣而操
以孝廉得舉知名之士亦從而異之故細行不足以觀人而虛名
亦可以欺世古之篡國者王莽而後有操其初皆有名譽天下惑
之至於篡逆而後知也然莽以身敗世殞而操數世居尊後亦不
絕豈天賦姦雄之才以成事業而世德名行固不必論歟

文皇帝丕武帝太子庚子正月嗣魏王位十一月篡漢稱皇帝丙午

五月殂在位七年

自庚子十一月
至丙午五月

明皇帝叡文帝太子在位十三年

自丙午五月
至己未正月

前廢帝齊王芳明帝無子養芳及秦王詢宮省事祕莫有知其所由
來者或云任城王楷之子初立為齊王後立為太子在位十四年為司馬師所

廢自巳未正月至甲戌九月

後廢帝高貴鄉公髦文帝孫東海定王霖子司馬師迎立之在位六

年為司馬昭所弒自甲戌十月至庚辰五月

陳留王奐武帝孫燕王宇子司馬昭迎立之在位六年滅於晉自庚辰六月

月盡至乙酉十二月

右魏五帝三世稱帝共四十六年始庚子終乙酉

吳世章

始祖武烈皇帝姓孫氏名堅吳郡富春人蓋孫武之後也

吳書曰堅世事吳家於壽春

路史曰孫氏其先出於衛康叔

武烈以漢靈帝中平四年丁卯冬以吳郡司馬討賊功封烏程侯初

平三年為黃祖所殺權稱帝追尊謚

志林曰堅有五子

吳錄曰尊堅廟曰始祖志林曰堅有五子策權翊臣吳氏所生少子朗庶生也

長沙桓王策以建安戊寅曹操表為討逆將軍封吳侯權稱帝追封

謚

大皇帝名權母曰吳氏以建安庚辰二月代策統眾曹操表為討虜

將軍戊子冬破操赤壁辛卯徙建鄴魏黃初二年辛丑封吳王壬寅

改元黃武己酉四月稱皇帝壬申四月卒在位三十一年起壬寅至壬申稱帝

二十四年

廢帝亮大帝少子母曰潘氏在位六年為孫綝所廢自壬申四月至戊寅七月

景皇帝休大帝第六子母曰王氏是為敬懷皇后孫綝迎立之在位七年自

寅九月至甲申七月

後主皓大帝孫故太子和子母曰何氏是為昭獻皇后在位十六年降晉為

歸命侯自甲申八月終庚子三月

右吳四主凡三世共五十九年始壬寅終庚子綱帝五十二年起己酉

南朝篇

南北朝總論

卮言曰東晉之後南北並帝不能相一宋齊梁陳君臨江左為南朝北魏齊周奄有中原為北朝南書謂北為索虜北書指南為島夷唐初李延壽勘究羣書起魏登國元年盡隋義寧二年凡三代二百四十四年兼自東魏天平元年盡齊隆化二年又四十四年

共紀傳百卷謂之北史又起宋永初元年盡陳禎明三年四代一百七十年為紀傳八十卷謂之南史司馬光稱其書可亞陳壽然北朝之隋猶南朝之東晉也東晉繼統隋能混一故各系帝王之篇不在閏位之數

宋世章

高祖武皇帝姓劉氏名裕彭城人

宋書曰高祖姓劉氏彭城縣綬里人南史曰綬與里人漢楚元王交之二

十一世孫也彭城楚都故苗裔家焉交生紅懿侯富富生宗正辟

疆辟疆生陽城繆侯德德生陽城節侯安民生陽釐侯慶忌

慶忌生陽城肅侯岑岑生宗正平平生東武城令某某生東萊太

守景景生明經洽洽生博士弘弘生瑯琊都尉悝悝生魏定襄太

守史失名也某生邪城令亮亮生晉北平太守膺膺生相國椽熙熙生

開封令旭旭生混始過江居晉陵郡丹徒縣之京口里官至武原

令混生東安太守靖靖生郡功曹翹翹生武帝母曰趙氏是為孝穆皇后

武帝以晉元興甲辰起兵討桓玄誅之戊申自為錄尚書事戊午六

月封宋公己未六月進爵為王庚申四月篡晉稱皇帝壬戌正月殂

在位三年

庾言曰宋書云裕父翹僑居京裕生而母死家貧將棄之同郡劉

懷慎之母乳之及長勇健有大志僅識文字以賣屨為業好樗蒲

為鄉閭所賤是亦曹操之儔而文學不及也初為冠軍將軍孫無

終司馬安帝隆安己亥孫恩之亂劉牢之討之引裕為參軍破賊

有功遷下邳太守癸卯十一月桓玄篡位甲辰二月裕起兵討玄

玄伏誅裕奉安帝還建康乙巳裕自為都督中外諸軍事出鎮

口戊申自為揚州刺史錄尚書事卒篡晉而為宋裕雖世家之子

然落魄無行甚於曹操而成大事豈天所以報曹氏歟何其興之

暴也

少帝義符武帝長子母曰張夫人在位二年為徐羨之等所廢尋弒

自壬戌五月至甲子七月

太祖文皇帝義隆武帝第三子母胡婕妤初封宜都王徐羨之等既

廢少帝迎立之在位三十年為劭所弒自甲子八月至癸巳二月

世祖孝武皇帝駿文帝第三子母潞淑媛初封武陵王元凶弒逆帝

入討賊嗣位在位十一年自癸巳四月至甲辰五月

前廢帝子業孝武帝長子母王氏是為文穆皇后在位一年為湘東王或所

自甲辰五月至
乙巳十一月

太宗明皇帝或文帝十一子母沈婕妤弑廢帝而自立在位八年乙

巳十一月至
壬子四月

後廢帝昱明帝太子母陳貴妃在位四年為蕭道成所弑自壬子四

月七

南史曰明帝以妾與嬖倖李道兒有孕取歸生子是為昱

宋書曰世祖常使尉司採訪民間子女得陳氏迎入宮在路太后
房內不見幸太后因言於上以賜太宗有寵而衰以乞李道兒尋
又迎還生廢帝故民中皆呼廢帝為李氏子廢帝後每自稱李將
軍或自謂李統

順皇帝准明帝第三子母陳昭華初封安成王蕭道成立之在位三

年滅

宋書曰明帝晚年痿疾不能內御諸弟姬人有懷及輒取以入
宮及生男則與六宮所愛者養之而殺其母順帝即村切王休範
之子也母不知何氏而以陳昭華為母焉

右宋八帝五世共六十年起庚申終己未

南史紀曰宋武帝於嵩高山得玉壁三十二枚云此是宋十世之
數三十二者二三十也宋自受命至禪齊凡六十年符應若是

齊世章

太祖高皇帝姓蕭氏名道成蘭陵人

南史曰漢相國何二十四世孫何子鄴定侯延生侍中彪彪生公
府椽章章生皓皓生仰仰生御史大夫望之望之生光祿大夫育

育生御史中丞紹紹生光祿勳閔生濟陰太守闡闡生吳郡太守永生中山相苞苞生博士周周生蛇丘長矯矯生州從事逵逵生孝廉休休生廣陵郡丞豹豹生太中大夫裔裔生淮陰令整整生卽丘令雋雋生輔國參軍樂子宋昇明中贈太常樂子生右軍承之初何居沛何孫彪免官居東海蘭陵縣中都鄉中都里晉元康元年分東海郡爲蘭陵郡中朝喪亂淮陰令整過江居晉陵武進縣之東城里寓居江左者皆僑置本土加以南名於是爲南蘭陵人據齊梁紀錄並云出自蕭何又編御史大夫望之以爲先祖之次案何及望之於漢俱爲勳德而望之本傳不有此陳齊典所書便乖實錄近顏師古博考經籍注解漢書已正其非今隨而改削云父承之

宋書本紀曰皇考諱承之字嗣伯少有大志才力過人宗人丹陽尹摹之北兗州刺史源之並見知重初爲建威府參軍義熙中蜀賊譙縱初平皇考遷揚武將軍安固文山二郡太守善於綏撫元嘉初徙爲威烈將軍濟南太守七年右將軍到彥之北伐大敗虜乘勝破青部諸郡國別帥安平公乙旃眷寇濟南皇考率數百人拒戰退之虜衆大集皇考使偃兵開城門衆諫曰賊衆我寡何輕敵之甚皇考曰今日懸守窮城事已危急若復示弱必爲所屠惟當見疆待之耳虜疑有伏兵遂引去青州刺史蕭思話欲委鎮係險皇考固諫不從思話失據潰走明年征南大將軍檀道濟於壽張轉戰班師滑臺陷沒兗州刺史竺靈秀抵罪宋文帝以皇考有全城之功手書與都督長沙王義欣曰諱理民直亦不在武幹後

今擬爲兗州刺史檀征南詳之皇考與道濟無素故事遂寢遷輔國鎮北中兵參軍員外郎十年蕭思話爲梁州刺史皇考爲其橫野府司馬漢中太守氏帥楊難當寇漢川梁州刺史甄法護棄城走思話至襄陽不進皇考輕軍前行攻氏僞魏興太守薛健於黃金山尅之黃金山張魯舊戍南接漢川北枕驛道險固之極健旣潰散皇考卽據之氏僞梁秦二州刺史趙溫先據州城聞皇考至退據小城薛健退屯下桃城立柴營皇考引軍與對壘相去二里健與僞馮翊太守蒲罕子悉力出戰皇考大破之健等閉營自守不敢出思話繼至賊乃稍退皇考進至俄公山爲左衛將軍沙州刺史呂平大衆所圍積日建武將軍蕭汪之平西督護段 等至表裏奮擊大破之難當又遣息和領步騎萬餘人夾漢水兩岸援

趙溫攻逼皇考相拒四十餘日賊皆衣犀甲刀箭不能傷皇考命軍中斷槊長數尺以大斧槌其後賊不能當乃焚營退皇考追至南城衆軍自後而進連戰皆捷梁州平詔曰諱稟命先驅蒙險深入全軍屢尅奮其忠果可能驥將軍隨府轉寧朔司馬太守如故入爲太子屯騎校尉文帝以平氏之勞青州缺將欲授用彭城王義康秉政皇考不附乃轉爲江夏王司徒中兵參軍龍驤將軍南泰山太守封晉興縣五等男邑三百四十戶遷右軍將軍元嘉二十四年殂年六十四梁土民思之於峨公山立廟祭祀昇明二年贈散騎常侍金紫光祿大夫承之生三子長曰道度仕宋至安定太守卒封衡陽元次曰道生字孝伯宋世爲奉朝請卒追封始安貞王高帝其季也母曰陳氏高帝初隨父以軍功至兗州刺史泰始三年丁未鎮淮陰辛亥入爲

散騎常侍甲寅為領軍丁巳七月立順帝自為司空錄尚書事己未

三月封齊公尋進爵為王四月篡宋稱皇帝壬戌三月殂在位四年

世祖武皇帝贖高帝長子母劉氏是為高昭皇后在位十一年自壬戌三月至癸酉七月

文惠太子長懋武帝長子蚤卒

前廢帝鬱林王昭業武帝孫文惠太子長子母王氏是為文安皇后以太孫

嗣位一年為鸞所弑自癸酉七月至甲戌七月

中廢帝海陵王昭文文惠太子第二子母許官人初封新安王鸞立

之在位三月自七月至十月鸞廢為海陵王尋弑之

高宗明皇帝鸞高帝次兄始安貞王道生之子累封宣城王弑帝昭

文而自立在位五年自甲戌十月至戊寅七月

後廢帝東昏侯寶卷明帝第二子母劉氏是為明敬皇后在位三年自戊寅七月至

辛巳蕭衍廢為涪陵王齊人弑之衍入建康追廢為東昏侯

和帝寶融明帝第八子東昏母弟也累封南康王出為荊州刺史東

昏之亂梁王蕭衍舉兵立之於江陵在位二年禪於梁自辛巳三月至壬午三月

右齊六帝凡三世共二十四年始己未終壬午

梁世章

高祖武皇帝姓蕭氏與齊同祖名衍

梁史曰與齊同承淮陰令整整生濟陰太守轄轄生州治中從事

副子副子生南臺治書南史曰治書侍御史道賜道賜生丹陽尹順之齊高

帝族弟也

父順之

南史紀曰皇考順之字文緯於齊高帝為始族弟皇考外甚清和

而內懷英氣與齊高少而欵狎嘗共登金牛山路側有枯骨縱橫
齊高謂皇考曰周文王以來幾年當復有掩此枯骨者乎言之慄
然動色皇考由此知齊高有大志嘗相隨逐齊高每外討皇考常
爲軍副及北討薛索兒夜遣人入營提刀徑至齊高眠床皇考手
刃之頻爲齊高鎮軍司馬長史時宋帝昏虐齊高謀出外皇考以
爲一旦奔亡則危幾不測不若因人之欲行伊霍之事齊高深然
之歷黃門郎安西長史吳郡內史所經皆著名吳郡張緒常欄文
武兼資有德有行吾敬蕭順之袁粲之據石頭黃回與之通謀皇
考聞難作率家兵據朱雀橋回覘人還告回曰朱雀橋南一長者
英威毅然坐胡床南向回曰蕭順之也遂不敢出時徵皇考石頭
幾不據矣及齊高創造皇業捷鋒決勝莫不垂拱仰成焉齊建元

末齊高從容謂皇考曰當令阿玉解揚州相授玉豫章王疑小名
也齊武帝在東宮皇考常問訊及退齊武指皇考謂疑曰非此翁
吾徒無以致今日及卽位深相忌憚故不居台輔以參豫佐命封
臨湘縣侯歷位侍中衛尉太子詹事領軍將軍丹陽尹贈鎮北將
軍謚曰懿帝皇考長子也皇妣張氏嘗夢抱日已而有娠遂生帝
又魚復侯傳曰魚復侯子響武帝子也鎮荊州不法長史劉寅等
密啟於上上敕精檢子響召寅等殺之上怒遣胡諧之領兵檢捕
羣小敕子響歸朝子響率衆拒敵上又遣丹陽尹蕭順之領兵繼
至子響乃白服降初順之將發文惠太子素忌子響密遣不許還
令便爲之所子響及見順之欲自申明順之不許於射堂縊之子
響密作啟藏妃衣中具自申明云輕舫還闕不得此苦之深及順

之還上心甚怪恨百日爲子響作齋及見順之嗚咽移時順之慙懼感病遂以憂卒

武帝起巴陵法曹參軍入爲右軍將軍永泰戊寅出爲雍州刺史永元庚辰十一月起兵襄陽辛巳十一月入建康壬午二月封梁公尋進爵爲王四月篡齊稱皇帝巳巳五月殂在位四十八年

庖言曰梁紀云衍生而奇異及長博學多通好籌略有文武才幹起家巴陵王南中王行參軍王儉一見深相器異請爲戶曹竟陵王子良招文學衍與沈約等爲八友是衍有文武才非如劉裕比也而又與齊同族乘齊之亂而取之視宋齊有間矣

昭明太子統武帝長子立爲太子早卒

太宗簡文皇帝綱武帝第三子昭明太子母弟也母丁貴嬪在位二

年爲疾景所弒

自巳巳三月至辛未十月

豫章王棟武帝昭明長子豫章王歡之子侯景廢簡文帝而立之尋廢之而篡其位

世祖元皇帝繹武帝第七子母阮修容初封湘東王簡文被弒王僧辨等勸進乃稱帝於江陵在位三年爲西魏所滅遇害

起壬申十一月至甲戌十一月

二月

貞陽侯淵明武帝兄長沙王之子封貞陽侯爲豫州刺史丁卯秋督諸將侵東魏兵敗被獲及元帝滅乙亥二月齊人以兵納於梁王僧辨遂迎立之降敬帝爲太子九月陳霸先廢之復立敬帝

敬帝方智元帝九子母夏氏初封晉安王元帝被害陳霸先迎立之卽位於京師在位一年禪於陳

自乙亥九月盡丁丑十月

右梁四帝

棟淵明不在其數

凡三世共五十六年始壬午終丁丑

陳世章

高祖武皇帝姓陳氏名霸先吳興長城下若里人南史曰陳氏其本甚微自云寔之後

陳紀曰陳氏世居潁川漢太丘長寔玄孫準晉太尉準生匡匡生達永嘉南遷為丞相掾歷太子洗馬出為長城今悅其山水遂家焉嘗謂所親曰此地山川秀麗當有王者興二百年後我子孫必鍾斯運達生康復為丞相掾咸和中土斷故為長城人康生盱眙太守英英生尚書郎公弼生步兵校尉鼎鼎生散騎侍郎高高生懷安令詠詠生安成太守猛猛生太常卿道巨生文讚文讚生道談及武帝道談仕於梁世為東宮直閣將軍侯景之亂領弩矢二千援臺於城中中流矢卒封義興郡公謚曰昭烈武帝受禪改封

郡王

武帝起參軍以討賊功至始興太守太清二年己巳冬起兵討侯景壬申三月平侯景乙亥冬殺王僧辨自為丞相丁丑九月封陳公十月篡梁稱皇帝己卯六月殂在位三年

卮言曰陳紀霸先少倣儻有大志不治生業既長讀兵書多武藝初仕鄉為里司後為廣州參軍有功遷至始興太守侯景之亂因以代梁與劉裕蕭道成伯仲間耳

世祖文皇帝禕武帝兄始興昭烈王長子也初封臨川王武帝無嗣

帝嗣立在位七年

自己卯六月至丙戌四月

廢帝伯宗文帝長子母沈皇后在位二年廢

自丙戌四月至戊子子十月

高宗孝宣皇帝頊文帝弟始興昭烈王次子初封安成王廢少主而

自立在位十四年

自巳丑正月
至壬寅正月

後主叔寶宣帝嫡長子母柳皇后在位七年滅於隋

自壬寅正月
盡巳酉正月

右陳五帝凡三世共三十三年始丁丑終巳酉

列傳

史言行錄

月莫深歷皇帝曰永六月既亥廿三

壬申二月平叛身死於冬冬王高祖自燕奔許丁丑六月桂刺公十

海帝味察軍以捕如也至欲與大守大壽二年巳冬味兵情氣景

條正



學海君道部卷之十四

世系類四十一

閏位世次二

北朝篇

魏世章

魏之先出自黃帝姓跖跋氏

魏書本紀曰魏之先出自黃帝之子曰昌意昌意之少子受封北土國有大鮮卑山因以爲號其後世爲君長統幽都之北廣漠之野畜牧遷徙射獵爲業淳樸爲俗簡易爲化不爲文字刻木紀契而已世事遠近人相傳授如史官之紀錄焉黃帝以土德王北俗謂土爲托謂后爲跋故以爲氏其裔始均入仕堯世逐女魃于弱

水之北民賴其勤帝舜嘉之命爲田祖爰歷三代以及秦漢獯鬻
獫狁山戎匈奴之屬累代殘暴作害中州而始均之裔不交南夏
是以載籍無聞焉積六十七世至成皇帝毛立聰明武略遠近所
推統國三十六大姓九九十九威振北方莫不率服其後有節皇
帝貧莊皇帝觀明皇帝樓安皇帝越宣皇帝推寅於是南遷大澤
方千餘里厥土昏冥沮洳謀更南徙未行而崩景皇帝利立景帝
崩元皇帝俟立元帝崩和皇帝肆立和帝崩定皇帝機立定帝崩
僖皇帝蓋立僖帝崩威皇帝儉立威帝崩獻皇帝隣立時有神人
言此土荒遐宜徙建都邑獻帝年老乃以位授子聖武皇帝詰汾
命南移山谷高深九難八阻於是欲止有神獸其形似馬其聲類
牛先行導引歷年乃出始居匈奴故地其遷徙策略多出宣獻二

帝故人並號曰推寅蓋俗云鑽研之義初聖武帝嘗率數萬騎田
於山澤歛見輜輶自天而下旣至見美婦人自稱天女受命相偶
遂旦日請還期年周時復會於此言終而別及期帝至先田處果
見天女以所生男授帝曰此君之子也善養視之子孫相承當世
爲帝王語訖而去子卽始祖神元皇帝也故時人諺曰詰汾皇帝
無婦家力微皇帝無舅家帝崩神元帝立

宋書索虜傳曰索頭虜姓託跋氏其先漢將李陵後也陵降匈奴
有數百千種各立名號索頭亦其一也晉初索頭種有部落數萬
家在雲中

通典曰托跋氏亦東胡之後別部鮮卑

路史曰後魏之先爲拓跋氏至道武都洛陽乃爲元氏元氏之所

出書傳最雜宋齊二史則以爲降將李陵之後魏書序紀則以爲
后稷始均之後其說皆非據北史謂土爲托后爲跋拓跋者以黃
帝土王爲言而宋書乃云索頭虜其先李陵降匈奴單于妻以女
字曰拓跋因氏焉蓋出崔浩之說當時衆議已相斥不行或竊以
渡江約遂仍之乃若魏書序紀則因山海經始均生北狄而妄謂
拓跋之先又誤以始均爲叔均而遂以爲稷後其言始均事堯則
是以爲叔均矣俱妄也又按黨項自有拓跋等氏蓋其後盛於北
土故唐表謂悃後爲鮮卑君而通典謂之東胡之別是殆又以拓
跋爲帝譽厭越後矣愈非

拓跋力微是爲始祖

綱目辛巳

漢景耀四
魏景元二

冬鮮卑索頭貢質於魏

通鑑力微之先世居北荒至可汗毛始強大後五世至可汗雅
寅南遷大澤又七世至可汗鄰使其兄弟分統部衆鄰老以其
位授其子詰汾使南遷遂居匈奴故地涪汾卒力微立復徙居
定襄之盛樂部衆浸盛諸部皆畏服之魏景元庚辰冬力微始
遣其子沙漠汗入貢因留爲質

胡氏曰漢建安二十年置新興郡郡止置一縣以屬之新興而
盛樂故城棄之荒外故力微得居之初鮮卑軻比能與拓跋爲
敵軻比能死北邊差安而拓跋氏盛矣

綱目晉武帝咸寧元年乙未夏六月索頭遣子入貢於晉

通鑑力微復遣其子沙漠汗入貢將還幽州刺史衛瓘表請留
之又密以金賂其諸部大人離間之

咸寧三年丁酉冬索頭拓跋力微歿

通鑑丁酉衛瓘始遣沙漠汗歸國諸部大人共譖而殺之瓘復以計懼諸大人皆散走力微以憂卒子悉鹿立其國遂衰

本紀曰神元皇帝享國五十八年道武即位尊為始祖

力微子悉鹿力

本紀曰章帝立諸部離叛國內紛擾享國九年而崩

悉鹿弟綽

本紀曰平帝雄武有智略威德復舉享國七年而崩

力微孫弗沙漠汗之子

本紀曰思帝聰哲有大度為諸父兄所重政崇寬簡百姓懷服一

年而崩

力微子祿官繼立十三年

綱目晉惠帝元康五年乙卯冬十月索頭分其國為三部

通鑑祿官分其國為三部一居上谷之北濡源之西自統之一

居代郡參合陂之北在代郡使兄沙漠汗之子猗龜統之一居定

襄之盛樂故城屬雲中郡使猗龜弟猗盧統之猗盧善用兵西擊匈

奴烏桓諸部皆破之代人衛操與從子雄及同郡箕澹往依拓

跋氏說猗龜猗盧招納晉人猗龜悅之任以國事晉人附者稍

衆

胡氏曰史言拓拔氏益疆當是時晉朝大臣宗室雖已自相屠

而四方未為變也衛操箕澹輩何為去華就夷如是其早計也

中國之人可為凜凜矣漢嚴邊關之禁懼有罪者以命出塞耳

若無威刑之迫乎其後一旦去桑梓而逐水草是必有見也邊關不之詰朝廷不之虞晉之無政亦可知矣

綱目元康七年丁巳冬索頭猗屯西略諸國

通鑑猗屯度漢北巡因西略諸國積五歲降附者三十餘國甲子秋八月晉惠帝爲成都王穎逼畱在鄴劉淵至左國城自立爲大單于發兵助穎東羸公騰乞師於猗屯以擊淵猗屯與弟猗盧合兵擊淵於西河破之與騰盟於汾東而還自此拓拔氏屢以兵助并州乙丑夏六月漢王淵攻東羸公騰騰復乞師於猗屯衛操勸猗屯助之猗屯帥輕騎數千救騰斬漢將綦母豚詔假猗屯大單于是歲猗屯卒子普根代立

綱目懷帝永嘉元年丁卯冬拓跋祿官卒

本紀曰十三年昭帝崩慕容廆遣使朝貢

沙漠汗子猗盧繼立四年晉封代公七年爲王天興初追尊穆皇帝通鑑祿官卒猗盧總攝三部與慕容廆通好

綱目永嘉四年庚午冬十月以拓跋猗盧爲大單于封代公

通鑑初匈奴劉猛死劉虎代領其衆居新興漢建安中置郡與鐵弗氏

及白部鮮卑皆附於漢庚午冬十月并州刺史劉琨自將討劉虎及白部遣使卑辭厚禮說猗盧以請兵猗盧使其弟弗之子鬱律帥騎二萬助之遂破劉虎白部屠其營琨與猗盧結爲兄弟表猗盧爲大單于以代郡封之爲代公時代郡屬幽州王浚不許遣兵擊猗盧猗盧拒破之浚由是與琨有隙猗盧以封邑去國懸遠民不相接乃帥部落萬餘家自雲中入鴈門從琨求

陘北之地

陘北石陘關之北也

琨不能制且欲倚之爲援乃徙樓煩馬邑

陰館繁峙崞五縣民於陘南以其地與猗盧

魏書曰其地東接代郡南連西河朔

方方數百里

由是猗盧益盛琨遣使言於太傅越請出兵共討劉聰

石勒越不許琨乃謝猗盧之兵遣歸國

魏書曰徙十萬家以充之

永嘉五年

辛未

夏六月漢人入寇陷洛陽遷帝於平陽

通鑑六月漢兵陷洛陽懷帝被執秋七月劉琨遣子遵請兵於

代公猗盧猗盧遣其子六脩將兵助琨戍新興琨牙門將邢延

以碧石獻琨琨以與六脩六脩復就延求之不得執延妻子延

怒以所部兵襲六脩六脩走延遂以新興附漢請兵以攻并州

永嘉六年

壬申

冬漢劉曜襲晉陽陷之劉琨奔常山冬十月代公猗

盧攻晉陽劉曜敗走猗盧追擊大敗之

通鑑二月代公猗盧遣兵救晉陽漢兵敗走秋七月漢主劉曜

遣劉粲劉曜乘虛襲陷晉陽是時晉雍州刺史賈疋等奉秦王

業爲皇太子建行臺於長安冬十月代公猗盧遣其子六脩及

兄子普根將軍衛雄范班箕澹帥衆數萬爲前鋒以攻晉陽猗

盧自帥衆二十萬繼之劉琨收散卒數千爲之鄉導六脩與漢

中山王曜戰於汾東曜兵敗走入晉陽掠其民踰蒙山而歸十

一月猗盧追之戰於藍谷漢兵大敗擒劉豐斬邢延等三千餘

級伏尸數百里猗盧因大獵壽陽山陳閩皮肉山爲之赤劉琨

自營門步入拜謝固請進軍猗盧曰吾不早來致卿父母見害

誠以相愧今卿已復州境吾遠來士馬疲弊且待後舉劉聰未

可滅也遺琨馬牛羊各千餘疋車百乘而還留其將箕澹段繁

等戍晉陽琨徙居陽曲

綱目愍帝建興元年癸酉春二月漢主劉聰弒帝於平陽夏四月太子業卽位於長安

通鑑懷帝遇弒四月太子業卽皇帝位王浚召段疾陸眷欲與之共擊石勒疾陸眷不至浚怒以重幣賂代公猗盧共討之代公猗盧遣右賢王六脩將兵會之爲疾陸眷所敗六月劉琨與普根屯於北屈宋慈州夾城縣漢主聰分兵拒之琨等引兵還

冬十二月代城盛樂及平城

通鑑代公猗盧城盛樂以爲北都治故平城爲南都又作新平城於灑水之陽使右賢王六脩鎮之統領南部甲戌春三月劉

琨請兵於代公猗盧以擊漢會猗盧所部雜胡萬餘家謀應石勒猗盧悉誅之不果赴琨約

建興三年乙亥春二月進代公爵爲王

通鑑詔進猗盧爵爲代王置官屬食代常山二郡常山巴爲石勒所有猗

盧請并州從事鴈門莫含於劉琨琨遣之含不欲行琨曰以并州單弱吾之不材而能自存於胡羯之間者代王之力也吾傾身竭貲以長子爲質而奉之者庶幾爲朝廷雪大耻也卿欲爲忠臣奈何惜其事之小誠而忘徇國之大節乎往事代王爲之腹心乃一州之所賴也含遂行猗盧甚重之常與參大計猗盧用法嚴國人犯法者或舉部就誅老幼相攜而行人問何之曰徃就必無一人敢逃匿者

劉氏曰書進某爵何命自上出也與書魏公操進爵為王者異
建興四年丙子春二月代六脩弒其君猗盧普根討之而立尋卒

通鑑初代王猗盧愛其少子比延欲以為嗣使長子六修出居新
平城而黜其母六脩有駿馬日行五百里猗盧奪之以與比延六
修來朝猗盧使拜比延六修不從猗盧乃坐比延於其步輦使人
導從出遊六修望見以為猗盧伏謁路左至乃比延六修慙怒而
去猗盧召之不至大怒帥眾討之為六脩所敗猗盧微服逃民間
有賤婦人識之遂為六脩所弒

猗盧子普根立一日

通鑑普根先守外境聞 六赴攻六脩滅之普根自立國中大亂
新舊猜嫌迭相誅滅力軍衛雄信義將軍箕澹久佐猗盧為眾

所附謀歸劉琨乃言於眾曰聞舊人忌新人悍戰欲盡殺之奈何
晉人及烏桓皆驚懼曰死生隨二將軍乃與琨質子遵帥晉人及
烏桓三萬家馬牛羊十萬頭歸於琨琨大喜親詣平城撫納之琨
兵由是復振夏四月普根卒其子始生普根母惟氏立之

弗之子曰鬱律繼立五年夫興初追尊為太祖平文皇帝

綱目建興四年丙子二月代普根立尋卒鬱律立

通鑑普根之子又卒國人立鬱律為代王

本紀曰帝資質雄壯甚有威略

綱目元帝太興元年戊寅秋七月代王鬱律擊劉虎破之

通鑑四月晉王即皇帝位是為元帝七月劉虎自朔方侵代西部鬱

律擊虎大破之虎走出塞從弟路孤帥其部落降於鬱律於是

鬱律西取烏孫故地東兼勿吉以西土馬精強雄於北方

天台胡氏曰唐書北狄列傳曰黑水靺鞨居肅慎地亦曰挹婁元魏謂之勿吉通鑑蓋因魏收魏書書之鬱律所取者勿吉以西之地未能兼勿吉也徙河慕容令支段氏及宇文部高句麗亦非鬱律所能制伏

大興四年^{辛巳}冬代弒其君鬱律子賀偃立

通鑑倚屯之妻惟氏忌代王鬱律之強恐不利於其子乃殺鬱律而立其子賀偃大人死者數十人惟氏專制國政遣使聘後趙人謂之女國使

本紀曰帝即位之二年劉曜遣使請和帝不納三年石勒自稱趙王遣使乞和請爲兄弟帝斬其使以絕之四年涼州刺史張

茂遣使朝貢五年晉遣使韓暢加崇爵服帝絕之治兵講武有平南夏之意桓帝后以帝得衆心恐不利子巳子害帝遂崩

倚迤少子曰賀偃繼立三年天興初追尊倚迤桓皇帝賀偃惠皇帝本紀曰惠帝立以五年爲元年未親政事太后臨朝遣使與石勒通和時人謂之女國使

綱目明帝大寧二年^{甲申}冬代王賀偃徙居東木根山

通鑑代王賀偃始親國政以諸部多未服乃築城於東木根山徙居之

太寧三年^{乙酉}冬十二月代王賀偃卒弟紇那嗣

賀偃之弟曰紇那繼立先後七年天興初追尊煬皇帝鬱律之長子曰駮槐先後七年天興初追尊烈皇帝

綱目成帝咸和四年巳冬十二月代王紇那出奔宇文部翳槐立
 通鑑咸和丁亥後趙中山公虎擊代王紇那戰於句注陁北紇
 那兵敗徙都大寧即廣寧也以避之翳槐居於其舅賀蘭部紇那遣
 使求之賀蘭大人藹頭擁護不遣紇那與宇文部共擊藹頭不
 克巳丑冬賀蘭及諸大人共立翳槐為代王代王紇那奔宇文
 部翳槐遣其弟什翼犍質於趙以請和

咸康元年壬冬十月代王紇那復入翳槐奔趙

通鑑代王翳槐以賀蘭藹頭不恭將召而戮之諸部皆叛代王
 紇那自宇文部入諸部復奉之翳槐奔鄴趙人厚遇之

咸康三年丁酉秋七月趙納代王翳槐於代紇那奔燕

通鑑趙王石虎遣其將李穆納翳槐於大寧其故部落多歸之

代王紇那奔燕國人復奉翳槐城盛樂而居之

咸康四年戊戌冬十月上翳槐卒弟什翼犍立

高祖昭成皇帝什翼犍鬱行之次子也在位三十九年天興中追尊
 通鑑什翼犍為質於趙十月代王翳槐疾病命諸大人立之翳
 槐卒諸大人梁蓋等以新有大故什翼犍在遠來未可比其
 至恐有變亂謀更立君而翳槐次弟屈剛猛多詐不如屈弟孤
 仁厚乃相與殺屈而立孤孤不可自詣鄴迎什翼犍請身留為
 質趙王虎義而俱遣之十一月什翼犍即代王位於繁縣屬時廐門
 郡改元曰建國分國之半以與孤初代王倚盧既卒國多內難
 部落離散拓跋氏寢衰及什翼犍立雄勇有智略能脩祖業國
 人附之始置百官分掌眾務以代人燕鳳為長史許謙為郎中

令始制反逆殺人姦盜之法號令明白政事清簡無繁訊連逮之煩百姓安之於是東自濊貊西及破落那南距陰山北盡沙漠率皆歸服有衆數十萬人史言代復強

咸康五年紀春三月代王什翼犍求昏於燕

通鑑代王什翼犍會諸大人於參合陂議都灑源川乃從其母王氏計而止代人謂它國之民來附者皆為烏桓什翼犍分之為二部各置大人以監之弟孤監其北子寔君監其南什翼犍求昏於燕燕王皝以其妹妻之

咸康六年庚子春三月代始都雲中

通鑑代王什翼犍始都雲中之盛樂宮辛丑秋九月築盛樂城於故城南八里冬十月匈奴劉虎寇代西部代王什翼犍遣軍

逆擊大破之虎卒子務桓立遣使求和於什翼犍以女妻之務

桓又朝貢於趙趙以為左賢王魏書曰是年慕容元真遣使朝貢并薦其女

康帝建元元年癸卯秋燕伐代

通鑑癸卯七月代王什翼犍復求婚於燕燕王皝使納馬千匹為禮什翼犍不與八月皝遣世子儁帥前軍師評等擊代後魏序紀

八月慕容元真遣使請薦女無用兵事今從燕書什翼犍帥衆避去燕人無所見而還

甲辰二月代王什翼犍遣其大人長孫秩迎婦於燕魏書曰六月皇后至

自和龍七月慕容元真遣使奉聘求是歲晉康帝崩子聃立是

帝

魏書曰建國八年慕容皝遣使朝貢九年石虎遣使朝貢十年張重華遣使朝貢十三年魏人冉閔殺石鑒而自立十四年帝

曰石胡衰滅冉閔肆禍中州紛擾莫有匡救吾將親率六軍廓定四海乃勅諸部各率所統以俟大期諸大人諫曰今中州大亂誠難進取如聞豪彊並起不可一舉而定若或留庭經歷歲稔恐無永逸之利或有虧損之憂帝乃止是歲符健僭號千長安自號大泰十五年慕容雋滅冉閔僭號十六年慕容雋遣使朝貢十七年遣使於慕容雋張祚遣使朝貢

穆帝升平五年辛酉春正月劉衛辰叛秦降代

通鑑永和丙辰正月匈奴大人劉務桓卒弟闕頭立將貳於代

二月代王什翼犍引兵西巡臨河闕頭懼請降魏書曰慕容雋來請婚許之明年雋奉戊午闕頭部落多叛懼而東走乘冰度河半度而冰解

後衆悉歸闕頭兄子悉勿祈闕頭奔代魏書曰初闕頭而叛悉勿祈兄弟十二人在帝

左右盡遣歸欲其自相猜離至是悉勿祈奪其衆闕頭窮而歸命帝待之如初已未四月劉悉勿祈卒

弟衛辰殺其子而代之魏書曰二十二年春帝東巡至於桑乾雲中悉勿祈弟衛辰立庚申六月代王什翼犍妃慕容氏卒

七月劉衛辰如代會葬因求婚什翼犍以女妻之魏書曰是歲慕容雋死子

暉立遣辛酉正月劉衛辰掠秦邊民為奴婢以獻於秦秦王符

堅責之使歸所掠衛辰由是叛秦專附於代是歲晉穆帝崩琅

邪王丕嗣位是為哀帝壬戌十一月代王什翼犍納女於燕燕人亦

以女妻之魏書曰二十五年帝南巡君于津冬十月行幸代癸亥十月代王什翼犍擊

高車大破之高車即勅勒也俗乘高車故亦號高車部俘獲萬餘口馬牛羊百餘

萬頭甲子春代王什翼犍還雲中十一月討沒歌部破之獲牛

馬羊數百萬頭

馬羊數百萬頭

哀帝興寧三年乙丑春正月劉衛辰復叛代代王什翼犍擊走之

通鑑正月劉衛辰復叛代代王什翼犍東渡河擊走之二月晉

哀帝崩琅邪王奕即位是為廢帝魏書曰是歲符堅遣使朝貢

帝奕太和元年丙寅夏六月代王什翼犍遣使入貢於秦

通鑑曰六月代王什翼犍遣太長史燕鳳入貢於秦

太和二年丁卯冬十月代王什翼犍擊匈奴劉衛辰走之

通鑑七月燕下邳王慕容厲擊敕勒兵過代地犯其稼田今南人呼

黍為稌此方地寒五穀不生惟黍生之故有稼田代王什翼犍怒時燕武強公慕容涅

以幽州兵戍雲中八月什翼犍攻雲中湜棄城走十月代王什

翼犍擊劉衛辰河冰未合什翼犍命以葦組約流漸俄而冰合

自代擊朔方西渡大河其津曰君子津組居登棚然猶未堅乃散葦於其上水草相結

有如浮梁代兵乘之以渡衛辰不意兵猝至與宗族西走什翼

犍收其部落十六七而還衛辰犇秦秦王堅送衛辰還朔方

太和五年庚午冬十一月代擊高車大破之

簡文帝咸安元年辛未春代世子寔卒

通鑑初代將長孫斤謀逆拔刃向代王世子寔格之被傷而卒

寔娶賀野干氏有遺腹子七月生男代王什翼犍為之赦境內

名曰涉圭十一月晉大司馬桓溫廢帝奕為海西公立琅邪王

昱是為簡文帝壬申晉簡文帝崩子昌明立是為孝武帝

孝武太元元年丙子冬十一月秦遣兵擊代敗之十二月代寔君弒

其君什翼犍秦討殺之遂分代為二部

通鑑癸酉二月代王什翼犍使燕鳳入貢於秦甲戌歲代王擊

劉衛辰衛辰南走乙亥十月劉衛辰爲代所逼求救於秦秦王符堅遣其將行唐公洛帥幽冀兵十萬擊代使并州刺史俱難及鄧羗趙遷李柔朱月張虫蚝郭慶帥步騎二十萬東出和龍西出上部皆與洛會以衛辰爲嚮導十一月代王什翼犍使白部獨孤部南禦秦兵皆不勝又使南部大人劉庫仁將十萬騎禦之庫仁者衛辰之族什翼犍之甥也與秦兵戰於石子嶺庫仁大敗什翼犍病不能自將乃帥諸部犇陰山之北高車雜種盡叛四面寇鈔不得芻牧什翼犍復度漠南聞秦兵稍退十二月什翼犍還雲中爲庶長子寔君所弑事詳弑逆門

史斷曰魏自詰汾以前奄宅幽方世爲君長屬典午喪亂中原雲擾於是拓跋鬱律始有并吞中夏之志什翼犍繼之征伐四克威震蠻荒始改都立號恢建大業東自穢貊西及破落那莫不款附拓跋珪嗣位稱號魏王於是建天子旌旗而國始大矣魏之史臣醜其世本鮮卑乃上引黃帝茫昧無證之事以釋拓跋之姓下引天女迂誕不經之說以紀神元之生至今讀史者莫之辨正吁亦惑矣

北史論曰自古帝王之興也誠有天命亦賴累功積德方契靈心有魏奄宅幽方代爲君長淳化育民與時無競神元生自天女桓穆勤於晉室冥符人事夫豈徒然昭成以雄傑之資包君人之量征伐四尅威被荒遐乃立號改都恢隆大業終百六十載光宅區中其原固有由矣

獻明皇帝寔什翼犍長子未立而卒道武時追尊

魏紀曰獻明皇帝寔昭成世子也昭成三十四年長孫斤謀迎拔刃向昭成寔格之被傷而卒寔娶賀野干氏是爲遺腹生太祖太祖卽位追謚寔爲獻明皇帝賀氏爲獻明皇后

太祖道武皇帝珪什翼犍孫寔子

魏紀曰太祖道武帝珪昭成帝嫡孫獻明長子昭成殂國衆離散太祖轉幸獨孤部劉庫仁子顯將謀逆帝馳還乃幸賀蘭部

道武以丙戌自稱代王戊戌取燕稱皇帝改國號曰魏戊申十月爲子紹所弒在位二十三年

魏紀天興元年戊戌六月丙子詔有司議定國號羣臣曰昔周秦以前世所生之土有國有家及王天下卽承爲號自漢以來罷侯置守時無世繼其應運而起者不由尺土之資今國家萬世相承

啓基雲代臣等以爲若取長遠應以代爲號詔曰昔朕遠祖魏幽都控制遐國雖踐王位未定九州逮於朕躬處百代之季天下分裂諸華之主民俗雖殊撫之在德故躬率六軍掃平中土凶逆蕩除遐邇率服宜仍先號以爲魏焉七月遷都平城始營宮室立宗廟社稷

太宗明元皇帝嗣道武長子母劉貴人在位十五年自戊申十月至癸亥十一月

世祖太武皇帝燾明元長子母杜貴嬪在位二十八年爲宦官宗愛

弒元甲子終辛卯三月

恭景穆皇帝晃太武長子母賀夫人立爲皇太子卒文成時追尊

高宗文成皇帝濬太武嫡孫景穆帝長子母曰閻氏宗愛弒逆大臣迎立帝在位十四年元壬辰終乙巳五月

顯祖獻文皇帝弘文成長子母李貴人在位五年內禪元丙午終庚戌八月

高祖孝文皇帝宏獻文長子母李夫人在位二十九年元辛亥終已卯四月

綱目丙子魏太和二十年春正月魏改姓元氏初定族姓

通鑑魏王下詔以為北人謂土為拓后為跋魏之先出於黃帝

以土德王故為拓拔氏夫土者黃中之色萬物之元也宜改姓

元氏詔功臣舊族目代來者姓或重複皆改之

南齊書曰宏徙都洛陽改姓元氏初匈奴女名托跋妻李陵胡

俗以母名為姓故虜為李陵之後虜甚諱之有言其是陵後者

輒見殺至是乃改姓焉

世宗宣武皇帝恪孝文第二子母高夫人在位十六年元庚辰終乙未正月

肅宗孝明皇帝詡宣武第二子母胡克華在位十三年元丙申終戊申二月

少主釗孝文曾孫孝文次子景兆王愉以逆誅追封臨洮王子賈

暉嗣釗寶暉世子也胡太后酖孝明而立之在位一月為爾朱榮

所害

孝莊皇帝子攸獻文帝孫也獻文第六子曰彭城王勰帝勰之第三

子也母李妃累封長樂王爾朱榮謀害少主而立之在位二年為爾

朱兆所弑元已酉終庚戌十二月

北海王顥獻文孫獻文第七子曰北海王詳以罪免歿謚曰平王

顥詳之子也襲北海王爾朱之亂奔梁梁王

東海王曄太武曾孫也景穆生南安王楨卒謚曰惠後以罪除楨

次子曰怡以罪去鎮卒贈扶風王

節閔皇帝恭獻文孫獻文第四子曰廣陵王羽以罪免卒贈司徒謚

曰慧帝羽之子也母王氏襲廣陵王爾朱世隆廢幼主迎立之在位一年為高歡所廢元辛亥二月終十二月

廢帝朗太武五世孫景穆四世孫也景穆庶子曰章武王太洛卒謚曰敬無子孝文以南安王第二子彬為後彬生融融歿於陣謚莊武

帝融之第三子也母程氏高歡廢節閔而立之在位一年復廢自辛亥十一月至壬子四月

孝武皇帝脩孝文之孫也孝文第五子曰廣平王懷卒謚武穆帝懷之第三子也母李氏初封平陽王高歡廢帝朗而立之帝惡歡專政

西奔長安依宇文泰為秦所弒在位二年元癸丑終甲寅十二月

西魏

文皇帝寶炬孝文孫也孝文第三子曰京兆王愉詳前帝愉之次子也

母楊氏初封南陽王宇文泰弒孝武而立之是為西魏在位十七年

元乙卯終辛未三月

廢帝欽文帝長子母乙皇后在位二年為宇文泰所廢元壬申終癸酉十一月

恭帝廓文帝第四子廢帝母弟初封齊王宇文泰廢帝欽而立之復

姓拓跋氏在位四年禪於周元甲戌終丁丑正月

右魏十六帝創顯暉不在其數凡十世共一百七十二年始丙戌終丁丑

東魏附

孝靜帝善見孝文曾孫也孝文第四子曰清河王懌生亶懌卒亶嗣

王孝武奔長安高歡入洛陽推亶承制決事已而廢之遂立帝帝亶

之世子也母胡妃在位十七年

北齊世章

高祖神武皇帝姓高氏名歡渤海裔人

本史紀曰神武六世祖隱爲晉玄菟太守隱生慶慶生泰泰生湖三世仕慕容氏及慕容寶敗國亂湖率衆歸魏爲右將軍湖生四子第三子謚仕魏位至侍御史坐法徙居懷朔鎮謚生皇考樹樹性通率不事家業住居白道南數有赤光紫氣之異隣人以爲怪勸徙居以避之皇考曰安知非吉居之自若及神武生而皇妣韓氏殂養於同產姊婿鎮獄尉景家神武旣累世北邊故習其俗遂同鮮卑

神武以魏建明元年庚戌冬統六鎮辛亥高乾起兵討尒朱氏以冀州迎歡魏封渤海王遂起兵討尒朱氏壬子夏盡滅之乃立孝武帝自爲大丞相甲寅七月孝武奔長安神武立孝靜帝自爲相國丁卯正月卒文宣篡魏追尊

卮言曰齊紀云歡深沉有大志輕財重士爲豪俠所宗素家貧執役在平城富人婁氏女見而奇之遂嫁焉始有馬得給鎮將自隊主轉爲出遂從尒朱榮立功得爲鎮將尒朱之亂因以篡魏蓋亦曹操劉裕之雄已

世宗文襄皇帝澄神武長子母婁太后神武卒澄嗣渤海王一年爲盜所殺文宣篡位追尊

顯祖文宣皇帝洋神武第二子文襄母弟初封太原公文襄遇害洋嗣立庚午正月進封齊王五月篡魏稱皇帝己卯十一月殂在位十年

廢帝殷文宣長子母李皇后在位一年爲常山王演所廢

元庚辰終八月

肅宗孝昭皇帝演神武第六子文宣母弟累封常山王廢少主而自立在位一年元辛巳終十一月

世祖武成皇帝湛神武第九子孝昭母弟累官右丞相孝昭殂遺詔嗣立

在位三年禪於太子

元壬午終乙酉四月

後主緯武成長子母胡皇后在位十二年禪於太子

元丙戌終丙申十二月

安德王延宗文襄之子後主兵敗出奔延宗卽帝位於太原尋爲

周師所虜

幼主恒後主長子母穆皇后在位一月滅於周

盡丁酉正月

右齊六主凡三世共二十八年始庚午終丁酉

後周

太祖文皇帝姓宇文氏名泰代郡武人

本紀云宇文氏其先出自炎帝炎帝爲黃帝所滅子孫遁居朔野其後有葛烏兔者雄武多美略鮮卑奉以爲主遂總十二部落世爲大人及其裔孫曰普回因狩得玉璽三紐文曰皇帝璽普回以爲天授已獨異之其俗謂天曰宇謂君曰文故國號宇文并以爲氏普回子莫那自陰山南徙始居遼西是曰獻侯爲魏舅甥之國自莫那九世至侯豆歸爲慕容晃所滅

魏書傳曰匈奴宇文出於遼塞外其先南單于遠屬也世爲東部大人其語與鮮卑頗異人皆剪髮而留其頂上以爲首飾長過數寸則截短之婦女被長襦及足而無裳焉宇人莫槐爲部人所殺更立其弟普撥爲大人普撥歿子丘不勤立尚平文帝女丘不勤歿子莫廐立莫廐歿子遜昵延立遜昵延父子世雄莫北又先得

玉璽三紐自言為天所相俗謂天曰字及為慕容廆所敗乃遣使

朝獻於昭帝帝以女妻焉遜昵延歿子乞得龜立復伐慕容廆

敗之別部人乞得龜而自立又敗於慕容晃逸豆歸遠遁漠北

遂奔高麗就徙其部眾五千餘落於昌黎自此散滅矣

通典曰宇文莫槐晉史謂之鮮卑後魏史云其先匈奴南單于之

遠屬又後周書云出自炎帝之裔鮮卑奉以為主今考諸家所說

其鮮卑之別部

本紀曰豆歸子陵仕燕拜駙馬都尉封玄菟公魏道武將攻中山

陵從慕容寶禦之寶敗陵歸魏敗都牧主賜爵安定侯天興初魏

徙豪傑於代都陵隨例徙居武川即為其郡縣人陵生系系生韜

韜生肱並以武略稱肱任俠有氣幹正光末沃野鎮人破六汗拔

投陵作亂其偽署王衛可瓌最盛肱乃糾合鄉里斬瓌其眾乃散

後陷於鮮于修禮周書曰修禮令肱還統其部眾為定州軍所破沒於陣武成初

追謚曰德皇帝太祖德帝之少子也母曰王氏

文帝少從軍立功至遷雍州司馬甲寅統軍討侯莫陳悅誅之為關

西大都督魏孝武入長安以為大丞相乙卯正月立文帝自為都督

封安定公戊辰自為太師辛未魏文帝殂廢帝欽立甲戌正月廢帝

欽而立恭帝丙子正月建周官自為大冢宰十月薨閔帝篡魏追尊

閔皇帝覺太祖第三子母元氏大象中追尊為皇后丙子嗣安定公位尋進封

周公丁丑正月篡魏位稱天王七月宇文護廢而弑之凡在位七月

世宗明皇帝毓文帝長子母姚夫人初封寧都郡公為岐州刺史宇

文護弑閔帝而立之己卯八月改天王稱皇帝庚辰四月為護所弑

凡在位三年

高祖武皇帝邕文帝第四子母叱奴太后累封魯國公明帝之遇弒也遺詔立之戊戌六月殂在位十八年

宣皇帝贊武帝長子母李太后武帝殂贊以皇太子嗣立己亥二月傳位於子衍自稱天元皇帝庚子五月殂

靜皇帝衍宣帝長子母朱皇后初以皇太子受內禪居正陽宮及宣帝殂乃入居天臺廢正陽宮后父楊堅自爲大丞相辛丑二月楊堅廢帝爲介公凡在位二年

右周五主凡三世共二十五年始丁丑終辛丑

學海君道部卷之十四終

學海君道部卷之十五

世系類

五十一

閏位世次

三

五代篇

陳師錫五代史序曰孟子曰三代之得天下也以仁其失天下也以不仁自生民以來一治一亂旋相消長未有去仁而興積仁而亡者甚哉五代不仁之極也其禍敗之復殄滅剝喪之威亦其效耳夫國之所以存者以有民民之所以生者以有君方是時上之人以慘烈自任刑戮相高兵革不休夷滅構禍置君猶易吏變國若傳舍生民膏血塗草野骸骼暴原隰君民相眎如髦蠻草木幾何其不胥爲夷也逮皇天悔禍真人出寧易暴以仁轉禍以德民

咸保其首領收其族屬各正性命豈非天耶方夷夏相蹂兵連禍結非無忠良豪傑之士竭謀單智以緩民之死乃堙沒而無聞矣否閉極而泰道升聖人作而萬物覩指揮中原兵不頓刃向之滔天巨滑淫毒煽禍以害斯人者蹈鼎鑊斧鑕之不暇豈非人耶天與人相爲表裏和同於無間聖人知天之所助人之所歸國之所恃以固者仁而已非特三代然也堯舜之盛漢唐之興秦隋之失魏晉之亾南北之亂莫不由此焉

丘氏濬曰唐亡之後相繼而起者朱李石劉郭五姓所謂梁唐晉漢周是也自宋人作五代史世因稱之爲五代夫謂之代者必繼世之長歷十數世也五姓僭亂歛起忽滅甚至繼世止有二主歷年僅見四稔較之有周一代八百年之長何如哉同以代稱似非其倫今因朱子大學章句序中語爲五季

梁世章

歐史本紀論曰嗚呼天下之惡梁久矣自後唐以來皆以爲僞也至予論次五代獨不僞梁議者或譏予大失春秋之旨以謂梁負大惡當加誅絕而反進之是獎篡也非春秋之志也予應之曰是春秋之志爾魯桓公弑隱公而自立者宣公弑子赤而自立者鄭厲公逐世子忽而自立者衛公孫剽逐其君衎而自立者聖人於春秋皆不絕其爲君此予所以不僞梁者用春秋之法也然則春秋亦獎篡乎曰惟不絕四者之爲君於此見春秋之意也聖人之於春秋用意深故能勸戒切爲言信然後善惡明夫欲著其罪於後世在乎不沒其實其實嘗爲君矣書其爲君其實篡也書其篡

各傳其實而使後世信之則四君之罪不可得而掩爾使爲君者不得掩其惡然後人知惡名不可逃則爲惡者庶乎其息矣是謂用意深而勸戒切爲言信而善惡明也桀紂不待貶其王而萬世旨也惟不沒其實以著其罪而信乎後世與其爲君而不得掩其惡以息人之爲惡能知春秋之此意然後知予不僞梁之旨也

太祖皇帝姓朱氏名溫宋州碭山午溝里人

舊史曰其先舜司徒虎之後

按書典舜命益爲朕虞讓於朱虎熊羆朱虎是二人非朱姓虎名也

卮言曰書舜典舜命益於爲朱虎熊羆朱虎是二人非朱姓虎名也而舊史妄引以爲朱溫之祖謬矣

歐史曰高祖黯曾祖茂祖琳父誠以五經教授鄉里生三子曰全

昱存溫溫卽太祖母曰王氏

是爲文惠皇后

誠卒三子貧不能爲生與

母傭食蕭縣人劉崇家崇數詈辱崇母獨憐而戒家人善遇之

太祖初爲黃巢將從入長安二年降唐從諸軍討滅黃巢中和辛丑爲宣武節度使辛酉封東平王癸亥進爵梁王丁卯二月篡唐稱梁皇帝壬申六月爲其子友珪所弒在位六年

友珪太祖第二子微行與逆旅婦人野合而生者也壬申六月弒迎父自立癸酉二月伏誅凡僭位六月

末帝友貞太祖第三子母張皇后初封均王友珪弒逆帝舉兵討賊嗣位在位十一年滅於後唐

自癸酉二月盡癸未十月

右梁二主

友珪不在其數

凡二世共十七年起丁卯盡癸未

後唐世章

太祖武皇帝李克用其先蓋出於西突厥本號朱耶至其後世別自號曰沙陀而以朱耶爲姓

舊史曰太祖本姓朱耶氏其先隴右金城人始祖拔野古爲黑離軍使從太宗討高麗薛延陀有功爲金方副都護因家瓜州太宗平薛延陀諸部於安西北庭置都護以屬之分同羅僕骨之人置沙陀都督府蓋北庭有磧曰沙陀故因爲名焉永徽中以拔野古爲都督其後子孫五世相承爲沙陀都督

五代史序曰嗚呼世久而失其傳者多矣豈獨史官之謬哉李氏之先蓋出於西突厥本號朱耶至其後世別自號曰沙陀而以朱耶爲姓拔野古爲始祖其自序云沙陀者北庭之磧也當唐太宗時破西突厥諸部分同羅僕骨之人於此磧置沙陀府而以其始

祖拔野古爲都督其傳子孫數世皆爲沙陀都督故其後世因自號沙陀然予考於傳記其說皆非也夷狄無姓氏朱耶部族之號耳拔野古與朱耶同時人非其始祖而唐太宗時未嘗有沙陀府也唐太宗破西突厥分其諸部置十三州以同羅爲龜林都督府僕骨爲金微都督府拔野古爲幽陵都督府未嘗有沙陀府也當是時西突厥有鐵薛延陀阿史那之類爲最大其別部有同羅僕骨拔野古等以十數蓋其小者也又有處月處密諸部又其小者也朱耶者處月別部之號耳太宗二十二年已降拔野古其明年阿史那賀叛至高宗永徽二年處月朱耶孤注從賀魯戰於牢山爲契苾何力所敗遂沒不見後百五十六年當憲宗時有朱耶盡忠及子執宜見於中國而自號沙陀以朱耶爲姓矣蓋沙陀者大

積也在金莎山之陽蒲類海之東自處月以來居此積號沙陀突厥而夷狄無文字傳記朱邪又微不足錄故其後世自失其傳至盡忠孫國昌始賜姓李氏李氏後大而夷狄之人遂以沙陀爲貴種云

卮言曰按魏隋唐書突厥之先平涼雜胡也姓阿史那氏後魏太武滅沮渠氏阿史那以五百家奔茹茹世居金山工於鐵作狀如兜鍪俗呼兜鍪爲突厥因以爲號世臣茹茹至大葉護種類漸強後魏之末有伊利可漢以兵擊鐵勒大敗之降五萬餘落遂率衆襲茹茹破之伊利卒弟逸可漢立又破茹茹病且卒捨其子攝圖立其弟俟斗彌爲木杆可漢遂擊茹茹滅之西破挹恒東走契丹北方戎狄悉歸之抗衡中夏木杆卒復舍其子大邏便而立其弟

是爲佗鉢可漢佗鉢時控弦數十萬中國憚之周齊爭結姻好及佗鉢卒國中將立大邏便以其母賤衆不服乃立菴羅爲嗣大邏便遣人辱之菴羅不能制因以國讓攝圖號伊利俱盧設莫何始波羅可漢一號沙鉢略治都斤山大邏便請曰我與爾俱可漢子各承父後爾今極尊我獨無位何也沙鉢略患之以爲阿波可漢還領所部其後阿波與沙鉢略有隙因分爲二漸以強盛東拒都斤西越金山東拒都斤西越金山西域諸胡悉附之是爲西突厥云後阿波爲東突厥葉護可漢所虜其國立鞅素特勒之子是爲泥利可漢泥利卒子達漫立號泥擲處羅可漢處羅居無恒處然多在烏孫故地復立二小可漢分統所部一在石國北以制諸胡國一居龜茲北其地名應娑官有俟發閭洪達以評議國事自餘

與東國同煬帝時東突厥啓民內附遣使慰諭處羅處羅遂遣使朝貢煬帝西巡召處羅會處羅辭以佗故煬帝怒會其酋長射匱來求婚因而誘之使襲處羅處羅敗走大業七年處羅與其弟闕達設及特勒大柰入朝煬帝分西突厥爲三部使闕達設將萬餘口居會寧大柰居樓煩從巡幸賜號爲曷薩那可漢隋敗歸唐封歸義郡王其後爲北突厥使者所殺初曷薩那之朝隋也其國人遂立薩那之叔父曰射匱可漢射匱者達頭可漢之孫達頭者沙鉢略之從父也射匱既立始開土宇東至金山西至海自玉門巴西諸國皆役屬之遂與北突厥爲敵乃建庭於龜茲北三彌山尋卒弟統葉護可漢立北并鐵勒西拒波斯南接蜀賓控弦數十萬據烏孫故地又移庭於石國北于泉東與頡利可漢爲敵西域諸國皆臣之葉

護各遣吐屯監之督其征賦武德初人貢於唐遣使請婚高祖許之未克婚其伯父殺之而自立是爲莫賀咄疾屈利俟毗可漢俟毗先爲小可漢及此彌大可漢國人不附弩失畢部共推泥孰莫賀設爲可漢泥孰不從國人乃奉統葉護之子肆葉護爲大可漢肆葉護卒國人迎泥孰於焉耆而立之是爲咄陸可漢亦彌大渡可汗遣使請降太宗賜以名號及鼓纛其族人步真舛望謀并其弟彌射乃自立彌射懼率處月等入朝而步真勢窮亦歸國其留者咄陸以射匱特勒劫越之子賀魯統之明年泥孰卒其弟同娥設立是爲沙鉢羅唃利失可汗俄而其國分爲十部每部令一人統之號爲十設每設賜以一箭故稱十箭焉又分左右廂左廂號五咄陸置五大啜右廂號五弩失畢置五大俟斤通謂之十姓至

是唃利失又衆心爲其統吐屯所襲麾下亡散唃利失奔其弟步利設與統吐屯等召國人將立欲谷設爲大可汗以利失爲小可汗統吐統爲人所殺欲谷設兵又爲其俟斤所破唃利失復得舊地十二年西部竟立欲谷設爲乙昆咄陸可汗咄陸旣立與唃利失大戰兩軍各死各引去因與唃利失中分自伊列河巴西屬咄陸已東屬唃利失咄陸可汗又建庭於鏃曷山西謂爲北庭自厥越失拔悉彌諸國皆臣之唃利失死國人迎其弟伽那之子薄布特勒而立之是爲乙昆沙鉢羅葉護可汗旣立建庭於睢合水北謂之南庭咄陸兵衆寢強擒殺葉護而并其國處月等又隸屬之處月居金娑山之陽蒲類之東有大磧名沙陀故號沙陀突厥云咄陸擊破吐火羅專擅西域遣兵寇伊川郭恪擊敗之咄陸又遣

處月處密二部兵圍天山郭恪擊走之進拔處月俟斤之城其國大亂部人謀廢咄陸遣使請立可汗太宗璽書立莫賀咄之子是爲乙毗射匱可汗咄陸西奔吐火羅射匱可汗遣使請婚太宗許之咄陸旣奔部落亡散初賀魯繼步真爲葉護居於多邏斯川統處密姑蘇歌羅祿失畢五姓之衆至是射匱可汗遣兵追逐賀魯不常厥居貞觀末乃率其部落內屬拜瑤也都督徙其部廷州之莫賀城處月朱耶闕俟斤阿闕亦請內屬招集離散廬帳漸盛聞太宗崩以其衆叛西擊射匱滅之自號沙鉢羅可汗勝兵數十萬處月及西域諸國多附之而朱耶孤注亦殺招慰使連和引兵據牢山於是射牌俟斤沙陀那速不肯從高宗以賀魯所領授之明年弓月道總管梁建方契苾何力引兵斬孤注俘九千人又明年

廢瑤池都督府卽處月地置金滿沙陀二州皆領都督賀魯亡安
顯慶二年蘇定方擊沙鉢羅獲之安撫大使阿史那彌射進軍次
伊麗水而處月來歸乃置崑陵濛池二都護府統咄陸部以彌射
爲興昔亡可汗統咄陸部步真爲繼往絕可汗統失畢部

太祖始祖曰金山

新唐書曰龍朔初以處月酋沙陀金山從武衛將軍薛仁貴討鐵
勒授墨離軍討擊使長安二年進爲金滿州都督累封張掖郡公
金山之子曰輔國

新唐書曰金山死輔國嗣先天初避吐蕃徙部北廷率其下入朝
開元二年復領金滿州都督封其母鼠尼施爲鄯國夫人輔國累
爵永壽郡王

輔國子曰骨咄支

新唐書曰輔國歿骨咄支嗣天寶初回紇內附以骨咄支兼回紇
副都護從肅宗平安祿山拜特進驍衛上將軍

卮言曰按五代史辨拔野古非後唐始祖而不載其五世相承事
今從唐書

骨咄支子曰盡忠

新唐書曰骨咄支死子盡忠嗣累遷金吾衛大將軍酒泉縣公至
德寶應間中國多故北庭西州閉不通朝奏使皆道出回紇而虜
多漁擷尤苦之雖沙陀之倚北庭者亦困其暴歛貞元中沙陀部
七千帳附吐蕃與北寇北庭陷之吐蕃徙其部於甘州以盡忠爲
軍大論吐蕃寇邊常以沙陀爲前鋒久之回鶻取涼州吐蕃疑盡

忠持兩端議徙沙陀於河外舉部愁恐盡忠與朱邪執宜謀曰我世爲唐臣不幸陷汚今若走蕭關自歸不愈於絕種乎盡忠曰善元和三年悉衆三萬落循烏德鞬山而東吐蕃追之及於石門關轉戰不解部衆略盡盡忠死之

盡忠子曰執誼唐時歷陰山府都督是爲同光初追尊曰懿祖

唐書曰盡忠戰死執宜哀癡傷士裁二千騎七百雜畜橐它千計款靈州塞節度使范希朝以聞詔處其部鹽州置陰山府以執誼爲府兵馬使沙陀素健鬪希朝欲藉以捍虜爲市牛羊廣畜牧休養之其童耄自鳳翔與元太原道歸者皆還其部盡忠弟葛勒阿波率殘部七百叩振武降授左武衛大將軍兼陰山府都督執誼朝長安賜金幣袍馬萬計特進金吾衛將軍然議者以靈武迫吐

蕃恐後反覆生變又濱邊益口則食翔貴頃之希朝鎮太原因沙陀舉軍從之希朝乃料其勁騎千二百號陰山北沙陀是時天子伐鎮州執誼以軍七百爲前鋒王承宗衆數萬伏木刀溝與執宜遇飛矢雨集執誼提軍橫貫賊陣鏖鬪李光顏等乘之斬首萬級鎮兵解進蔚州刺史王鐔節度太原建言朱邪族孳熾散居北川恐啓野心願析其族隸諸州勢分易弱也遂建十府以處沙陀八年回鶻過磧南取西城柳谷詔執宜屯天德明年伐吳元濟又詔執宜隸李光顏破蔡人時曲拔凌雲柵元濟平授檢校刑部尚書猶隸光顏軍長慶初伐鎮州悉發沙陀與易定軍椅角破賊深州執宜入朝留宿衛拜金吾衛將軍大和中柳公綽領河東奏陁北邊沙陀素爲九姓六州所畏請委執宜治雲用塞下廢府十一

料部人三千禦北邊號代北行營授執宜陰山府都督代北行營
隸河東節度

執誼子曰赤心改名國昌唐時歷代北節度使同光初追尊曰獻祖
唐書曰執誼死子赤心嗣開成四年回鶻徑磧口抵榆林塞宰相
掘羅勿以良馬三百遺赤心約共攻彰信可汗可汗死節度使劉
沔以沙陀擊回鶻於殺胡山久之伐潞誅劉稹詔赤心率代北騎
軍三千隸石雄爲前軍破石會關助王宰下天井合太原軍次榆
社與監軍使呂義忠禽楊弁潞州平遷朔州刺史仍爲代北軍使
大中初吐蕃合党項及回鶻殘衆寇河西太原王宰統代北諸軍
進討沙陀常深入寇諸軍赤心所向虜師披靡曰吾見赤馬將軍
火生頭上始沙陀臣吐蕃其左老右壯溷男女略與同而馳射趨
悍過之虜倚其兵常苦邊及歸國吐蕃繇此亦衰宣宗已復三州

七關征西戍皆罷乃遷赤心蔚州刺史雲州守捉使龐勛亂詔義
威康承訓爲行營招討使赤心以突騎三千從承訓兵絕渙水遇
伏墮圍中幾沒赤心以騎五百掀出之勛欲速戰衆八萬短兵接
赤心勒勁騎突賊與官軍夾擊敗之其弟赤衷以千騎追之毫東
勛平進大同軍節度使賜氏李名國昌預鄭王屬籍賜親仁里甲
第回鶻叩榆林擾靈監詔國昌爲鄜延節度使又寇天德乃徙節
振武進檢校司徒王仙芝陷荆襄朝廷發諸州兵討捕國昌遣劉
遷統雲中突騎逐賊數有功乾符三年段文楚爲代北水陸發運
雲州防禦使是時無年文楚股損用度下皆怨邊校程懷信王行
審蓋禹李存璋薛鐵山康君立等曹議曰世多難丈夫當投鏢立

功段公乃儒者難共計沙陀雄勁李振武父子勇冠軍我若推之無不應則代北唾手可定捨取富貴若何咸曰善乃夜謁國昌子雲中守使克用曰歲艱粟食削吾等不忍餓死家威德著聞請帥安部內克用許之募得士萬人趨雲州次鬪鷄臺城中執文楚至殺之據州以聞其克用爲大同防禦留後不許發諸道兵進捕諸道不甚力而黃巢方引度江朝廷度未能制乃赦之以國昌爲大同軍防禦使國昌不奉詔與克用合兵進擊寧武其後敗走達靼及黃巢入長安克用將沙陀兵討破之詔以國昌爲代北節度使丁未二月卒克用國昌之第三子

太祖國昌之第三子也母曰秦氏太祖以唐乾符五年戊戌據雲中壬寅將兵討黃巢癸卯收復長安甲辰進爵隴西王爲河東節度使

戊辰正月薨同光初追尊

莊宗皇帝存勗太祖長子母曹氏是爲真初嗣晉王癸未四月稱帝

於魏州九月入大梁遂滅梁在位三年始癸未四月終乙酉三月

明宗皇帝李嗣源莊宗養子

歐史曰明宗嗣源代北人生於應州之金城縣世本夷狄無姓氏初名邈佶烈以騎射事太祖爲人質厚寡言執事恭謹太祖養以爲子賜名嗣源四代祖聿天成初追尊號曰惠祖曾祖敖追尊號曰毅祖祖淡追尊號曰烈祖父霓追尊爲孝成皇帝初霓事國昌爲鴈門部將國昌之失振武爲吐渾所攻部衆離散霓獨奮忠義解蔚州之圍

明宗以丙戌二月將兵討鄴都反兵入大梁莊宗遇弒四月明宗入洛陽自立凡篡位八年自丙戌四月至癸巳十二月

通鑑莊宗同光四年丙戌春二月鄴都軍亂擁趙在禮爲帥莊宗遣李紹榮招諭之紹榮至鄴都攻其南門賊壁守無降意乃遣嗣源將親軍討之嗣源至鄴都軍士擁之入城與在禮合勢嗣源詭說在禮出收兵乃奔相州李紹榮退保定州奏嗣源合嗣源遣使上章自理皆爲紹榮所遏不得通遂引兵向大梁莊宗如關東嗣源入大梁莊宗乃還復如汜水爲伶人郭從謙所弒嗣源遂入洛陽自爲監國殺劉后及諸王時莊宗子魏王斷岌自征蜀還至長安留守張錢拒之繼岌自殺於是有司議卽位禮李紹真孔循以爲唐運已盡宜自建國號明宗問左右何謂國號對曰先帝賜姓

於唐爲唐復讐繼紹宗後故稱唐今梁朝之人不欲殿下稱唐耳明宗曰吾年十三事獻祖獻祖以吾宗屬視吾猶子明宗亦沙陀種故云

又事武皇垂三十年先帝垂二十年經綸攻戰未嘗不預武皇之基業則吾之基業也先帝之天下則吾之天下也安有回家而異國乎令執政更議吏部尚書李琪曰若改國號則先帝遂爲路人梓宮安所託乎不惟殿下忘三世舊君吾曹爲人臣者能自安乎前代以旁支入繼多矣多用嗣子樞前卽位之禮衆從之於是明宗服斬衰於樞前卽位旣而御衮冕受冊綱目唐主嗣源立會編李嗣源自稱唐帝胡氏曰李琪之言似也然國亡君弒子不得立而他人是保人臣心不自安尙有大於此者乎

綱目丙戌後唐同光四年成元夏四月唐伶人郭從謙弒其主存勗李嗣源

入洛陽監國殺劉后及諸王唐魏王繼岌至長安自殺唐主嗣源立。

胡氏書法曰書郭從謙弒其主然後書嗣源入洛陽書魏王自殺然後書嗣源立皆順辭也綱目於嗣源多恕辭則亦亮其無利之之心耳

尹氏曰綱目於非正統之君其子嗣位書立嗣源立非唐主意而以唐主立書之豈非以嗣源於五代主中之彼善於此故恕之歟五代史於此不書其立而以稱帝書明其不得以嗣莊宗之位也况前既書其反乎何則五常之中君臣獨謂之義臣之事君獨謂之忠義者斷制之宜忠者心無不盡之謂也嗣源本夷種李克用養以爲子賜以姓名附之屬籍莊宗嗣位委以重

任付以兵權君臣之分素定一旦爲亂兵所脇不得已而入亂城幸而以計得出單騎歸朝明其本心可也却乃回翔不進及夫車駕東出又不卽赴行在趨拜道左公然擁兵亟趣汴州以爭先奪利車駕之還又不護送且以兵踵之所謂斷制之義盡心之忠安在哉假使嗣源之心實出避禍一聞莊宗被弒當卽日揚旗西指以討罪人傳檄四方遣使西迎魏王奉請劉后臨朝以俟嗣君之至顧乃遽然居太子監國之位布置私人以掌樞機殺害國母以及親王魏王聞之安得不自殺雖曰自殺其與嗣源殺之也無異此五代史所以書其反又書其絕矣或曰五代史亦有所據歟曰觀明宗欲殺元行欽責之曰我兒何負於爾行欽曰先帝何負於爾歐陽子謂行欽誠節有足嘉者則

明宗逆節有足惡者不言可知矣不特此也綱目引胡氏論李琪諫改國號臣心不安之言亦謂國亡君弑子不得立而他人是保是亦不滿於明宗之立也史雖委曲爲之開說若明宗有若不得已焉者嗚呼史豈皆實哉按莊宗實錄潞王時宰相姚顛脩至宋薛居正等采以爲正史司馬公又據正史以爲通監其所書者果得其實否乎雖然其明白昭著者亦自有不容掩焉者歐陽氏作史時去五代未遠其必有所據矣

卮言曰宋人多取李嗣源天生聖人之語故恕其反而錄其賢後世亦因而賢之嗚呼嗣源以反兵內向以養子奪宗既逼其主於死地矣又不留其遺胤此而可恕則亂臣賊子孰不可恕者彼以夷亂華以篡得國心不自安而年衰子弱雖偷安於天

位亦知其終不可保也故爲宮中之祝以惑人若已無利天下之心云耳使聖人真應祝而生則當如漢祖之起於匹夫唐宗之興自藩邸胡令宋祖生於亂朝而卒襲季世之跡乎考宋祖之生在丁亥年嗣源篡位甫二年耳是歲方用漢光武故事立親廟未見其謙讓也卽使自度不類而爲祝聖之語亦必在其末年之世而宋祖固已生矣或年代不遠而范質王溥輩湊合爲諛辭耶後世遂以此恕其篡逆至比之明主輒曰綱目取之又謂綱目亮其無利之之心不知綱目云引兵向大梁又云殺劉后及諸王書法亦自嚴也雖不書反而反義自見尹氏之發明備矣

愍帝從厚明宗第五子也母夏氏是爲昭懿皇后嗣位自四十五日爲潞王

從珂所廢自癸巳十二月至甲午三月

末帝李從珂明宗養子

歐史曰廢帝從珂鎮州平山人也本姓王氏其世微賤母曰魏氏少寡明宗爲騎將過平山掠得之魏氏有子珂三已十餘歲明宗養以爲子名曰從珂

從珂初封潞王爲鳳翔節度使長興甲午春舉兵反夏入洛陽廢愍帝而自立凡篡位三年

綱目癸巳

唐長興八年

春三月唐立子從珂爲潞王甲午春正月唐以潞

王從珂爲河東節度使從珂舉兵鳳翔唐遣兵討之官軍降潰夏四月唐潞王從珂入洛陽廢其主從厚爲鄂王而自立

尹氏曰五代史書從珂反而綱目止書舉兵何哉是時朱馮用

事擅易藩鎮以至召亂其曲亦有所分爾然從珂雖不書反而書遣兵討之則其罪著矣

右後唐四主三姓共一十四年始癸未終丙申

卮言曰唐自李克用得軍中騎將養以爲子卒賴其力以成霸業莊宗踵其轍而不戒其禍取梁未幾而挈兵柄以授養兒朱耶之族已隨朱氏而俱滅矣卯翼之恩安在哉然嗣源以養子負莊宗而殄其世從珂亦以養子負明宗而殄其世作俑效尤若合符券故君子觀於五季之事而信天道報應之不爽云

晉世章

高祖皇帝石敬瑭其先本出於西夷

舊史曰晉高祖姓石氏晉陽人本衛大夫碯之後至漢奮自河內

徙家長安時號萬石君漢袁關輔亂子孫流泛西裔有居甘州者
歐史曰石敬瑭其父臬捩鷄本出於西夷自朱邪歸唐從朱邪入
居陰山其後晉王李克用起於雲朔之間臬捩雞以善騎射常從
晉王征伐有功官至洛州刺史臬捩雞生敬瑭其姓石氏不知其
得姓之始也

四代祖名璟唐時歷朔州刺史天福中追尊諡曰靜祖

舊史曰璟以唐元和中與沙陀軍都督朱邪氏靈武入附憲宗嘉
之隸爲河東陰山府校以邊功累官至朔州刺史

三代祖名柳天福中追尊曰肅祖

祖名昱天福中追尊曰睿祖孝平皇帝

舊史曰昱任振武防禦使贈尚書右僕射

父名紹雍番語曰臬戾雞後唐時歷洛州刺史天福中追尊曰憲祖
孝元皇帝

舊史曰憲祖善騎射有經遠大略始從後唐太祖平定巢賊及事
莊宗拒梁人戰上黨栢人討薊門有功功與周德威相亞德威鎮
薊莊宗承制授平州刺史行事多抗於德威德威憚其名嘗以禮
下之俄改洛州刺史薨於任贈太傅天福中追尊孝元皇帝廟號
憲祖高祖其第二子也母曰何氏

高祖初妻唐明宗女累立軍功廢帝清泰元年甲午爲河東節度使
封趙國公丙申五月唐以高祖爲天平節度使移鎮高祖拒命遣使求
救於契丹十一月契丹立爲晉皇帝十二月唐主從珂自焚死高祖
入洛陽壬寅六月殂在位七年

出帝重貴高祖從子在位四年

歐史紀曰出帝重貴父曰敬儒高祖兄也為唐莊宗騎將早卒高祖

時贈太傅天福中追封宋王母曰安氏封秦國夫人出帝尊為皇太妃初封鄭王徙齊王高祖

六子五皆早死而重睿幼故重貴得立

又家人傳曰晉氏始出夷狄而微終為夷狄所滅故其世次不能究見其可見者高祖有二叔曰萬友萬銓一兄曰敬儒六弟曰敬威敬德敬殷敬贊敬暉重胤七子曰重貴重信重義重英重進重睿重杲睿祖生憲祖及萬友萬銓萬友生敬威敬贊萬銓生敬暉而敬儒敬德重胤皆不知其於高祖為親疎也高祖憲祖第二子也而敬儒為兄疑其長子也則於高祖屬長而親然贈官反最後於諸弟而高祖世獨不得追封此又可疑也重胤高祖弟也亦不知其為親疎然高祖愛之養以為子故於名加重而下齒諸子高祖叔兄與弟敬殷子重進皆前即位卒而敬威敬德重胤重英高祖反時死高祖少子曰馮六未名而卒而舊說以重睿為幼子者非也

右晉二主凡二世共十一年起丙申盡丙午

漢世章

高祖皇帝姓劉氏初名智遠後更名高

歐史曰高祖其先沙陀部人後世居於太原四代祖湍追尊為

皇帝廟號文祖曾祖昂追尊號曰德祖祖僕追尊號曰翼祖父璵

事後唐太祖為列校追尊號曰顯祖高祖即顯祖之子也母曰安

氏追諡章懿皇后

高祖與晉高祖俱事唐明宗爲偏將後爲晉祖佐命元功天福辛丑
爲河東節度使出帝時累封北平王甲辰將兵禦契丹屯樂平不進
丁未正月契丹入晉出帝北遷乃稱帝於晉陽更稱天福十二年六
月入大梁始改國號曰漢七月改元戊申正月殂在位二年

隱帝承祐高祖第二子也母曰李后是爲昭聖皇后在位三年爲郭威所滅

自戊辰二月盡庚戌十一月

右漢二主凡二世共四年始丁未終庚戌

周世章

太祖皇帝姓郭氏名威邢州堯山人

舊史曰周太祖姓郭氏或云本常氏子隨母適郭氏故冒其姓

四代祖名璟廣順初追尊爲皇帝廟號信祖

三代祖名諶廣順初追尊曰僖祖

舊史曰唐咸通中代北徐方用兵信祖僖祖從戎師接戰以勇敢
知名

祖名蘊廣順初追尊曰義祖

舊史曰義祖事後唐武皇爲帳中親信乾寧中從征澤潞邢洛累
授河內馬步軍都虞侯武皇平安正思再定邢洛移授邢洛軍使
因卜居堯山縣

父名簡後唐時歷順州刺史廣順初追尊曰慶祖

舊史曰後唐武皇經啓霸圖觀軍大鹵劉仁恭陸梁燕薊窺伺中
原梁氏蠶食河西干戈不息慶祖爲武皇牙內受將專領親軍攻
城野戰功勳崇高天復中武皇兵出居庸山北克捷以慶祖爲順

州刺史

歐史曰威父簡事晉為順州刺史劉仁恭攻破順州簡見殺母曰王氏威少孤依潞州人常氏潞州留後李繼韜募勇士為軍卒威年十八應募累遷侍衛軍吏漢祖尤親愛之

太祖初從漢高祖起太原以佐命功拜樞密副使戊申受顧命輔隱帝為樞密使庚戌四月為鄴都留守十一月舉兵隱帝被殺太祖入朝自為監國辛亥正月篡漢禰帝制曰朕周室之裔號叔之後國號宜曰周改元廣順癸丑正月殂在位四年

世宗皇帝榮本姓柴氏邢州龍岡人也父曰守禮初以后族拜光祿大夫世宗時官至太祖故夫人柴氏是為聖穆皇后守禮之妹柴氏無子世宗幼從姑長太祖家以謹厚見愛太祖遂以為子初封晉王太祖殂遂嗣立在位六

年自癸丑正月

恭帝宗訓世宗第四子也母曰符氏是為宣懿皇后在位一年為宋所滅自

戊午六月盡

巳未正月右周二姓三主共九年

歐史家人傳曰嗚呼家人之道不可以不正也夫禮者所以別嫌而明微也甚矣五代之際君君臣臣父父子子之道乖而宗廟朝廷人鬼皆失其序斯可謂亂世者歟自古未之有也唐一號而三姓周一號而二姓唐太祖莊宗為一家明宗愍帝為一家廢帝為一家周太祖為一家世宗為一家別其家而同其號者何哉唐從其號見其盜而有之也周從其號與之也而別其家者昭穆親疎之不可亂也號可同家不可以不別所以別嫌而明微也



國家圖書館, NATIONAL CENTRAL LIBRARY, TAIWAN, R.O.C.

學海君道部卷之十六

世系類

十六

閏位世次

四

二北朝篇

庖言曰遼金起自外夷其盛時至據中原東北與宋稱兄弟朝者數世亦號北朝

遼世章

遼之先曰鮮卑別爲奚契丹

遼紀曰遼之先鮮卑也鮮卑之部別爲契丹隋唐之際契丹之君號大賀氏

世表曰考之宇文周之書遼本炎帝之後而耶律儼稱遼爲軒轅

後儼志晚出蓋從周書蓋炎帝之裔曰葛烏菟者世雄朔垂後為

冒頓可汗所襲保鮮卑山以居因號鮮卑

漢書冒頓可汗以兵襲東胡滅之餘眾保鮮卑

山因號鮮卑

魏青龍中部長比能稍桀驁為幽州刺史王雄所殺眾遂

散徙潢水之南黃龍之北晉時葛烏菟之後曰普回普回有子莫

那自陰山南徙始居遼西九世為慕容晃所滅部眾散處松漠之

間曰宇文

是為後周

曰庫莫奚曰契丹其後稍大居和龍之北數百里

元魏獻文時使莫弗紇何辰質獻得交市於和龍密雲之間太和

中契丹畏高麗之侵莫弗賀勿於率眾內附止於白狼水東北齊

天保中契丹犯塞文宣帝敗之青山復為突厥所逼又以萬家寄

處高麗境內隋開皇中率諸莫弗賀悉眾款塞文帝納之聽居故

地其後諸部相攻不已又與突厥相侵文帝使使諭解之別部出

伏等背高麗率眾內附文帝置於渴奚那頡之北開皇末別部四

千餘背突厥來降文帝方與突厥和好給糧遣還回辭不去部落

漸眾遂北徙逐水草當遼西正北二百里依紇臣水而居分為十

部兵多者三千少者千餘與兵則合符契突厥沙鉢略可汗遣吐

屯潘埜統之契丹殺吐屯契丹之類其南者為契丹其北者為室

韋分為五部不相總一突厥常以三吐屯總領之唐初契丹東距

高麗西與奚接南至營州北室韋阻冷陁山以自固射獵居處無

常其居大賀氏有勝兵四萬析八部臣於突厥以為俟斤凡調發

攻戰則諸部畢會獵則部得自行與奚不平每鬪不利輒遁保鮮

卑山風俗大略與突厥同

綱目唐太宗貞觀二十二年冬十一月奚契丹內屬

世表曰武德中其君長俱遣人來朝而或小入寇邊其後遣使者上名馬豐貂貞觀中太宗伐高麗悉發契丹奚首領從軍還過營州以其長窟哥爲左武衛將軍大會辱統主未幾窟哥舉部內屬乃置松漠都督府以窟哥爲都督封無極男賜姓李氏以其八部爲十州俱隸松漠府卽以辱統主爲之刺史窟哥死其孫曰盡忠爲武衛大將軍松漠都督嗣聖中盡忠與誠州刺史孫萬榮等舉兵殺都督趙文翹據營州以叛盡忠自稱無上可汗推萬榮爲帥攻陷崇州武后遣曹仁師等二十八將擊之萬榮敗走盡忠死突厥默啜襲破其部武后復發大兵擊之萬榮兵潰其奴斬其首以降餘衆降於突厥開元初盡忠從父弟都督失活以默啜政衰率部落來歸玄宗賜丹書鐵券復置松漠府以失活爲都督封松漠

郡王授左金吾衛大將軍仍於其府置靜析軍以失活爲經略大使八部長皆爲刺史以楊氏女爲公主以妻之明年失活死玄宗以其弟中郎將娑固襲封及所領有可突於者爲靜析軍副使悍勇得衆娑固欲去之未決可突於反攻沙固沙固敗死可突於奉沙固從父弟鬱於爲君遣使者謝罪有詔卽拜鬱於松漠郡王而赦可突於有隙來奔封遼陽郡王留宿衛可突於奉盡忠弟邵固統衆詔許襲王玄宗封禪太山邵固以從行改封廣化郡王以陳氏女爲公主妻之其後可突干殺邵固立屈烈爲王脅奚衆共降突厥唐兵屢爲所敗

綱目玄宗開元二十二年冬十二月幽州節度使張守珪斬奚契丹王屈烈及可突干

通鑑可突于連年爲邊患幽州節度使張守珪屢擊破之可突于
困迫遣使詐降守珪使管記二悔就撫之悔至而契丹初無降意
密遣人引突厥謀殺悔悔知之以牙官李過折與可突于爭權不
協說使圖之過折夜勒兵斬屈烈及可突于帥衆來降詔以爲契
丹王

世表曰過折斬可突于及屈烈自歸詔封過折爲北平郡王松漠
都督其年過折爲可突于餘黨涅禮所殺自此契丹中衰大賀氏
附庸於奚王以通於唐朝貞歲至

始祖曰涅禮唐開元中爲松漠都督

綱目開元二十三年冬十二月以契丹涅禮爲松漠都督

通鑑李過折爲涅禮所殺上赦涅禮因以爲都督且賜書責之曰
卿之蕃法多無義於君長過折卿之王有惡輒殺爲此王者不亦
難乎卿今爲王亦應防慮

本紀涅里初爲迭刺部長自過折代屈烈爲君大賀氏遂微涅里
滅過折而立廸輦組里爲阻午可汗更號遙輦氏涅里遂爲其夷
離謹掌刑府焉

贊曰遼之先出自炎帝世爲審吉國其可知者蓋自奇首云奇首
生都菴山徙居潢河之濱傳至雅里始立制度置官屬刻木爲契
穴地爲牢讓阻午而不肯自立

世表曰廸輦組里本八部大師天寶四年降唐拜松漠都督賜姓
名李懷秀安祿山表請討契丹懷秀發兵十萬與祿山戰潢水南
自是兵連不解耶律儼紀云太祖四代祖耨里思爲迭刺部夷離

謹遣將只里姑括里大敗安祿山於潢水適當懷秀之世則懷秀固遙輦氏之首君爲阻午可汗明矣

又曰蕭韓言先世遙輦可汗注之後國祚中絕自夷離謹雅里立阻午可汗大今以唐史遼史參考大賀氏絕於邵固雅里所立則懷秀也其間惟屈列過折二世屈列乃可突干所立過折以別部長爲雅里所殺唐史稱泥里爲可突干餘黨則注可汗者殆爲屈列耶

卮言曰綱目以涅里爲契丹王而遼史謂涅里讓阻午而立廸輦俎里涅里但爲夷離謹

雅里曾孫曰耨里思追諡肅祖

本紀曰雅里生毗喋毗喋生頽頽頽生耨里是爲肅祖

贊曰肅祖大度寡欲令不嚴而人化

耨里思之子曰薩刺德追諡懿祖

贊曰懿祖嘗與黃室韋挑戰矢貫數札

薩刺之子曰勻德追諡玄祖

贊曰玄祖嘗始教民稼穡善畜牧國以殷富

勻德之子曰撒刺的追諡德祖

贊曰德祖仁民愛物始置鐵冶教民鼓鑄

世表曰自李懷秀殺唐公主以叛唐更封楷落爲恭仁王代松漠都督逐穰契丹王其後寢大降附迄於貞元常間歲修藩禮唐以其附回鶻不復官爵會昌中回鶻破契丹王屈戌始復內附拜雲麾將軍是爲耶瀾可漢幽州節度張仲武爲奏易回鶻所與舊印

賜唐新印曰奉國契丹之印咸通中契丹王習爾是爲巴刺可漢再遣使貢獻部落寢強習爾死族人欽德嗣王是爲痕德謹可漢光啓時天下盜起北方多故欽德乃鈔奚室韋小小部種皆後服之因入寇幽薊數與劉仁恭相攻劉守光戍平州契丹以萬騎入守光僞與和帳飲具於野伏發禽其大將羣胡慟願納馬五千以贖不許欽德輸重賂求之乃與盟十年不敢近邊欽德晚年政衰八部大人法常三歲代迭刺部太祖建旗鼓自爲一部不肯受代自號爲王盡有契丹國遙輦氏遂亡自雅里以至德祖世爲遙輦氏之夷離謹左右懷秀楷落至於屈戍幾一百年太祖勃興號世里氏世里氏與大賀氏遙輦氏號三耶律此其世族之可知者也其所不可知者有若奇首可漢胡刺可漢蘇可漢昭古可漢皆遼之先而世次不可考矣

本紀贊曰遼自雅里以至德祖世爲契丹遙輦氏之夷離謹執其政柄德祖之弟述瀾北突於厥室韋南略易定奚霫始興板築置城邑教民種桑麻習織組已有廣土衆民之志而太祖受可漢之禪遂建國東征西討如折枯拉朽東自海西至於流沙北絕大漠信威萬里歷年二百豈一日之故哉

太祖皇帝名阿保機姓耶律氏撒刺的之子母蕭氏

本紀曰太祖皇帝諱阿保機姓耶律氏契丹迭部霞瀨益石烈鄉耶律彌里人

遼史國語解曰本紀首書太祖姓耶律氏繼書皇后蕭氏則有國之初已分二姓矣有謂始興之地曰世里譯者以世里爲耶律故

國族皆以耶律為姓自謂述律皇后兒子名蕭翰其妹復為后故后族皆以蕭為姓其說與紀不合故陳大任不取又有言以漢字書者曰耶律蕭以契丹字書者曰移刺石抹則亦無可考矣

太祖以梁貞明二年丙子十二月稱帝如迂王集丁亥七月卒在位十一年

卮言曰遼雖夷也然起自沙漠而建國於唐末稱帝於梁初乘時而興與拓跋魏同非有叛逆也書法同前

義宗皇帝名倍太祖長子母淳欽皇后蕭氏神冊初立為皇太子天顯初克忽漢城改其國曰東丹以倍為人皇王王之太祖殂皇后攝軍國事屬意太宗倍請於后而立之太宗立而見疑遂出奔後唐為後唐所害重熙中追尊號

太宗皇帝名德光太祖第二子義宗母弟也太祖殂母意屬太宗義

宗讓而立之丁酉十二月改國號曰遼在位二十年自丁亥十一月至丙午四月

世宗皇帝名阮太祖之孫義宗之長子母蕭氏初封永康王太宗殂於藥城趙延壽自稱權知國事阮以兵執之而自立在位四年為察

割所弒自丙午四月至庚戌九月

穆宗皇帝璟太宗長子母蕭后在位十八年為近侍所弒自庚戌九月至戊辰

三

景宗皇帝賢世宗第二子母蕭后在位十四年自巳巳二月至壬午九月

聖宗皇帝隆緒景宗長子母蕭后在位四十九年自壬午九月至辛未六月

興宗皇帝宗直聖宗長子母曰蕭宮人耨斤嫡母齊天皇后蕭氏無子取養為子嗣立在位二十四年自辛未六月至乙未八月

道宗皇帝洪基興宗長子母蕭后在位四十六年自乙未八月至辛巳正月

順宗皇帝濬道宗長子母蕭后初為皇太子總領朝政姦臣耶律

乙辛忌之誣后賜死而使盜殺濬乾統初追尊號

末帝延禧道宗之孫順宗之子順宗事明延禧得為燕王道宗殂延

禧嗣位號曰天祚皇帝在位二十四年滅於金自辛巳正月盡乙巳二月

右遼九主凡九世共一百五十年始丙子終乙巳

尹氏綱目發明曰春秋吳楚之君書其卒不書其葬者所以避其號也契丹改國號遼蓋欲與中國等耳然綱目雖紀其改號之始繼是亦止以契丹書之正以存其本國之名不使之得與中國並也其旨嚴矣

臣言曰綱目於五胡僭號皆因其國名書之而獨契丹只書舊

號絕之於中國預為宋惡也然亦因其後又嘗改號契丹云爾夷狄得志蓋乘亂而興豈在國號且遼起遐荒世有幽冀晉宋之間交聘爭長稱南北朝曷嘗不從其國號乎况遼取賓鐵為號與契丹何以異焉史直書遼如春秋荆楚之例可矣作宋史者各從其所自號為是如金氏丘氏所書契丹女直蒙古皆本朱子之意而失之者也聖宗隆緒嗣位後國號曰大契丹道宗清寧十二丙午復改號曰遼

金世章

金之先曰女真

本紀曰金之先出靺鞨古肅慎國也東漢謂之挹婁元魏謂之勿吉魏時朝貢不絕其地東至於海西接突厥南界高麗北鄰室韋邑落各自有長不相總一凡有七種曰粟末部曰伯咄部曰安車

骨部曰拂涅部曰號室部曰黑水部曰白山部隋稱之曰靺鞨七部勝兵並不過三千或附於高麗或臣於突厥而黑水靺鞨最處北方尤稱勁健其白山部素附高麗唐李勣破高麗取平壤其衆多入於唐汨咄安居骨等部亦皆奔散寢無聞焉惟遺人并入粟末粟末保東牟山後爲渤海稱王傳十有餘世姓大氏黑水靺鞨居肅慎地完強分十六部部又以南北爲柵武德貞觀中渠長阿固郎臣附以其地爲燕州太宗伐高麗其北部反與高麗合高惠真等率衆援安市每戰靺鞨常居前太宗破安市執惠真收靺鞨兵三千餘悉坑之開元十年其長倪屬利稽來朝玄宗卽拜勃利州刺史於是安東都護薛泰請置黑水府以部長爲都督刺史朝廷爲置長史監之賜府都督姓李氏名獻誠以雲麾將軍領黑水

經略使隸幽州都督勃海王武藝疑黑水與唐通謀不利於已其弟門藝擊之門藝固諫武藝怒召而欲殺之門藝懼罪歸唐武藝尋死黑水之兵亦寢其後勃海盛強黑水役屬之而朝貢遂絕五代時遼盡取渤海地而黑水靺鞨附屬於遼其在南者藉遼號熟女真在北者不在遼籍號生女真生女真地有按出虎河有長白山有混同江又名黑山龍江所謂黑山白水是也本名女真其後避遼主宗真之諱又曰女直宋初太宗時請兵伐遼不從遂不通使而歲貢於遼不絕

宇文金志曰金國本名朱里蕃語古音訛爲女真或曰慮真避遼主名又曰女直肅慎氏遺種渤海之別族也或曰三韓辰之後孛氏於北地中最微且賤唐貞觀中靺鞨來中國始聞女真之名世

居混同江之東長白山下其山乃鴨綠水源南鄰高麗北接室韋
西界渤海鐵離東瀕海唐所謂黑水靺鞨者其地也即今女真其
水掬之則色微黑遼目爲混同江居江之南者謂之熟女真以其
服屬契丹也江之南者謂之生女真亦臣服於契丹後有酋豪受
宣命爲首領號太師

又曰契丹乘唐衰并吞諸蕃三十六女直在其中契丹恐女直爲
患誘豪右數千家處之遼陽之南而著籍焉分其勢使不得與本
國通謂之合蘇隸自咸州東北分界入宮口主東沫江中間所居
之女真咸隸兵馬司與其國往來無禁謂之回霸合蘇隸者熟女
真也回霸者非熟女真亦非生女真也抵陵而野居者謂之黃頭
女真又居東沫江之北寧州江之東地方千餘里人戶十餘萬無
大君長亦無國名止是族帳散居山谷間自推豪傑爲首長小者
千戶大者數千戶則謂之生女真蓋七十二部落之一也僻處契
丹東北隅臣屬一百餘年

卮言曰按通鑑諸史女真之先居古肅慎地元魏時謂之勿吉隋
唐謂之靺鞨姓挈又號完顏氏於夷狄中最微唐貞觀中靺鞨來
朝自是中國始聞其名開元中其酋來朝拜爲勃利州刺史遂置
黑水部以部長爲都督朝廷爲置長史監之五代時始號女真後
唐天成丙戌契丹主阿保機天贊五年也契丹主擊女真及勃海
拔勃海夫餘城爲東丹國使其長子居之女真之在南者繫籍於
契丹號熟女真其在北者不籍於契丹號生女真僻處契丹東北
隅至宋太祖建隆辛酉契丹主兀律之天祿十年也女真以馬入

貢於宋宋詔蠲登州沙門島居民租賦令專治舟船渡其所貢馬
壬戌癸亥復遣使貢馬乾德甲子開寶己巳庚午俱貢馬及貂皮
太宗太平興國辛巳女真來朝淳化辛卯契丹主聖宗隆緒之統和
十年也女真首領野里鷄等上言契丹怒其朝貢中國置三柵於
海岸每柵置兵三千絕其貢獻之路乞發兵共平三柵太宗但降
詔撫諭而不爲發兵真宗大中祥符庚戌契丹征高麗道由女真
女真復與高麗合兵拒之天禧己未女真復遣使至宋自天聖後
沒屬契丹不復入貢女真避遼主宗真諱又改號曰女直云

始祖名亟普始居完顏部號完顏氏天會中追尊爲始祖景元皇帝
本紀曰始祖諱亟普初從高麗來年已六十餘矣兄阿古迺好佛
留高麗不肯從曰後世子孫必有能相聚者吾不能去也始祖獨

與弟保活里至完顏部始祖居僕幹水之涯保活里居耶懶阿古
迺之後曰胡十門事遼爲曷蘇館人後歸太祖自言其遠祖兄弟
三人同出高麗故不從遼而來降之云及太祖敗遼兵於境上獲
耶律謝十又使梁福幹荅刺招諭渤海人曰女直渤海本同一家
蓋其初皆勿吉之七部也始祖至完顏部居久之其部人嘗與它
族相殺交鬪不解完顏部人謂始祖曰若能爲我解此怨部有賢
女年六十而未嫁當以相配仍爲同部始祖曰諾迺自往諭之曰
殺一人而鬪不解損傷益多曷若止誅首亂者一人部內以物納
償汝可以無鬪而且獲利焉怨家從之乃爲約曰凡有殺傷人者
徵其家人口一馬十偶犝牛十黃金六兩與所殺傷之家卽兩解
不得私鬪曰謹如約女直之俗殺人償馬牛三十自此始於是六

十之婦歸於始祖并得其貲後生二男長曰烏魯次曰斡魯遂爲完顏部人

洪皓松漠紀聞曰金主九代祖名龔福

又曰女真酋長乃新羅人號完顏氏完顏猶漢言王也女真以其練事後隨以首領讓之兄弟三人一爲熟女真酋長號萬戶其一適他國完顏年六十餘女真妻之以女生二子其長卽胡來也自此傳三人至楊哥

丞普之子曰烏魯天會中追尊爲德皇帝

烏魯之子曰跋海天會中追尊爲安皇帝

跋海之子曰綏可天會中追尊爲獻祖定昭皇帝

本紀曰黑水舊俗無室廬負山水坎地梁木其上覆以土夏則逐水草以居冬則入處遷徙不常獻祖乃徙居海古水耕墾樹藝築室以居人呼其地爲納葛里納葛里者漢語居室也再徙安出虎水遂定居焉

綏可之子曰石魯天會中追尊爲昭祖成襄皇帝

本紀曰昭祖剛毅質直國中無書契約束不可檢制昭祖稍立條教諸部不悅欲執而坑之叔父謝里忽曰吾兒子必能承家此輩柰何殺之亟往彎弓注矢射於衆中劫執者皆散走昭祖乃得免遼以惕隱官之諸部猶以舊俗不肯用條教昭祖耀武至於青嶺白山順者撫之不從者討伐之入於蘇濱耶懶之地所至克捷還經僕鶯水僕鶯漢語惡瘡也昭祖惡其名不肯止行至姑里甸得疾迨夜將就寢而盜至遂行至逼刺紀村止焉是夕卒載柩而行

遇賊於路奪柩去部衆追還加古部人蒲虎復來襲之垂及蒲虎問諸路人曰石魯柩去此幾何其人曰遠矣追之不及也蒲虎遂止於是乃得歸葬焉生女直之俗至昭祖時稍用條教民頗聽從尚未有文字無官府不知歲月晦朔是以年壽脩短莫得而考焉石魯子曰烏古迺爲遼女真部節度使天會中追尊景祖惠桓皇帝本紀曰自始祖至景祖已六世矣景祖稍役屬諸部自白山耶悔統門耶懶土骨論之屬以至五國之長皆聽命焉而遼之邊民亦時有來歸者

卮言曰女真自烏古迺始役屬諸部遂領使節續綱但書其卒宋史女真至烏古迺能役屬諸部會遼五國蒲聶部節度使拔乙門叛遼迺將致討烏古迺恐遼兵深入得其山川險易或將圖之

乃告遼曰彼可計取也若用兵必將走險非歲月可平也遼從之

烏古迺因襲而擒之獻於遼主遼主聖宗隆緒召見燕賜加等以爲生

女真部節度使始有官屬紀綱漸立然不肯受印繫遼籍其部內

舊無鐵鄰國有以甲冑往鬻者必厚價售之得鐵既多因以修弓

矢備器械兵勢稍振前後願附者衆

綱目宋神宗熙寧七年遼道宗咸雍十年甲寅冬十二月遼女真部節度使烏

古迺卒

宋史遼五國沒撚部謝野勃謹復叛遼烏古迺伐之謝野敗走烏

古迺將見遼邊將自陳敗謝野之功行次來流水疾作而死

本紀曰景祖爲人寬恕能容物平生不見喜愠推財與人分食解

衣無所吝惜人或忤之亦不介意部衆降者錄其歲月姓名卽遣

去俾復其故人以此益信服之

烏古迺次子曰劼里鉢嗣節度使天會中追尊諡爲世祖聖武皇帝
通鑑曰劼里鉢嚴重多智每戰未嘗被甲襲位之初內外濱叛劼
里鉢乃因敗爲功變弱爲強遂破桓被散達烏春窩謀罕建官屬
統諸部基業始大

本紀曰女直之俗諸子長各異居景祖知世祖能成大事而四子
頗刺淑五子盈歌俱有勇略謂長子劼者三子劼孫柔可治家
務乃以劼者與世祖同居劼孫與頗刺淑同居劼者劼孫復與
外事故景祖卒世祖襲節度使叔父跋黑景祖異母弟也有異志
世祖慮其爲變不使將兵跋黑遂誘桓被散達烏春等部爲亂間
數年桓被散達與烏春舉兵來攻烏春兵在北桓被兵在南其勢

甚盛世祖自拒烏春而遣肅宗拒桓被戒之曰可和則與之和否
則決戰肅宗兵敗會烏春以久兩解去世祖乃以偏師涉舍狼水
經貼割水覆桓被之家還與肅宗會而肅宗兵又敗矣世祖使人
議和桓被索我名馬不許桓被大會諸部來攻世祖往禦之是時
跋黑已死世祖遣肅宗求援於遼遂率衆出使辭不失取海姑兄
弟兵已而知其貳於桓被也欲并取其衆徑至海姑偵者報曰敵
已至將戰世祖戒辭不失曰汝先陣於脫豁改原待吾三揚旗三
鳴鼓卽棄旗決戰死生惟在今日使裴滿胡牽大紫騮馬以爲貳
馬馳至陣軍吏憚桓被之強皆植立無人色世祖如常亦不加責
讓但今士卒解甲少憇以水沃面調麪水飲之頃之訓勵軍勢復
振世祖密與穆宗名盈言曰今日之事有勝而已萬一不勝吾必

無生汝今介馬遙觀而預戰事我死女勿復顧亟馳告汝兄頗淑
刺於遼擊籍受印乞師以報此讎語畢韋弓提劍三揚旗三鳴鼓
棄旗搏戰突入敵陣衆從之辭不失從後奮擊大敗之乘勝逐北
死者如什麻破多吐水水爲之赤棄車甲馬牛軍實盡獲之世祖
曰今日之捷非天不及此乃引軍還視其戰地馳突成大路闊且
三十隴年殺九人自相重積人皆異之桓赫未幾各以其屬來降
不木魯部卜灰蒲察部撒骨出初助桓赫兄弟至是招之不至其
別部石魯遂殺卜灰以降撒骨出追亡者於道爲人所殺自是舊
部悉歸幹勤部人杯乃有異志會其家失火因以縱火誣歡都世
祖徵償如約杯乃不自安遂結烏春窩謀罕舉兵世祖使肅宗與
戰禽之以獻於遼臘醅麻產侵掠野居女直略流來水牧馬世祖

擊之禽臘醅等獻之遼麻產遁去歡都在亦破烏春於斜堆世祖
自將與歡都合嶺東諸軍皆會時烏春已前死窩謀罕請和復襲
我軍乃進軍圍之窩謀罕遁去破其城盡俘獲之軍還而寢疾
綱目宋哲宗元祐七年遼興宗太安六壬申夏五月遼女真節度使劼里鉢
卒

本紀曰世祖疾篤元娶孛懶氏哭之世祖曰女惟後我一歲耳又
謂肅宗曰汝惟後我三年又謂穆宗曰烏雅東柔善若辦集契丹
事阿骨打能之遂卒年五十四危言曰劼里鉢討叛服貳推視幽朔其謀畧有過人者本紀所錄前

知若此亦未可盡信

贊曰世祖天性嚴重有知識一見必識暫聞不忘疑寒不縮粟動
止不回顧每戰未嘗被甲先以夢兆候其勝負襲位之初內外潰

叛交結爲寇世祖乃因敗爲功變弱爲強旣破桓被散達烏春窩
謀罕基業自此大矣

劾里鉢弟曰頗刺淑天會中追謚爲肅宗穆憲皇帝

通鑑曰劾里鉢生十一子長曰吳刺東一名烏雅東次曰阿骨打
曰吳乞買曰撒也等劾里鉢疾篤呼弟盈哥謂曰烏雅東柔善若
辦集契丹事阿骨打能之遂卒

本紀曰肅宗自幼機敏善辨當景祖時爲國相國相之穢不知始
何時初桓被散達交之父雅達爲國相景初以幣馬求之於雅達
而命肅宗爲之景祖卒世祖嗣肅宗悉心匡輔時跋黑有異志及
桓被散達烏春窩謀罕石顯父子臘醅麻產作難用兵征伐肅宗
屢當一面尤熟於遼事世祖一以委之桓被之戰部人賽罕歿之

其弟活羅懷怨忿攻肅宗不克而去徃附杯乃杯乃誘烏春兵度
嶺世祖與遇於蘇素海甸世祖命肅宗及斜列辭不失擊之肅宗
下馬呼曰若天助我當爲衆部長則今日之事神祇監之語畢拜
拜遂炷火束縵頃之大風起烟焰張天我軍隨烟衝擊大敗之遂
獲杯乃囚而獻諸遼并獲活羅釋其罪世祖殂肅宗以國相襲節
度使是時麻產尚據營不服肅宗遣康宗東伐之太祖別軍取麻
產家屬錡金無遺旣獲麻產殺之獻於遼又遣太祖伐泥龐古部
師水抹離海村跋黑播立開平之自是寇賊皆息

綱目宋哲宗紹聖元年遼大安八年甲戌秋八月遼女真部節度使頗刺淑

卒

頗刺淑弟曰盈哥嗣節度使天會中追尊爲穆宗

本紀曰穆宗諱盈哥南人稱揚割太師又曰楊割號仁祖金代無號仁祖者穆宗諱盈歌謚曰孝平盈近揚歌近割南北音訛遼人呼節度使爲太師自景祖至太祖皆有是稱凡叢言松漠記張棣金志等書皆無足取肅宗時禽麻產獻於遼遼命穆宗爲詳穩丙子肅宗卒穆宗襲節度使以兄劾者子撒改爲相國

綱目宋紹聖三年丙子春二月女真伐紇石烈部阿疎

本紀紇石烈部阿疎有異志穆宗召之阿疎與部人毛睹祿阻兵爲難穆宗自往伐之阿疎聞之往訴於遼穆宗至阿疎城留劾者守之而還會阿閣版及石魯阻王國膺路執殺遼捕鷹使者遼詔穆宗討之穆宗攻其城拔之出遼使存者數人以歸烏古論部留可詐都等作難穆宗以撒改爲都統伐之撒改欲先平邊地城堡

或欲先取留可莫能決乃命阿骨打往與撒改會攻留可城留可已先往遼矣盡殺其城中渠長還圍塢塔等城皆下之明年毛睹祿來降阿疎旣至遼遼主遣使者使罷兵穆宗使烏林答石魯往佐劾者戒之曰遼使來但易我軍衣服旗幟與阿疎城中無辨勿令遼使知之又戒劾者曰遼使可以計却勿聽其言遽罷兵也遼使者至穆宗使胡魯邈遜與俱至阿疎城劾者詭謂胡魯邈遜曰我部族自相攻擊於汝何與誰識汝太師援劍刺殺其所乘馬遼使驚駭走歸數日破其城阿疎復訴於遼遼主遣使命穆宗曰凡攻城所獲存者復與之否則備償且徵馬數百穆宗與下謀曰若償阿疎諸部不復可號令矣乃令主隈禿答兩水之民陽爲阻絕鷹路復謀他部謂遼主曰若開鷹路非生女真不可遼主信之卽

以命穆宗而阿疎城事遂止穆宗聲言平鷹路而歸遼主償其功是歲留可降

綱目宋徽宗崇寧元年

遼延禧天祚元壬午

冬十一月遼將蕭海里叛女真

部節度使盈哥擊斬之

宋史曰遼將蕭海里叛遼亡入女真阿典部遣其族人幹達刺至生女真約同舉兵盈哥執之會遼主命盈哥討海里盈哥募兵得千餘人兄子阿骨打曰有此甲兵何事不可圖也遂次混同江蓋先是女真甲兵未嘗滿千也至是遼兵追海里者數千人而不能克盈哥謂遼將曰退爾軍我當獨取海里遂使阿骨打與海里戰海里中流矢墜馬阿骨打執而殺之因大破其黨函海里首獻於遼遼主大喜錫予加等盈哥自是知遼兵之易與益自肆矣

綱目崇寧二年

癸未

秋九月高麗與女真通好

宋史曰女真雖舊屬高麗不相通者久矣會高麗醫者至女真還言於高麗王曰女真居黑水者部族日彊兵益精悍其王乃通使於女真自是來往不阻

冬十月遼女真節度使盈哥卒

本紀贊曰初諸部各有信牌穆宗用太祖議置牌號者真於法自是號令乃一民聽不疑矣自景祖以來兩世四主志業相因卒定離析一切治以本部法令東南至於離骨曷懶耶懶土骨論東北至於五國主隈禿答金國蓋盛於此

盈哥兄曰烏雅束劾里鉢長子也盈哥卒烏雅束嗣天會中追尊爲康宗皇帝

綱目崇寧三年甲申春三月高麗侵女直女真敗之

本紀曰高麗既遣使通好康宗襲位遣石適歡以兵狗曷懶甸之地下其七城高麗恐不利於已使人請議事石適歡使杯魯往而曷懶甸亦使二詳穩如高麗高麗執二詳穩而拒杯魯不納於是五水之民皆附高麗執我團練使十四人舉兵來伐石適歡連破之追入闕登水逐其殘衆踰境高麗王懼遣還所俘請和由是使好復通丙戌歲高麗遣使來賀襲位康宗遣杯魯報之高麗約還諸亡在彼者乃使阿聃勝昆往受之高麗背約殺二使築九城於曷懶甸以兵來攻幹賽敗之幹魯亦築九城與高麗相對高麗復來攻幹賽復敗之高麗約以還遁逃之人退九城之軍復所侵地乃罷兵壬辰歲康宗卒

綱目宋政和三年癸巳冬十二月遼女直節度使烏雅束卒

本紀贊曰金之厥初兄弟三人亦微矣熙宗追帝祖宗定著始祖景祖世祖廟世世不祧始祖娶六十之婦而生二男一女豈非天耶景祖不受遼籍印取雅達國相以與其子世祖既破桓赧散達遼政日衰而以太祖屬之穆宗其思慮豈不深遠矣夫又宗室傳贊曰金自始祖至康宗凡八世獻祖徙居海姑水世祖稱海姑兄弟蓋指其所居也完顏十二部皆以部爲氏宣宗詔宗室皆書姓氏然亦有部人以部爲氏者非同姓也

太祖武元皇帝名阿骨打劾里鉢第二子母挈懶氏烏雅束卒阿骨打自稱都勃極烈以宋政和五年遼天祚二年甲午歲叛遼太敗遼軍於混同江明年乙未正月稱帝且曰遼以賓鐵爲號取其堅也賓

鐵錐堅終亦變壞惟金不變不壞金之色白完顏部色尚白於是國號大金癸卯八月建元收國更名旻

太宗皇帝吳乞買世祖第四子太祖母弟在位十二年元甲辰終甲寅正月

德宗皇帝名宗幹太祖長庶子母裴滿氏初封遼王

徽宗景宣皇帝名宗峻太祖嫡子母唐括氏是為聖穆皇后

睿宗皇帝名宗輔太祖庶子母僕散氏

熙宗皇帝亶本名合刺太祖嫡孫徽宗宗峻子母蒲察氏太宗立為

儲嗣太宗殂嗣立在位十五年元乙卯終己巳十一月

廢帝海陵王名亮本名廸古遼王宗幹第二子母吳氏初封王弒

熙宗而自立在位十二年為完顏元亨等所弒元庚午終辛巳十一月

世宗皇帝雍本名烏祿太祖孫睿宗子母李氏初封曹國公辛巳十

月稱帝於遼陽在位二十九年元壬午終庚戌正月

顯宗皇帝名允恭世宗子母烏林答氏立為太子早卒

章宗皇帝璟顯宗嫡子母徒單氏以皇太孫嗣位十八年元辛亥終戊辰十一月

廢帝衛紹王永濟世宗第七子母元妃李氏初封衛王章宗無子詔

立允濟允濟立而殺其遺腹二子在位五年為胡沙虎等所弒元己巳終癸酉八月

宣宗皇帝珣顯宗長子章宗庶兄母昭華劉氏初封昇王胡沙虎等

弒衛王而迎立帝在位十一年元甲戌終甲申十二月

哀宗皇帝守緒宣宗第三子母淑妃王氏在位九年為元所滅自殺

元乙酉終癸巳正月

末帝承麟世祖之後

右金九主承麟不凡六世共一百一十九年始乙未終癸巳

皇朝通志卷四
元壬午歲庚戌五月



國家圖書館, NATIONAL CENTRAL LIBRARY, TAIWAN, R.O.C.

學海君道部卷之十七

茅絢編

世系類

偽命世數

序曰夫餘分爲閏旣異夫居正之統王綱失紐或有乎僭命之號
斯蓋豪傑竊起以蓄乎覬覦疆弱相凌分據乎土宇雖政令之自
出非運序之所繫自魏武徒氏羗之種雜處秦川晉氏之興厥類
彌熾罔徇名臣之議失於長世之御亂華之暴乘間而作故劉淵
以五部之衆起於離石石勒因晉陽之甲據乎襄國厲階之構乃
由於此而李特以流徙之隸奄宅益部而爲蜀慕容廆因封建之
舊保界遼疆而爲燕羣雄競起宇內分裂河西之區張軌攸領因
而解制是稱前涼自此晉綱絕紐中原震蕩龜鼎南徙遂荒江界

其後符洪自冀州之廣川逮三秦之號入冠軍輔居長安而爲秦
李暉以焯煌之輿而爲西涼呂光按酒泉之富而爲後涼姚萇乘
符氏之業而爲後秦馮跋踐昌之城黎而爲北燕禿髮烏孤負西
平之主而號南涼慕容德依廣固之險而爲南燕沮渠蒙遜保張
掖而爲北涼赫連勃勃連朔方而稱夏凡十有六國焉俱僭大號
各建正朔或稱王爵並專誅賞傳世垂祚歷世彌久而率多戎虜
之種或出氐羗之類始愆智駁終以疆大分宰諸夏專制民命吞
并相繼兵難不絕家國殊政百有餘年洎宋祖之奮威及元魏芟
夷掃蕩剪焉靡餘以至於唐室之季王度交喪禮樂征伐不出於
朝廷山河疆理分於土壤王審知跨據山海列五郡而爲王建
平恃巖險包三川而爲蜀楊行密宅淮海之壤擅魚鹽之富建號

而稱吳劉陟總百越之衆通珠貝之利開國而爲漢其後孟知祥
因同光之難憑二劔之固僭尊名而爲後蜀李昇承吳人之業保
重江之阻冒舊服而爲南唐劉崇以漢室之亡託於此宗之胄仍
厥位號保於太原而吳唐二蜀繼守其宇七閩之亂厥土三分顯
德之世尚餘四國有宋受命始平并洛旋殄五嶺後克江表庶幾
混一而北漢之矯命抗拒兩朝西漢之擅據蔓延數世今自西晉
之後洎宋初諸國論次其世以爲僞命門

冊府元龜僭僞
部舊序刪改

晉末十六國篇

晉書載記曰古者帝王乃生奇類淳維伯禹之苗裔豈異類哉反
首衣皮飧羶飲湮而震驚中域其來自遠天未悔禍種落彌繁其
風俗險詖性靈馳突前史載之亦以詳備軒帝患其干紀所以徂

征武王寯以荒服同乎禽獸而於露寒之野候月覘風覩隙揚埃
乘間騁暴邊城不得緩帶百姓靡有室家孔子曰微管仲吾其被
髮左衽矣此言能教訓卒伍整齊車甲邊場旣伏境內以安然則
燕築造陽之郊秦塹臨洮之險登天山紀地脉苞玄菟款黃河所
以防夷狄之亂中華其備預如此漢宣帝初納呼韓居之亭鄣委
以候望始寬戎狄光武亦以南庭數萬徒入西河後亦轉至五原
運延七郡董卓之亂則汾晉之郊蕭然矣郭欽騰牋於武帝江統
獻策於惠皇皆以爲魏處戎夷繡居都鄙請移沙塞之表定一般
周之服統則憂諸并部欽則慮在盟津言猶自口元海已至語曰
失以毫釐晉卿大夫之辱也聰之誓兵東兼齊地曜之馳旆西踰
隴山覆沒兩京蒸徒百萬天子陵江御物分據地險迴首中原力

不能救割長淮以北大抵棄之胡人利我艱虞分鑣起亂晉臣或
阻兵遐遠接武效尤大凡劉元海以惠帝永興元年據離石稱漢
後九年石勒據襄國稱趙張氏先據河西是歲自石勒後三十六
年也重華自稱涼王後一年冉閔據鄴稱魏後一年符健據長安
稱秦慕容氏先據遼東稱燕慕容是歲自符健後一年也僞始僭號
後三十一年後燕慕容垂據鄴後二年西涼慕容冲據阿房是歲
也乞伏國仁據枹罕稱秦後一年慕容永據上黨是歲也呂光據
姑臧稱涼後十二年慕容德據滑臺稱南燕是歲也秃髮烏孤據
廉川稱南涼段業據張掖稱北涼後三年李玄盛據敦煌稱西涼
後一年沮渠蒙遜殺段業自稱涼後四年譙縱據蜀稱成都王後
二年赫連勃勃據朔方稱大夏後二年馮跋殺離班據和龍稱北

燕提封天下十喪其八莫不龍旌帝服建社開祊華夷暨人物斯
在或篡通都之鄉或擁數州之地雄圖內卷師旅外并窮兵凶於
勝負盡人命於鋒鏑其爲戰國者一百三十六載抑元海爲之禍
首云

卮言曰按崔鴻春秋以二趙四燕五涼三秦及成夏爲十六國晉
書以前涼張氏西涼李氏乃心晉室自爲列傳不入載記載記只
十四國耳要之張李起僭竊之際世據一國以與羣雄爭衡豈得
爲晉臣哉今從崔氏春秋

前趙劉氏章

高祖光文皇帝劉淵匈奴人

載記曰劉淵新興匈奴人冒頓之後也後漢建武初焉珠留若鞮

單于子右與鞬日逐王比自立爲南單于入居西河美稷今離石
左國城卽單于所徙庭也中平中單于羗渠使子於扶羅將兵助
漢討平黃巾會羗渠爲國人所殺於扶羅以其衆南漢地自立爲
單于屬董卓之亂寇掠太原河東屯於河內於扶羅死弟呼厨泉
立居於平陽以於扶羅子豹爲左賢王卽淵之父也漢建安二十
一年呼厨泉入朝於魏魏王操因留之於鄴分其衆爲五部於并
州諸郡與中國民雜居自謂其先本漢室之甥因冒姓劉氏豹爲
左部帥部族最強太康中改置都尉左部居太原茲氏右部居祁
南部居蒲子北部居新興中部居大陵劉氏雖分居五部然皆家
於晉陽汾澗之濱豹妻呼延氏生淵

路史曰夏桀崩其子淳維妻其衆妾遁於北野號葷育逮周日盛

曰儉狃秦有匈奴單于頭曼者復入於冒頓蔚爲強暴漢初與之
和親由是稽胡子孫感漢爲劉氏

淵以惠帝永興元年甲子七月自稱大單于都於離石

今山西太原府石州

十月遷都左國城自稱漢王戊辰七月徙都蒲子十月稱皇帝已巳正

月徙都平陽庚午七月卒凡六年僭號二年

幼主和淵太子襲僞位一月爲其弟聰所弑

烈宗昭武皇帝聰淵第二子弑和而自立僞位凡八年

自庚午八月至戊寅七月

漢主粲聰之子立一月斬準弑而代之劉氏男女無少長皆斬東市

趙主曜淵族子高祖亮僞謚景皇帝曾祖廣僞謚獻皇帝祖防僞謚

懿皇帝父某僞謚宣成帝曜少孤見養於淵初累封秦王劉粲遇弑

曜自立於赤壁討斬準誅之遷都長安改國號曰趙咸和戊子十二

月後趙主勒大破趙兵於洛陽獲趙主曜以歸殺之遂取長安

熙曜之子曜遇害熙奔上邽已丑八月後趙攻上邽執熙及南陽

王胤以下三千餘人皆殺之

右前趙四主二世

熙不在數

共二十五年起甲子終戊子

卮言曰按劉氏自漢獻帝二十一年丙申南匈奴入朝至東晉成

帝咸和四年己丑滅始終用兵凡一百一十四年稱帝二十二年

先稱王四年

後趙石氏章

高祖明皇帝石勒上黨武鄉羯人

載記曰石勒上黨武鄉羯人匈奴別部羗渠之胄也祖邪奕於父

周易朱一名乞翼如並爲部落小率勒有膽力善騎射并州大饑

東瀛公騰執諸胡於山東賣充軍實衛權奇其狀貌而免之勒乃與牧帥汲桑結壯士為羣盜晉惠帝永興二年秋成都故將公師藩起兵桑與勒率數百騎赴之桑始命勒以石為姓勒為名焉

勒以惠帝永興二年乙丑七月從公師藩起兵趙魏永嘉丁卯三月

荀晞擊汲桑與勒大破之勒降漢辛未六月漢兵陷洛陽勒陷蒙城

執荀晞引兵據襄國今直隸順德府建興癸酉夏石虎攻陷鄴據之甲戌三

月取幽州元帝大興戊寅七月漢主靳準弒其主粲勒引兵討準劉

曜自立於赤壁封勒為趙公巳卯二月漢徙都長安改號趙劉為前趙石為

後趙十一月勒自稱趙王咸和戊子冬殺趙主曜巳丑春取長安殺趙

太子熙秋取秦隴前趙已滅後趙只稱曰趙庚寅二月稱天王九月稱皇帝癸巳

七月卒

廢主弘勒第二子襲偽位一年為石虎所廢

太祖武皇帝虎勒之從子也祖曰留邪偽謚武皇帝父曰寇查偽謚

孝皇帝勒父朱幼而子虎故或稱勒第焉虎初封中山王勒卒虎弒

弘而自立為天王乙未九月遷都於鄴巳酉正月稱皇帝四月卒凡

十五年

卮言曰一統志云鄴古邑名周末魏文侯始封於此漢置鄴縣屬

魏郡魏公曹操居此後為臨漳縣今屬河南彰德府

趙主世虎之子襲偽位三十三日為其兄遵所弒

趙主遵世之兄弒世而自立一百八十三日為石鑒所弒

趙主鑒遵之弟弒遵而自立一百三日庚戌閏正月虎養子冉閔弒

鑒而自立改國號魏殺胡羯二十萬人

趙主祗鑒之弟冉閔弒鑒祗稱帝於襄國二年辛亥四月趙將劉顯弒祗而自立汝陰王琨奔晉斬之石氏遂絕

右後趙七主三世共三十二年起已卯終辛亥
稱帝共二十二年自起兵至滅凡四年

成李氏章

始祖景皇帝李特巴西宕渠人

載記曰特字玄休巴西宕渠人其先廩君之苗裔也昔武落鍾離山崩有石穴二所其一赤如丹一黑如漆有人出於赤穴者名曰務相姓巴氏有出於黑穴者凡四姓曰驛氏樊氏柏氏鄭氏五姓俱出皆爭爲神於是相與以劔刺穴屋能著者以爲廩君四姓莫著而務相之劔懸焉又以土爲船雕畫之而浮水中曰若其船浮

存者以爲廩君務相船又獨浮於是遂稱廩君乘其土船將其徒卒當夷水而下至於鹽陽鹽陽水神女子止廩君曰此魚鹽所有地又廣大與君俱生可止無行廩君曰我當爲君求廩地不能止也鹽神夜從廩君宿旦輒去爲飛蟲諸神皆從其飛蔽日晝昏廩君欲殺之不可別又不知天地東西如此者十日廩君乃以青縷遺鹽神曰嬰此卽宜之與汝俱生弗宜將去汝鹽神受而嬰之廩君立碣石之上望膺有青縷者跪而射之中鹽神鹽神死羣神與俱飛者皆去天乃開朗廩君復乘土船下及夷城夷城石岸曲泉水亦曲廩君望如穴狀歎曰我新從穴中出今又入此奈何岸卽爲崩廣三丈餘而階階相乘廩君登之岸上有平石方一丈長五尺廩君休其上投策計筭皆著石焉因立城其旁而居之其後種

類遂繁秦并天下以爲黔中郡薄賦歛之口歲出錢四十巴人呼賦爲賓因謂之賓人焉及漢高祖爲漢王募賓人平定三秦旣而求還鄉里高祖以其功復同豐沛不供賦稅更名其地爲巴郡漢末張魯居漢中以鬼道教百姓賓人敬信巫覡多往奉之值天下大亂自巴西之宕渠遷於漢中楊車坂抄掠行旅百姓患之號爲楊車巴魏武帝尅漢中特祖將五百餘家歸之魏武帝拜爲將軍遷於略陽北土復號之爲巴氏特父慕爲東羗獵將特少仕州郡見異當時身長八尺雄武善騎射沉毅有大度元康中氏齊萬年反關西擾亂頻歲大饑百姓乃流移就穀相與入漢川者數萬家特隨流人將入於蜀至欽閣箕踞太息顧盼險阻曰劉禪有如此之地而面縛於人豈非庸才邪

華陽國志曰李特略陽臨渭人祖世本巴西宕渠寶民種黨勁勇俗好鬼巫漢末天下大亂自巴西之宕渠移入漢中魏武定漢中曾祖父虎與杜朴胡約楊車李黑等移於略陽北土復號曰巴人特父慕爲東羗獵將特兄弟五人長兄輔字玄政次特特弟庠字玄序庠弟流字玄通流弟驥字玄龍皆驍銳有武幹特長子蕩字仲平好學有容觀少子雄字仲儁初特妻羅氏夢雙虹自門昇天一虹中斷羅曰吾二兒若有先亡在者必大貴雄少時辛冉相當貴有劉化者道術士也言關隴民皆當移李氏子中惟仲儁天姿奇異終爲人主鄉里人多善之與叔父庠並以烈氣聞人多歸之及雄稱成都王追尊曾祖庸曰巴郡桓公祖慕隴西王父特景王母曰太后追謚世父輔齊烈王仲父庠梁武王流秦文王兄蕩廣

漢壯文公雄稱帝追尊特曰景帝廟號始祖

特以惠帝永寧元年辛酉冬十月據廣漢自稱益州牧癸亥二月晉益州刺史羅尚破持殺之雄僭號追尊

秦文王流特第四弟也特死流代領其衆是秋九月病卒雄時追號太宗武皇帝雄特第三子母羅氏流卒衆推雄爲益州牧是冬十二月入成都甲子十月自稱成都王丙寅六月稱帝國號大成甲午六月卒凡三十一年稱王二年稱帝二十九年

廢主班雄兄蕩之子雄卒班襲位十月雄子越弒之

廢主期雄第四子兄越弒班而立之戊戌四月爲李壽所廢

中宗昭文帝壽特弟驥之子弒期自立改國號漢癸卯十二月卒凡六年

後主勢壽子壽卒勢襲位四年丁未三月晉桓溫伐漢至成都勢降詔以爲歸義侯

右成五主

特流不在其數

凡三世共四十四年

贊曰晉圖弛馭百六斯鍾天垂伏鼈野戰羣龍李特窺釁盜我巴庸世歷五朝年將四紀篡弒移國昏狂繼軌德之不修險亦難恃華陽國志曰秦始皇時有長人二十五丈見宕渠秦史胡毋敬曰是後五百年外必有異人爲大人者及雄之王祖世出自宕渠有識者皆以爲應之

譏曰昔沙麓崩卜偃言其後當有聖女興元城廓公謂王翁孺屬其時故有政君李雄宕渠之厠伍略陽之黔首耳起自流隸君獲士民其長人之鬼良有以也

又曰特流乘釁險害雄能推亡固存遭皇極不見遇其時與期倡
 為禍階而壽勢終之詩所謂亂離瘼矣奚其適歸者也長老傳譙
 周讖曰廣漠城北南大賊曰流曰特攻難得歲在玄官自相賊終
 如其記先識預覩何異古人乎

過秦之論

前燕慕容氏章

高祖武宣皇帝慕容廆昌黎

今北直隸永平府昌黎縣

棘城鮮卑人

載記曰慕容廆昌黎棘城鮮卑人也其先有熊氏之苗裔世居北
 夷邑於紫蒙之野號曰東胡其後與匈奴並盛控弦之士二十餘
 萬風俗官號與匈奴略同秦漢之際為匈奴所敗分保鮮卑山因
 以為號

曾祖莫護跋魏初率其諸部入居遼西從司馬懿伐公孫淵有功
 拜率義王始建國於棘城之北時燕代多冠步搖冠莫護跋見而
 好之乃斂髮襲諸部因呼之為步搖其後音訛遂為慕容焉或云
 慕二儀之德繼三光之容遂以慕容為氏子木延為左賢王孫涉
 暉以全柳城之功進拜鮮卑單于遷邑於遼東北於是漸慕諸夏
 之風矣二子長曰吐谷渾以馬致國甘松之南孫葉延為吐渾氏
 其後還為慕容氏

吐渾事詳四夷部

次曰莫若廆遷徒河之青山大棘城

教農桑修政令撫華裔四夷歸之乃立四郡統焉

路史曰高辛遊海濱過棘城闕顓頊之虛樂之暨其歸居厭越於

昌黎

厭越高辛妃有厭氏之子八元之一也

邑於紫蒙之野號曰東胡漢初敗於匈

奴退保鮮卑烏丸之山曰鮮卑亦曰烏丸

隨圖經山在柳城東南二百里又棘城東塞外

及遼西北百里亦有鮮卑
山皆其地杜佑不能詳
露宿莽飲桓靈之際盡并北匈奴地光

和中亂檀石槐種為小寇鮮卑破之

廆以晉武帝太康六年乙巳冬寇遼西巳酉夏降以為鮮卑都督元
康甲寅秋徙居大棘城永嘉丁卯冬自稱鮮卑大單于元帝太興巳
卯十二月宇文氏攻廆廆大敗之遂取遼東遣使獻捷庚辰三月以
為平州刺史辛巳九月封遼東公癸巳五月卒凡嗣立五十一年稱
單于二十七年稱公十三年僞僭號追尊

太祖文明皇帝皝廆第三子襲封遼東公丁酉七月自稱燕王辛丑
正月築城於凡柳城之北龍山之西命曰龍城今直隸永平府壬寅十月遷

都之戊申九月卒凡十五年稱王十二年僞僭號追尊

烈祖景昭皇帝儁皝第二子襲燕王壬子夏殺冉閔取襄國遂攻鄴

克之十一月稱帝丁巳十一月徙都鄴庚申正月卒凡稱王三年稱

帝九年

後主暉儁第三子襲偽位十年庚午十一月秦伐燕秦王堅入鄴遷
暉及鮮卑四萬戶於長安以暉為新興侯終以鮮卑叛殺之

右前燕三主三世共三十四年起丁酉終庚午

後燕

世祖成武皇帝慕容垂皝第五子母曰蘭氏僞僭號封垂為吳王慕
容評謀欲誅垂因奔於秦太元癸未冬秦主苻堅寇晉大敗於肥水
走還長安使垂討丁零於洛陽垂叛秦引兵至鄴甲申正月自稱燕
王大破秦兵定都中山丙戌正月稱帝丙申三月卒凡十三年稱帝
十一年

烈宗惠愍皇帝寶垂第四子襲僞位三年丁酉三月為魏所敗奔龍城十月魏克中山戊戌三月段速骨攻陷龍城寶出奔尚書蘭汗誘殺之

中宗昭武皇帝盛寶庶長子討殺蘭汗襲位三年為段璣所弒自戊戌七月

月至辛丑八月

後主熙垂少子初封河間王盛卒其太后丁氏廢太子而立熙討段璣殺之六年丁未養子高雲弒之而自立

右後燕四主三世共二十五年起癸未終丁未

南燕

獻武皇帝慕容德號之少子也母公孫氏僞僭號封梁公暉嗣位改封范陽王暉敗徙於長安及垂稱燕王復封范陽王鎮鄴戊戌正月

自稱燕王己亥八月克廣固都之今山東青州府庚子十二月稱帝甲辰十

月卒凡稱王三年稱帝四年共七年

後主超德同母兄北海王納之子母曰段氏德無子以超為嗣襲位六年義熙庚戌二月晉太尉劉裕伐燕拔廣固執超送建康斬之

右南燕二主二世共十三年起戊戌終庚戌

庖言曰慕容氏自魏明帝延熙元元年戊午莫護跋建國柳城至晉恭帝義熙六年庚戌南燕滅前後共一百十三年稱帝五十四年稱王十五年稱公五十二年

西燕附

慕容泓前燕主暉弟也暉敗入秦為北地長史秦亂垂攻鄴泓亡奔關東還屯華陰以甲申三月起兵華陰自稱濟北王進向長安改元

燕興六月為謀臣高蓋等所殺

慕容冲泓弟也暉敗入秦為平陽太守亦以甲申三月起兵平陽進攻蒲坂六月泓諸將殺泓而立冲為皇太弟太破秦兵遂據阿房進逼長安乙酉正月稱帝於阿房是為西燕六月入長安丙戌二月為其將韓延所弑

慕容顗燕主暉弟宜都王之子二月韓延殺冲立冲將段隨為燕王三月慕容恒慕容永等殺段隨而立顗為王恒弟韜殺顗

慕容瑤冲之子恒殺顗而立瑤為帝復為永所殺慕容忠泓之子永殺瑤而立忠為帝復為刁雲等所殺

慕容永胤第之孫也丙戌六月忠遇弑永自稱河東王十月稱帝於長子甲午五月為南燕所殺八月燕主垂拔長子執永斬之

右西燕二主

泓顗瑤忠不在數內

共十年起乙酉終甲午

前秦苻氏章

惠武帝苻洪略陽

今陝西漢中府略陽縣

臨渭

漢縣今廢故城在漢中府西北

氏人

載記曰苻洪略陽臨渭氏人也其先蓋有扈之苗裔世為西戎酋長始其家池中蒲生長五丈五節如竹形時咸謂之蒲家因以為氏焉父懷歸部落小帥生洪隴右大雨謠曰雨若不止洪水必起因名曰洪

洪以懷帝永嘉四年庚午七月自稱略陽公據枋頭

在大名府潘縣西南

有虎

踞中原之志太興己卯秋降趙封率義侯己丑後趙取長安洪西保隴山遂降後趙封西平郡公使居枋頭以功進封略陽公為雍秦都督己酉夏趙主虎卒罷洪都督怒歸枋頭遣使降晉封廣川公庚戌

正月時有說洪稱尊號者洪亦以識文有草付應王又其孫堅背有草付字遂改姓苻氏自稱三秦王二月爲故趙將麻秋所殺

楊氏曰苻洪以應識文改姓其字從草不從竹今作苻非也苻音蒲其音亦別左傳萑苻之澤杜註亦音蒲

高祖明皇帝健洪第三子洪卒健擊杜洪於長安敗走之遂入長安辛亥正月自稱秦天王壬子正月稱帝乙卯六月卒凡僞位四年

厲王生健第三子母曰強氏襲位二年爲兄堅所弒自乙卯六月至丁巳六月

世祖宣昭皇帝堅洪之孫其父曰雄字元才洪之季子也少善兵書而多謀略好施下士便弓馬有政術健僭位封爲東海王雄爲佐命元勳權侔人主而謙恭奉法健常曰元才吾姬旦也堅僭立追謚爲文桓皇帝母曰苟氏堅初襲王爵丁巳六月殺生而自立僞位二十

九年兵敗爲姚萇所弒自丁巳六月至乙酉八月

哀平皇帝丕堅庶長子初封長樂公堅死丕稱帝於晉陽一年敗於

慕容永爲馮該所殺自乙酉八月至丙戌十月

太宗高皇帝登堅之族孫也父敞健之世爲太尉司馬隴東太守建節將軍後爲苻生所殺堅卽僞位追贈右將軍涼州刺史以登兄同成嗣毛興之鎮上邽以爲長史登爲司馬累封南安王丕敗登稱帝

於南安今陝西鞏昌府九年甲午七月後秦主興擊登殺之

後主崇登太子登死崇立奔湟中三月攻西秦敗死

右前秦六主五世共四十四年起辛亥終甲午

卮言曰苻氏自晉懷帝永嘉四年庚午洪稱公至孝武帝太元十

九年甲午滅始終稱兵八十五年

後秦姚氏章

始祖景元皇帝姚弋仲南安今陝西華昌府赤亭漢縣屬南安郡今渭州襄武縣羌人

載記曰姚弋仲南安赤亭羌人也其先有虞氏之苗裔禹封舜少子於西戎世為羌酋其後燒當雄於洮罕之間七世孫填虞漢中元未寇擾西州為楊虛侯馬武所敗徙出塞虞九世孫遷邠率種人內附漢朝嘉之假冠軍將軍西羌校尉歸順王處之於南安之赤亭邠玄孫柯廻為魏鎮西將軍綏戎校尉西羌都督廻生弋仲路史曰始禹分帝之少子於西戎為羌酋秦厲公世有無弋爰劔曾孫忍舞生子十七為十七種忍九子研號研種十三世有燒當代雄洮罕之間居河北大允谷四世孫填良益貧收先零良良卑南侵甚為所敗良益盛奪榆中居復強生岍滇虞即填生東吳迷吾號吾

後益困依發羌吾曾孫麻奴收怨羌復振滇零大捷漢號天子遷

那內附中元間寇西郡馬武有弋仲襄其是為後秦云

弋仲以晉懷帝永嘉壬申十二月東徙榆眉漢縣屬扶風今鳳翔府地自稱扶風

公大寧癸未秋降趙封平襄公己丑夏後趙取長安弋仲降以為六

夷都督徙居清河之灑頭在漢陽府城北以功進封西平公辛亥春冉閔滅

石氏而自立八月弋仲遣使降晉封高陵郡公尋卒其僭號追尊

魏武王姚襄弋仲第五子弋仲死襄率眾歸晉詔屯譙城癸丑秋徙

屯歷陽十二月徙屯盱眙甲寅二月叛降於燕乙卯四月據許昌為

桓溫所敗北走據襄陵丁巳四月據黃落將圍關中為苻秦將郭羗

所殺其僭號追封

太祖武昭皇帝其弋仲第二十四子也襄死其以眾降秦為龍驤將

軍甲申春秦主苻堅遣子叡討慕容泓以萇爲司馬四月萇起兵北地自稱秦王丙戌四月取長安稱皇帝癸巳十二月卒凡十年稱帝八年

高祖文桓皇帝興萇長子母曰蚩氏襲僞位二十二年自甲午五月至丙辰正月後主泓興長子襲位二年丁巳秋晉太尉劉裕伐秦大破秦兵泓出降九月裕至長安送泓詣建康斬之

右後秦三主三世共三十二年起丙戌終丁巳

庖言曰姚氏自晉懷帝永嘉六年壬申弋仲稱公至恭帝義熙年丁巳滅始終稱兵四十六年

前涼張氏章

武公張軌安定烏氏人漢常山王張耳十七世孫也家世孝廉以儒學顯祖烈魏外黃令父溫大官令母隴西辛氏晉惠帝時軌以時方多難陰有保據河西之志故求爲涼州以永寧元年辛酉正月爲涼州刺史甲戌進涼州牧封西平公五月卒在州十四年

庖言曰一統志云姑臧漢縣名爲武威郡治所其後涼州治焉晉時張軌始據此建國故址在今陝西涼州衛城東二里

昭公寔軌子嗣位六年爲其下所弒自甲戌五月至庚辰五月

成王茂寔弟寔遇害衆以子駿尚幼推茂自立癸未八月降趙趙主劉曜封爲涼王甲申五月卒凡四年

文王駿寔子茂卒無子駿嗣立乙巳十二月自稱假涼王丙午五月卒凡十二年自甲申五月至丙午五月

明王重華駿子嗣立改元巳酉九月自稱涼王凡七年自丙午五月至癸丑十二月

哀公曜靈重華嫡子母曰裴氏嗣立為西平公一月為趙長等所廢前主祚重華庶兄趙長等廢曜靈而立祚甲寅正月自稱涼王改元二年為張濤等所弑

冲公玄靚曜靈弟祚以無道弑而玄靚立張瓘推為涼王八年為張

天錫所弑自乙卯九月至癸亥八月

後主天錫駿子重華弟弑玄靚而自立十三年太元丙子八月秦兵擊涼州敗之天錫降封歸義侯

張大豫天錫世子丙子之亡大豫匿河西後十年丙戌起兵攻姑臧自稱涼州牧丁亥為呂光所殺

右前涼九主凡五世共七十六年起辛酉終丙子

後涼呂氏章

太祖懿武皇帝呂光略陽氏人也其先呂文和漢文帝初自沛避難徙焉世為酋豪孫婆樓為苻堅佐命官至太尉光其子也光以晉孝武太元六年辛巳九月為苻堅將兵擊西城乙酉九月還擊涼州據姑臧自領涼州刺史丙戌自稱酒泉公丁亥定涼州巳丑自稱三河王丙申自稱涼天王巳亥冬立子紹為天王自稱太上皇帝尋卒凡偽位十年自巳丑二月至巳亥十月

隱王紹光嫡子光卒紹襲位一日為兄纂所殺

靈王纂光庶長子殺紹而自立二年為呂超所殺自巳亥十月至辛丑二月

後主隆光從子父曰寶偽謚文皇帝母曰氏呂超弑纂而立之元興癸卯七月南北涼互出兵攻隆秦主興乃徵隆入侍遣兵迎之以王尚為涼州刺史鎮姑臧徙隆宗族及民萬戶於長安以隆為散騎

常侍

右後涼四主二世共十五年起巳丑終癸卯

南涼禿髮氏章

烈祖武王禿髮烏孤河西鮮卑人

載記曰禿髮烏孤河西鮮卑人也其先與後魏同出八世祖匹孤率其部自塞北遷於河西其地東至麥田牽屯西至濕羅南至澆河北接大漢匹孤卒子壽闡立初壽闡之在孕母胡掖氏因寢而產於被中鮮卑謂被為禿髮因而氏焉壽闡卒孫樹機能立壯果多謀略泰始中殺秦州刺史胡烈於萬斛堆敗涼州刺史蘇愉於金山盡有涼州之地武帝為之肝食後為馬隆所敗部下殺之以降從弟務九立死孫推斤立死子思復鞬立部眾稍盛烏孤其子

也

烏孤以東晉孝武太元甲午正月呂光署為河西都統廣武縣侯乙未秋徙都廉川封廣武公丁酉正月自彌西平王攻涼取金城是為南涼戊戌冬更稱武威王巳亥正月徙治樂都八月卒凡彌王三年康王利鹿孤烏孤弟烏孤顧命立長而利鹿孤立徙治西平庚子春更稱河西王凡三年

自巳亥八月至壬寅三月

庖言曰一統志云湟中漢破羌縣東漢置西平郡晉末為禿髮所據後為鄯州今陝西西寧衛

景王傳檀利鹿孤弟利鹿孤顧命立之自彌涼王尋去王號即遣使於秦封廣武公以為涼州刺史戊申十一月復稱王義熙甲寅五月西秦襲滅南涼以傳檀歸殺之凡十二年

右南涼三主三兄弟共十八年起丁酉終甲寅

北涼沮渠氏章

北涼王沮渠蒙遜張掖

漢郡今陝西甘肅州衛盧水胡人

載記曰沮渠蒙遜臨松盧水胡人也其先世為匈奴左沮渠遂以官為氏焉世為部帥蒙遜兄羅仇為呂光尚書所殺

蒙遜以晉安帝隆安元年丁酉四月起兵叛涼攻臨松郡拔之屯據

金山

今陝西永昌府

從從兄男成亦合眾攻建康推段業為涼州牧是為北

涼蒙遜帥眾歸之業僭稱涼王封蒙遜臨池侯辛丑五月蒙遜反入

張掖弒段業自稱涼州牧張掖公亦號北涼遣使入貢於秦秦封為

西海侯壬子冬遷於姑臧始稱河西王戊午冬稱藩於晉以為涼州

刺史庚申六月劉裕篡晉為宋七月蒙遜滅西涼辛未秋遣子入侍

於魏封涼王癸酉四月卒凡稱涼三十三年稱王十二年

沮渠牧犍蒙遜子襲位六年己卯九月魏主伐涼姑臧潰牧犍帥眾

請降魏主釋而禮之封河西王

沮渠無諱牧犍弟牧犍降無諱出奔敦煌庚辰正月寇魏酒泉拔之

七月降魏辛巳正月魏克酒泉無諱西渡流沙壬子正月據鄯善九

月襲據高昌遣使降宋封為河西王甲申六月卒

沮渠安周無諱弟襲位十六年庚子十月柔然攻高昌殺安周滅沮

渠氏

右北涼前二主父子共三十九年起辛丑終己卯後二主據高昌

稱河西王

河西亦其舊號

兄弟共十九年起壬子終庚子前後大共六十

年

段業附

段業京兆人初為杜進記室後為呂光建康太守沮渠蒙遜與從兄男成以丁酉歲起兵叛光推業為涼州牧建康公是為北涼己亥二月業自稱涼王辛丑五月為蒙遜所弑凡僭立五年

西涼李氏章

武昭王李暠隴西秦郡今陝西臨洮府成紀人

晉書載記曰李暠隴西成紀人姓李氏漢前將軍廣之十六世孫也廣曾祖仲翔漢初為將軍討叛羌於素昌素昌乃狄道也眾寡不敵死之仲翔子伯考奔喪因塋於狄道之東川遂家焉世為西州右姓高祖雍曾祖柔仕晉並歷位郡守祖弁仕張軌為武衛將軍安世亭侯父昶幼有令名早卒遺腹生暠暠少為段業效穀令暠以晉安帝隆安四年庚子三月為段業敦煌太守十一月自稱公是為西涼乙巳正月遣使內附九月徙都酒泉丁巳二月卒凡十八年

庾言曰一統志云敦煌漢郡後為瓜州今在肅州衛西酒泉漢郡後為甘州今陝西甘肅鎮

後主歆暠子母曰尹后嗣立三年庚申七月北涼王蒙遜誘歆與戰殺之遂滅西涼以其子牧犍為酒泉太守

李恂歆弟初為敦煌太守歆敗恂奔北山復入敦煌稱刺史一年為北涼所殺辛酉二月北涼屠敦煌殺恂

右西涼二主父子共二十一年起庚子終庚申李恂一年恂兄子實據姑臧二年故

晉史云凡二十四年

西秦乞伏氏章

烈祖宣烈王乞伏國仁隴西鮮卑人

載記曰乞伏國仁隴西鮮卑人也在昔有如弗斯出連叱盧三部自漠北南出太陰山遇一巨蟲於路狀若神龜大如陵旱乃殺馬而祭之祝曰若善神也便開路惡神也逐塞不通俄而不見乃有一小兒在焉時又有乞伏部有老父無子者請養爲子衆咸許之老父欣然自以有所依憑字之曰紇于紇于者夏言依倚也年十歲驍勇善騎射彎弓五百斤四部服其雄武推爲統主號之曰乞伏可汗託鐸莫何託鐸者言非神非人之稱也其後有祐鄰者卽國仁五世祖也泰始初率戶五千遷於夏緣部衆稍盛鮮卑鹿結七萬餘落屯於高平川與祐鄰迭相攻擊鹿結敗南奔略陽祐鄰

盡并其衆因居高平川祐鄰死子結權立徒於牽屯結權死子利那立擊鮮卑吐賴於烏樹山討尉遲渴權於大非川收衆三萬餘落利那死弟祁溼立死利那子述延立討鮮卑莫侯於苑川大破之降其衆二萬餘落因居苑川以叔父軻溼爲師傅委以國政斯引烏溼爲左輔將軍鎮蔡園川出連高胡爲右輔將軍鎮至便川叱盧那胡爲率義將軍鎮牽屯山述延死子儻太寒立會石勒滅劉曜懼而遷於麥田元孤山太寒死子司繁立始遷於度堅山尋爲苻堅將王統所襲部衆叛降於統司繁歎謂左右曰智不距敵德不撫衆劔騎未交而本根已敗見衆分散勢亦難全若奔諸部必不我容吾將爲呼韓邪之計矣乃詣統降於堅堅大悅署爲南單于留之長安以司繁叔父吐雷爲勇士護軍撫其部衆俄而鮮

甲勃寒侵斥隴右堅以司繁爲使持節都督討西胡諸軍事鎮西將軍以討之勃寒懼而請降司繁遂鎮勇士川甚有威惠司繁卒子國仁代鎮

國仁以孝武太元癸未十一月叛苻秦據隴右乙酉九月築勇士城而都之自稱單于秦主苻登封之爲苑川王是爲西秦戊子六月卒凡稱王四年

庀言曰苑川城名乞伏國仁所都故城在今陝西臨洮府蘭縣西武元王乾歸國仁弟國仁死羣臣以其子幼立乾歸號河南王遷都金城苻秦封之爲金城王庚子正月復遷都苑川七月爲姚秦所敗奔南涼遂降於秦以爲主客尚書己酉二月自秦逃歸七月復稱王辛亥正月復降於秦封河南王壬子八月爲乞伏公府所弑凡稱王

先後十六年

文昭王熾磐乾歸長子討乞伏公府殺之自立爲河南王甲寅五月滅南涼復稱秦王丙辰冬遣使內附以爲河南公丁巳秋劉裕滅姚秦自此西秦只稱曰秦戊辰五月卒凡十六年

後主暮末熾磐子襲位三年辛未正月夏滅秦以暮末歸殺之

右西秦四主三世共四十六年起乙酉終庚午

夏赫連氏章

世祖皇帝赫連勃勃本匈奴人

載記曰赫連勃勃匈奴右賢王去單之後劉淵之族也會祖武劉聰世以宗室封樓煩公拜安北將軍監鮮卑諸軍事丁零中郎將雄據肆廬川爲代王猗廬所敗遂出塞表祖豹子招集落復爲諸

部之雄石虎遣使就拜平北將軍左賢王丁零單于父衛辰入居塞內苻堅以爲西單于督攝河西諸虜屯于伐來城及堅國亂遂有朔方之地控弦之士三萬八千後魏師伐之辰令其子力侯提距戰爲魏所敗魏人乘勝濟河克代來執辰殺之勃勃乃奔於叱干部叱干他斗復送勃勃於魏其兄子阿利潛遣勁勇於路奪之送於姚興高平公沒奕于奕于以女妻之勃勃性辨慧美風儀秦王興見而奇之寵遇踰於勳舊拜安遠將軍封陽川侯使助沒奕于鎮高平興弟邕固爭乃止久之進爵五原公竟配以雜虜二萬餘落使鎮朔方勃勃怒興歸賀狄於魏遂叛謀秦晉義熙三年夏柔然獻馬於秦勃勃掠取之僞獵高平川襲殺沒奕于而并其衆階稱天王大單于署置百官自以匈奴夏后氏之苗裔也國稱大夏其後六年築統萬城下書曰朕之皇祖自北遷幽朔姓吹妣氏音殊中國故從母氏爲劉母子而從母之姓非禮也古人氏族無常或以因生爲姓或以王父之名朕將以義易之帝王者係天爲子是爲徽赫實與天連今改姓曰赫連氏庶協皇天之意永享無疆大慶係天之尊不可令支庶同之其非正統皆以鐵伐爲氏庶朕宗族子孫剛銳如鐵皆堪伐人

勃勃以義熙三年丁未夏六月自稱大夏天王癸丑三月築城於朔方水北黑水之南名曰統萬改姓赫連氏戊午十一月陷長安稱帝宋元嘉二年乙丑八月卒凡稱王十二年稱帝八年共十九年

廢主昌勃勃長子勃勃卒昌襲位三年戊辰二月魏將安頡等及夏戰於上邽執昌送平城魏主以妹妻之賜爵會稽公後以謀叛見殺

後主定昌弟初封平原王戊辰二月與魏戰上邽而敗昌被擒定收餘衆奔還平涼襲位魏人追之大敗定復取長安庚午十一月定敗走上邽魏復取長安辛未六月定擊涼吐谷渾襲敗之執定以歸送魏殺之

右夏三主二世共二十五年始丁未終辛未

載記贊曰淳維遠裔名王之餘嘯羣龍漢乘釁侵漁爰創宮宇易彼瓊廬雖弄神器猶曰凶渠

北燕馮氏章

太祖馮跋長樂信都人

載記曰馮跋字文起長樂信都人其先畢萬之後也萬之子孫有食采馮鄉者因以氏焉永嘉之亂跋祖父和避地上黨父安雄武有器量永時爲將軍永滅跋東徙和龍家於長谷三弟皆任俠不修行業惟跋恭慎勤於家產父母器之慕容寶僭號署中衛將軍及寶卒熙襲位密欲誅跋兄弟晉義熙三年秋七月跋等遂弒熙而立熙養子高雲爲主五年冬十月雲爲幸臣所弒跋自稱天王於昌黎而不徙舊號卽國名燕

跋以義熙五年己酉冬十月自稱天王宋元嘉七年庚午九月卒凡僞位二十二年

後主弘跋弟跋卒弘殺其太子而自立丙子夏魏伐燕弘奔高麗魏以南平王渾鎮和麗戊寅春高麗殺弘拜其子孫十餘人

右北燕二主兄弟共三十年始己酉終戊寅

學海君道部卷之十八

世系類

十八

僞命世數

二

唐末十國篇

一

五代史曰嗚呼自唐失其政天下乘時黥髡盜販袞冕戕鬼吳暨南唐姦豪竊攘蜀險而富漢險而貧貧能自疆富者先亡閩陋荆楚開蠻服剝剝弗堪吳越其尤牢牲視人嶺蠻曹劉百年之間並起爭雄山川亦絕風氣不通語曰清風興羣陰伏日月出燭火息故真人作而天下同作十國世家

宋史曰唐自安史之亂藩鎮專制百有餘年漫成割據及巢賊蹂躪郡邑丘墟降臻五季豪傑蠡午各挾智力擅爲封疆自制位號

以爭長雄天厭禍亂授宋大柄太祖命將出師十餘年間南平荆楚西取巴蜀劉鋹既俘李氏納款至于太宗吳越請史渾泉來歸薄伐太原遂償北漢而海內一矣王偁東都事略用東漢隗囂公孫述例置孟昶劉鋹等於列傳舊史因之今倣歐陽修五代史記列之世家凡諸國治亂之原天下離合之勢有足鑒者悉著于篇其子孫諸臣事業有可考者各疏本國之下作列國世家

吳楊氏章

太祖武黃帝姓楊氏名行密廬州合肥人

史鑑曰行密廬州合肥人也唐乾符中江淮羣盜起行密以爲盜見獲刺史鄭棨竒其狀貌釋縛縱之後應募爲州兵戍朔方遷隊長歲滿戍還爲牙將屢有戰功都將忌之復使出戍行密乃斬都

將并將諸營自稱八營都知兵馬使刺史不能制薦於高駢請以自代駢以爲淮南押牙知廬州事朝廷因而命之

行密以僖宗中和癸卯三月據廬州丁未十月克揚州戊申四月敗歸廬州己酉六月取宣州壬子六月再入揚州爲淮南節度使壬戌三月賜爵吳王丙寅十一月卒凡據淮南十五年稱王五年溥僭號追尊

烈祖景皇帝渥行密長子襲仁二年爲徐溫等所弒自丙寅十一月至戊辰五月溥僭號追尊

高祖宣皇帝隆演字鴻源行密第二子溫殺渥而立之凡十二年自戊辰五月至

庚辰五月溥僭號追尊

後主名溥行密第四子初封丹陽郡公隆演卒徐溫立之丁亥十一

月稱帝丁酉十月爲徐知誥所篡凡十六年自庚辰五月至丁酉十月

右吳四主共四十六年凡稱王二十六年
年稱帝十年

五代史注曰據吳錄運歷圖九國志皆云行密以唐景福元年再入揚州至晉天福二年爲李昇所篡實四十六年而舊唐書舊五代史皆云大順二年入揚至被篡四十七年吳錄徐鉉等撰運歷圖龔穎撰二人皆江南故臣所記宜得實而唐末喪亂中朝文字多差失故今以鉉穎所記爲定

危言曰廬州揚州今皆爲府

南唐李氏童

義祖武皇帝徐溫海州朐山人

歐史傳曰徐溫海州朐山人小以販鹽爲盜行密起合肥以隸帳

下行密所與起事劉威陶雅之徒號二十六英雄獨溫未嘗有戰功及行密欲殺朱延壽等溫用其客嚴可求謀教行密陽爲目疾事成以功遷右衛指揮使始預謀議及行密病平生舊將皆以戰守在外而溫居帳下行密卒長子渥嗣唐天祐三年丁卯朱全忠篡唐改元開平渥忌溫與左衛指揮使張顥欲誅之己巳渥爲溫顥所弑立其弟隆演已而溫殺顥專政隆演備位而已癸酉溫進隆演位吳王溫爲行軍司馬鎮海節度使丙子封溫齊國公始鎮潤州留其子知訓爲行軍副使秉政而大事溫遙決之戊寅溫徒治金陵而知訓爲朱瑾所殺溫養子知誥自潤州先入殺唐宣諭使子儼以止亂遂得政庚辰溫請隆演建國改元拜溫大丞相封東海王隆演卒弟溥立改昇州爲金陵府拜溫金陵尹二年拜大

師三年癸未晉王李存勗稱帝遂滅梁是爲後唐丁酉溫勸溥卽帝位溥未許而溫病卒溥稱帝知誥嗣爲金陵尹封東海王三年知誥受禪追尊溫爲帝廟號義祖

卮言曰徐溫事吳弑其君而專其國力可以篡吳而身終北面者或以爲踵曹操高歡之故智也溫未必能爾是時吳未稱帝溫旣難於受禪又諸子皆弱知誥未可去也欲緩圖之而溫歿矣徐氏卵翼於楊氏而竊其國以與卵翼之李氏名爲義祖則何益乎豈楊氏之興暴也而天以此二人奪之歟

烈祖高皇帝本姓李氏初爲徐溫養子名知誥

歐史曰李昇徐州人世本微賤父榮遇唐末之亂不知其所終昇少孤流寓濠泗間楊行密攻濠州得之竒其狀貌養以爲子而楊

氏諸子不能容行密以乞徐溫乃冒姓徐氏名知誥知誥事徐溫甚孝謹溫嘗罵其諸子不如知誥諸子頗不能容而知訓尤甚嘗欲害之季弟知諫以其謀告知誥得免累官至潤州團練使及知訓爲朱瑾所殺溫諸子皆弱溫乃以知誥爲淮南行軍副使代知訓執吳政溫子知詢數請代之溫曰汝不知也嚴可求及副使徐玠屢勸溫乃遣知詢入廣陵奉表勸進因留代知誥執政未果會溫病卒知詢亟歸金陵于是吳王稱帝加知誥兼中書令知詢入朝留爲統軍遣徵金陵兵還江都自是知誥始專吳政

通鑑行密拔濠州軍士掠得徐州人李氏之子八年矣行密養以爲子其長子渥憎之行密謂其將徐溫曰此兒質狀性識頗異子人吾度渥必不能容今賜汝爲子溫名之曰知誥知誥事溫勤孝

過于諸子溫愛之使掌家事家人無違言

知誥以梁貞明戊寅七月執吳政後唐天成丁亥十月代溫為相辛卯十月出鎮金陵廣其城壬辰封東海王乙未十月自加齊王晉天福丁酉十月篡吳稱帝己亥三月復姓李氏改名昇

綱目己亥

晉天福四
唐昇元三

春正月唐主徐誥復姓李氏更名昇

歐史曰昇在位三年徐氏諸子請昇復姓昇謙抑不敢忘徐氏恩下其議百官皆請然後復姓李氏改名昇昇自言唐憲宗子建王恪生超超生志為徐州判司志生榮乃自以為建王四世孫改國號曰唐立唐高祖太宗廟追尊四代祖格為孝靜皇帝廟號定宗曾祖超為孝平皇帝廟號成宗祖志孝安皇帝廟號惠宗考榮孝德皇帝廟號慶宗奉徐溫為義祖徐氏子孫皆封王

冊府曰昇自云唐玄宗第六子永王璘之裔天寶末安祿山連陷兩京玄宗幸蜀詔璘為山南領南黔中江南四道節度採訪等使璘至廣陵大募兵甲有窺圖江左之意後為官軍所敗死于大庾嶺北故昇指以為遠祖

通鑑曰唐主初受禪尊徐溫為太祖武皇帝三年己亥正月唐羣臣江王知證等累表請唐主復姓李立唐宗廟唐主許之二月乙亥改太祖廟號曰義祖己卯唐主為李氏考妣發哀與皇后斬衰居廬如初喪禮朝夕臨凡五十四日庚寅唐主更名昇詔百官議二祚合享禮辛卯宋齊丘等議以義祖居七室之東唐主命居高祖于西室太宗次之義祖又次之皆為不祧之主羣臣言義祖諸侯不宜與高祖太宗同享請于太廟正殿後別建廟祀之唐主曰

吾自幼託身義祖，非義祖有功于吳，朕安能啓此中興之業。群臣乃不敢言。唐王欲祖吳王恪，或曰：恪誅成，不若祖鄭王元懿。唐主命有司考二王苗裔，以吳王孫禕有功，禕子峴爲宰相，遂祖吳王。云自峴五世至父榮，其名率皆有司所撰。唐主又以歷十九帝三百年，疑十世太少，有司曰：三十年爲一世，陛下生于文德，已五十年矣。遂從之。三月庚戌，唐主追尊吳王恪爲定宗，孝靜皇帝自曾祖以下皆追尊廟號及謚。

通鑑考異曰：周世宗實錄及薛史稱昇，唐玄宗第六子永王璘苗裔。江南錄及薛史稱昇，唐玄宗第六子李昊蜀後主實錄云：唐嗣薛王知柔爲嶺南節度使，卒于官，其子知誥流落江淮，遂爲徐溫養子。吳越備史昇本潘氏，湖州安吉人，父爲安吉砦鎮將吳將李

神福，攻衣錦軍，過湖州，虜昇歸，爲僕隸。徐溫嘗過神福，愛其謹厚，求爲假子，以讖云：東海鯉魚飛上天，昇始事神福，後事溫。吳越與唐人仇敵，亦非實錄。昇少孤，遭亂，莫知其祖系。昇曾祖超，祖志，乃與義祖之曾祖祖同名，知其皆附會也。

胡氏曰：誥旣復姓爲考妣，發哀成服是也。而必祖唐，慕各失實，與爲徐氏何異乎？

尹氏曰：綱目分注昇祖吳王恪，又欲祖鄭王元懿。若恪則太宗之子，若懿則高祖之子也。考之通鑑，唐主又以歷十九帝三百年，疑十世太少，旣有而有司，告以三十年爲一世，遂從其說。蓋以恪至峴五世，又五世至其父榮，故也。至於五代史世家，則謂昇自言唐憲宗子，建王恪之四世孫，遂追尊四代祖爲帝，立廟，其說甚明。然參

以唐史吳王恪子琨生禕禕生峴爲宰相固有後裔若建王恪則
薨而無嗣不知歐陽氏何據云爾又與通鑑不合夫以昇之祖唐
世系既遠無所考據此固慕名失實之弊是以綱目但書其復姓
而不書其繼唐者正以是也而通鑑又以昇而比漢昭烈則其相
去益遠茲固因而及之以告後之折衷者

卮言曰徐知誥爲徐溫養子籍其遺業卒以弒君篡國并徐氏奪
之而乃易姓爲李又祖唐先世欲以繼唐爲號而以唐高祖太宗
與義祖同享太廟高祖太宗有靈其肯歆此祀乎天下萬世之評
其孰以徐代李乎夫奸雄欺人祇自欺耳歐史云昇自言建王恪
之後冊府云昇自云永王璘之後通鑑云昇欲祖吳王恪皆傳疑
之詞通鑑不以蜀漢爲正統故引以爲諭正言其不類而尹氏駁

之過矣若陳寔馬元康胡恢陸游皆作南唐書真以爲建王之後
欲取以續唐統毋亦以江左文獻有異於當時諸國而略其系歟

陳寔唐餘紀傳曰唐憲宗第八子建王恪生超早卒超生志爲徐
州判司卒官因家焉陸游紀同志生榮榮性謹愿喜從浮屠游時號李

道者生先主於彭城論曰南唐先主以憲宗遺胤得國江左僅延
一脉祖孫相繼纔四十年而宋滅之是殄唐之祀者不獨朱溫也
宋承周後以周氏爲正統故於南唐謂其與故朝族屬不明紹續
非正以是斥爲僭僞而貶其名號大抵主於紹周故其立論如此
疑未足憑也南唐爲國雖境土褊小歷年不永然觀其聲名文物
當時諸國莫之與並其賢才碩輔固不逮蜀漢武侯而文武才業
忠節聲華炳耀一時者亦不可揜矧其間政化得失興衰治亂之

蹟有可爲後世鑒戒者尤不可泯也方是時契丹雄盛虎視中原
晉漢之君以臣子事之惟謹顧獨拳拳於江淮小國聘使不絕高
麗亦歲貢方物豈非久服唐之恩信仰唐餘風以唐爲猶未忘也
耶然則唐餘之日當時旣不以爲非則後世亦難於終貶故予少
仍前書之文略變綱目蜀漢繼統之例自先王而下列爲國紀俾
後之追修前史者得有據焉

馬令南唐書序曰嗚呼五代之亂符璽竊於大盜中國變於夷狄
先王之禮樂制度掃地盡矣李氏初據江淮建唐廟以隆親與夫
祖契丹而絕其父者孰躋始郊祀於圓丘與夫尚野祭而焚紙緡
者孰重五代之君若彼南唐之制若此則正統疑於不存而僭僞
疑於無罪也予作此書尊天子於中原而僭僞之事則不爲南唐

諱者豈無意哉蓋尊天子所以一天下之統書其僭所以著李氏
之罪其統旣一其罪旣著則竊土賊民者無遁刑於天下後世矣
昔孔子作春秋非徒載其陳言也竊取其義以爲人道之大法而
已予之所論有合於此者弗可不察也王通之作元經第以進退
南北而亂其正統輒自比於孔子曰春秋元經於王道是輕重之
權衡且孔子所書彼善於此則有之而正統常在於周通之所書
宋魏之間其統未嘗一也使後世擾擾而不知其正者必自通始
嗚呼法春秋而不知春秋之法者豈特通乎

又先主書序論曰土運中圯諸侯跋扈基構自吳紹於唐祚作先
主書嗚呼積厚者流澤遠積薄者流澤狹不其然乎舜之後千餘
年而有陳陳亡而田氏專政於齊禹之後千餘年而有杞杞削而

勾踐得志於越後世之君建大義於一時而德不若舜禹者亦隨其澤之遠近而興起焉故晉以天下喪於狄人而瑯琊繼之唐以天下篡於朱梁而烈祖紹之然則盜名器操生殺制一方之命抗萬乘之勢者豈非天與烈祖之起雖無雄才大略而深沉寬裕本於天性幸而適當中原擾攘之際故數年之間有足觀者
卮言曰李昇者楊徐之亂臣賊子也篡其偽位妄稱唐室陳氏信之以比蜀漢之繼正統而又引馬氏之論乃自比於春秋其擬人不倫甚矣曷足以扶名教哉

昇僭位七年

自丁酉十月至癸卯三月

元宗皇帝名景昇長子母宋氏襲位十八年

後主名煜景第六子母鍾氏襲位十四年宋太祖開寶八年乙亥十

一月曹彬克金陵煜降彬俘至汴賜爵違命侯進封隴西公太平興

國戊寅七月卒

右南唐三主三世共三十九年

卮言曰南唐卽今南京

閩王氏世章

王潮王審知兄也光州固始人

歐史本傳潮父恁世爲農潮爲縣史唐末羣盜起吉府州人王緒攻陷固始閩潮兄弟才勇召置軍中以潮爲軍校蔡州秦宗權以緒爲光州刺史責其租賦緒不能給宗權發兵攻緒緒率衆南奔自南康入臨汀陷漳州有望氣者謂緒曰軍中有王者氣於是緒見將卒有勇略踰已及氣質魁岸者皆殺之潮因說其前鋒將執

緒囚之乃奉潮為將軍引兵圍泉州克之光啓三年丙午八月也
福建觀察使陳巖表潮為泉州刺史景福二年癸丑五月潮取福
州卽以潮為福建觀察使

潮以昭宗景福癸丑五月取福州乾寧丙辰八月為威武軍節度使
丁巳十二月卒凡在州五年

太祖昭武皇帝名審知潮弟也潮卒審知襲節度使封瑯琊王朱全
忠篡唐為梁己巳四月封審知閩王後唐同光乙酉二月卒在州共
三十一年稱閩王凡十七年

廢王王延翰審知長子襲位二年為延稟等所殺

自乙酉二月至丙戌十二月

惠宗皇帝名鱗審知次子也初名延鈞與審知養子延稟合兵襲延
翰殺之而自立長興癸巳正月稱帝更名鱗改元乙未十月為李倣

所弒凡僭王六年僭號三年共九年

康宗皇帝名昶初名繼鵬鱗長子弒父而自立四年為叔父曦所殺

自乙未十月至巳亥七月

景宗皇帝名曦審知少子也殺昶而自立甲辰三月為朱文進所弒
後主延政審知子也曦立為淫虐延政數貽書諫之曦怒遣杜建崇
監其軍延政逐之曦乃舉兵攻延政為延政所敗延政遂以建州稱
帝改元天德明年朱文進等弒曦未幾連重遇等誅文進以州歸延
政更國號曰閩晉開運二年乙巳九月唐兵拔建州延政出降汀泉
漳州皆降

右閩六主凡三世共五十五年

五代史注曰據王潮實以唐景福元年入福州拜觀察使而後人

紀錄者乃用騎馬來騎馬去之識以爲據遂以王潮光啓二年歲在丙午拜泉州刺史爲始年至南唐保大四年歲復在丙午而滅故爲六十一年然其奄有閩國則當自景福元年爲始實五十五年也今諸家記其國滅丙午是也其始年則牽於讖書謬矣

卮言曰王潮以丙午克泉州卒有福建謂閩以此年始亦可也然據通鑑則延政之降實在乙巳九月耳

一統志云福州本閩越國秦之閩中郡也漢初封無諸爲閩越王都此武帝滅閩越立冶縣屬會稽郡三國吳屬建安郡晉分置晉安郡陳兼置閩州隋改泉州大業初復爲閩州尋改爲建安縣治閩縣唐初復爲泉州後移州治晉江縣而以此爲閩州開元中改爲州天寶初改長樂郡乾元初復爲福州唐末陞威武軍節度王審知據此陞長樂府改彰武軍宋復爲威武軍建炎中陞福州府元爲福州路本朝改爲府爲福建通治所

漢劉氏章

漢之先劉安仁上蔡人徙南海龔僭號追尊曰文王帝

歐史本傳劉隱祖曰安仁上蔡人也後徙閩中商賈南海因家焉安仁之子曰謙唐乾符中爲封州刺史龔僭號追尊

歐史曰謙爲廣州牙將唐乾符五年黃巢破廣州去掠湖湘間廣州表謙封州刺史賀江鎮邊使以禦梧桂以西歲餘有兵萬人戰艦百餘艘謙三子曰隱台巖

通鑑曰初上蔡人劉謙爲嶺南小校節度使韋宙奇其器以兄女妻之謙擊羣盜屢有功僖宗中和三年癸卯六月辛丑以謙爲封

州刺史

考異曰新傳宙第岫亦有名宙在嶺南以從女妻小校劉謙或諫止之宙曰吾子孫或當依之薛史云韋宙出鎮嶺南海謙時爲牙校宙以猶女妻之北夢瑣言曰丞相韋公宙出鎮南海有小將劉謙者職級甚卑氣宇殊異乃以從女妻之其內以非我族類慮招物議風諸幕僚諫止之丞相曰此人非常流也他日吾子孫或可依之謙以軍功拜封州刺史韋夫人生子曰隱曰巖十國紀年曰劉謙望字德光亦名知謙後止名謙唐咸通中爲廣州牙將韋宙以兄女妻之新傳云岫知謙恐誤今從瑣言紀年

卮言曰一統志云封州隋初所置沿封川縣唐初因之天寶初改臨封郡乾元初復爲封州宋紹興中州廢以縣屬德慶府尋復置元改置封州路後復爲州 本朝省州爲縣屬肇慶府 烈宗襄皇帝隱謙長子

本傳通鑑曰謙卒隱居喪於賀江土民百餘人謀亂隱一夕盡誅之嶺南節度使劉崇龜召補右都押牙未幾表爲封州刺史唐昭宗乾寧三年丙辰劉崇龜歿嗣薛王知柔代爲帥行至湖南廣州將盧瑑作亂知柔不敢進隱以封州兵攻殺瑑迎知柔知柔表隱行軍司馬庚申九月徐彥若代知柔表隱節度副使辛酉冬彥若卒軍中推隱爲留後

隱以昭宗天復辛酉十二月爲清海節度留後甲子十二月命爲節度使梁開平己巳封南平王辛未進封南海王是歲三月卒凡在州

十年龔僭號追尊

高祖皇帝龔初名巖謙庶子也其母段氏生龔於外舍謙妻韋氏殺段氏而養龔爲己子隱卒龔襲位梁末帝時封南海王貞明丁丑八月龔稱帝國號大越追尊安仁謙隱帝號立三廟明年改國號漢更名龔又爲龔字音儼以名焉晉天福壬寅四月卒僞位二十五年

瑒帝名玠龔子母曰趙氏龔位一年爲第晟所弒自壬寅四月至癸卯二月

中宗皇帝名晟玠弟也弒玠而自立凡十五年自癸卯二月至戊午八月

後主張晟長子晟卒張襲位宋開寶四年辛未二月潘美克廣州張降送至汴賜爵恩赦侯進封衛國公太平興國庚辰二月卒

右南漢五主凡三世共六十七年僭號五十五年

庾言曰一統志云廣州本秦南海郡後爲趙佗所據漢討平之復

爲南海郡屬交州刺史東漢末遷交州治番禺二國吳又遷交州治龍編而於此置廣州隋改南海郡唐復置廣州總管府乾元初復爲廣州唐末置清海軍節度使宋爲廣州清海軍大觀中陞爲帥府元置廣州路本朝改爲廣州府隸廣東道

蜀王氏章

大祖皇帝王建許州舞陽人

歐史本傳王建許州舞陽人少無賴以屠盜販私益爲事里人謂之賊王八後爲忠武軍卒遷隊將都頭觀軍容使田令孜以爲養子使將兵宿衛丙午春僖宗出奔興元令孜求爲西川監軍出建爲壁州刺史丁未三月建遂襲據閬一州昭宗大順庚戌十月取蜀州辛亥七月克成都殺陳敬瑄并殺田令孜自稱西川留後

建以僖宗光啓丁未據閬州昭宗大順辛亥七月克成都自稱西川

留後十月爲西川節度使癸亥八月封蜀王丁卯九月稱帝是歲四月朱全

忠篡唐稱梁帝戊寅六月卒凡二十八年

後主衍建之子襲位七年後唐同光乙酉十一月唐師滅蜀衍降唐

主以孟知祥爲西川節度使丙戌三月唐殺衍滅其族

右前蜀二主父子共三十五年

一統志曰璧州本漢巴郡宕渠縣地後魏置諾水縣屬萬州隋爲

巴州始寧縣地唐析置通江縣又於縣置璧州宋省璧州以縣屬

巴州元省入曾口縣後復置本朝改屬保寧府閬州禹貢梁州之

域春秋爲巴國地秦惠王滅巴置巴郡漢巴郡治江州縣東漢末

劉璋改爲巴西郡晉巴西郡徙治閬中縣梁爲北巴郡兼置南梁

州西魏改南梁曰隆州又改北巴郡曰盤龍郡隋初郡廢州存大

業初復改州爲巴西郡唐初復爲隆州先天中改閬州天寶初改

閬中郡乾元初復爲閬州五代時唐置保寧軍宋初改安德軍元

至元間陞保寧府本朝因之

吳越錢氏章

太祖武肅王錢鏐杭州臨安人

歐史本傳錢鏐字具美杭州臨安人也臨安里中有大木鏐與羣

兒戲木下鏐坐大石指麾羣兒爲隊伍號令頗有法羣兒皆憚之

及壯無賴不喜事生業以販塩爲盜縣錄事鍾起有子數人與

鏐飲博起嘗禁其諸子諸子多竊從之遊豫章人有善術者望斗

牛間有王氣斗牛錢塘分也因遊錢塘占之在臨安乃之臨安以

相法隱市中陰求其人起與術者善術者私謂起曰占君縣有貴人求之市中不可得視君之相貴矣然不足當之起乃爲置酒悉召縣中賢豪爲會陰令術者徧視之皆不足當術者過起家鏐適從外來見起反走術者望見之大驚曰此真貴人也起笑曰此吾旁舍錢生爾術者召鏐至熟視之顧起曰君之貴者因此人也乃慰鏐曰子骨法非常願自愛因與起訣曰吾求其人者非有所欲也直欲質吾術爾明日乃去起始縱其子等與鏐遊時貸其窮乏鏐善射與槊稍通圖諱諸書唐僖宗乾符二年浙西裨將王郢作亂石鏡鎮將董昌募鄉兵討賊表鏐偏將擊郢破之都統高駢召昌與鏐至廣陵欲與之俱擊黃巢久之駢無討賊意鏐說昌辭還昌遂引兵據杭州以鏐爲都指揮使光啓二年丙午鏐克越州劉漢宏走歿董昌徙鎮越州以鏐知杭州事明年朝廷以鏐爲杭州刺史昭宗時拜鎮海節度使封隴西王乾寧二年乙卯董昌僭號鏐討之丙辰五月克越州董昌伏誅鏐遂移鎮海軍於杭州拜檢校太師

鏐以僖宗光啓丙午十一月取越州遂知杭州丁未正月朝廷因以爲刺史癸丑九月爲鎮海節度使封隴西王丙辰五月誅董昌天復壬戌進爵越王天祐甲子更封吳王丁卯四月朱全忠篡唐稱梁封鏐吳越王後唐長興壬辰三月卒凡二十五年

世宗文穆王元瓘鏐次子襲位凡十年

自壬辰三月至辛丑九月

成宗忠獻王弘佐元瓘子襲位凡六年

自辛丑九月至丁未六月

廢王弘侬弘佐弟弘佐卒弘侬襲位戊申正月爲大將胡進思所廢

後王弘倣弘侗第王侗廢弘倣襲位歷漢周加諸道兵馬元帥宋太平興國三年戊寅五月倣以其地歸宋封淮海國王累進封鄧王戊子八月卒

右吳越五主凡三世共八十三年

五代史論曰嗚呼天人之際爲難言也非徒自古術者好奇而幸中至於英豪草竊亦多自託於妖祥豈其欺惑愚衆有以用之歟蓋其興也非有功德積漸之勤而黥髡盜販崛起於王侯而人亦樂爲之傳歟考錢氏之終始非有德澤施其一方而百年之際虐用其人甚矣其動於氣象者豈非其孽歟是時四海分裂不勝其暴又豈皆然歟是皆無所得而推歟術者之言不中者多而中者少而人特喜道其中者歟

通鑑考異曰余公綽閩王事迹云同光元年梁策錢鏐爲尚父來年改寶政元年永隆三年吳越世宗文穆王薨林仁志王氏啓運圖云同光元年梁封浙東尚父爲吳越國王尋自改元寶正長興三年吳越武肅王崩子世皇嗣永隆二年吳越世皇崩子成宗嗣公綽仁志所記年歲差繆然可見錢氏改元及廟號故兼載焉至今兩浙民間猶謂錢鏐爲錢太祖今參取諸書

卮言曰一統志云越州春秋時越國後爲楚所并秦滅楚置會稽郡治於吳此地屬焉東漢始以吳置吳郡而徙會稽郡治山陰晉爲會稽國劉宋爲東揚州隋初改爲吳州治會稽縣大業初改越州尋爲會稽郡唐復爲越州乾元初置浙東觀察使治於越廣明初陞義勝軍乾寧中改鎮東軍錢氏以越爲東都宋仍爲越州紹

興初始陞紹興府元改紹興路本朝復爲紹興府

杭州本會稽地三國吳分置東安郡治富春尋罷晉屬吳興及吳郡陳置錢塘郡隋廢郡置杭州治餘杭未幾移治錢塘大業改爲餘杭郡唐復爲杭州景福初號武勝軍光化初移鎮海節度治於杭置大都督府錢氏據之爲都入宋爲杭州高宗南渡遷都於此陞爲臨安府元改杭州路本朝改爲杭州府隸浙江道

楚馬氏章

武穆王馬殷字霸圖河南許州鄆陵人

歐史本傳馬殷初爲孫儒裨將儒以兵圍楊行密於宣州不克遣殷與劉建鋒掠食旁縣儒戰敗死殷等無所歸乃推建峯爲帥殷爲先鋒轉攻豫章略虔吉州入湖南據潭州建峯自稱留後僖宗

授建峯湖南節度使以殷爲馬步軍都指揮使邵州刺史乾寧三年建峯爲軍卒陳贍所殺諸將迎殷於邵州立以爲主唐拜殷潭州刺史四年拜武安軍節度使朱溫篡唐稱梁封殷楚王後唐明宗天成二年丁亥封殷楚國王殷以潭州爲長沙府建國承制謚其曾祖筠曰文肅祖正曰莊穆父元豐曰景莊立三廟於長沙殷以昭宗乾寧丙辰二月入潭州爲武安軍節度使梁丁卯四月封楚王後唐明宗天成丁亥加封楚國王長興庚寅十一月卒在州三十三年稱王二十四年

衡陽王希聲殷次子襲位二年壬辰八月卒追封

文昭王希範殷第四子與希聲同母表夫人希聲以母寵得立故希

聲卒而希範以次襲位十五年

自壬辰八月至丁未五月

前廢王希廣希範同母弟襲位三年為兄希萼所殺自丁未五月至庚戌十二月

後廢王希萼希廣兄殺弟而自立六月為徐威等所廢自庚戌至辛亥

通鑑曰楚將徐威等執希萼囚之立其弟希崇為武安留後希崇

使彭師曷送希萼於衡山師曷與眾共立希萼為衡山王徐威等

又欲殺希崇希崇大懼奉表請兵於唐唐主遣邊鎬將兵入楚

後主希崇希廣弟希廣廢希崇自立十月南唐遣邊鎬將兵擊楚希

崇降唐以邊鎬為武安節度使遷馬氏之族於金陵唐主以希萼鎮

洪州希崇鎮舒州

右楚六主凡二世在州共五十五年稱王四十五年

卮言曰一統志云潭州秦為長沙郡治臨湘縣漢改為長沙國東

漢復為長沙郡晉於此置湘州宋復為長沙國南齊復為郡隋

初廢郡置潭州後復為長沙郡唐改置潭州天寶初復為長沙郡

又復為州中和初置欽化軍節度又改武安軍五代唐為長沙府

宋置防禦使復置武安軍元改為潭州路本朝初改為潭州府後

改為長沙府隸湖廣道

南平高氏章

武信王高季興陝州硤石人

歐史曰季興本名季昌少為汴州富人李讓家僮梁太祖朱全忠初

鎮宣武讓以入貲得幸養為子易其姓名曰朱友讓季昌以友讓

故得進見太祖奇其材命友讓以子畜之因冒姓朱氏補制勝軍

使遷毅勇指揮使梁兵攻鳳翔李茂貞堅壁不出季昌以計誘岐

兵出破之拜宋州刺史從破青州徙潁州防禦使復姓高氏及梁

兵破襄州乃以季昌爲荆南節度觀察留後開平丁卯拜季興節度使末帝時封渤海王梁亡唐莊宗入洛季昌避其祖諱更名季興同光甲申三月封季興南平王明宗立遣將攻之季興遂臣於吳吳封季興秦王

季興以梁開平丁卯四月爲荆南節度使癸酉三月封渤海王後唐同光甲申三月封南平王天成戊子十二月卒凡據荆南二十二年稱王十六年

文獻王從誨季興長子襲位二十年

自巳丑正月至戊申十月

貞懿王保融從誨第三子襲位十三年

自戊申十月至庚申七月

保勗從誨第十子襲位凡三年

自庚申七月至壬戌十一月

後主繼冲保融子保勗病以繼冲判內外兵馬保勗卒繼冲襲位二

年宋建隆四年癸亥二月宋師假道荆南討張文表繼冲以荆南降宋以王仁贍爲荆南都巡檢使而授繼冲荆南節度使如故高氏親屬拜官有差

右南平五主凡四世共五十七年

卮言曰一統志云荆南春秋楚之郢都秦置南郡三國漢關羽旣沒南郡屬吳荆州之名南北雙立魏立荆州治宛今南陽是吳立荆州治江陵今都城是是謂南荆

後蜀孟氏章

高祖皇帝孟知祥邢州龍岡人

歐史本傳孟知祥邢州龍岡人其叔父遷當唐之末據邢洛磁三州爲晉所虜晉王以遷守澤潞梁兵攻晉遷以澤潞降梁知祥父

道獨留事晉而不顯及知祥壯晉王以其弟克讓女妻之以爲左
教練使莊宗爲晉王以知祥爲中門使前使多以罪誅知祥懼求
他職莊宗命薦可代已者知祥因薦郭崇韜自代崇韜德之知祥
遷都虞侯莊宗稱帝以知祥爲北京留守及崇韜伐蜀臨訣請以
知祥守西川已而破蜀遂以知祥爲西川節度使

知祥以後唐同光乙酉十一月爲西川節度使庚寅六月舉兵反癸
巳二月唐封爲蜀王甲午正月稱帝七月卒凡據蜀十年

稱王一年
稱帝一年

後主昶知祥之子襲位三十一年宋乾德三年乙丑正月宋王全斌
伐蜀次魏城昶降宋以呂餘慶知成都府六月昶舉族至汴賜爵秦
國公子玄詰爲大寧軍節度使親屬授官有差昶尋卒

右蜀二主父子共三十二年

學海君道部卷之十八

終

學海君道部卷之十九

茅綯編

世系類

九十

偽命世數

三

唐末十國篇

二

夏拓跋氏章

夏公李思恭本姓拓跋氏

新唐書党項傳曰党項漢西羌別種魏晉後微甚周滅宕昌鄧至而党項始疆以姓別爲部一姓又分爲小部落而拓跋氏最疆貞觀初有拓跋赤壁者率其宗族歸唐太宗擢爲茂州都督賜姓李後吐蕃寢盛拓跋畏偪請內徙始于慶州置靜邊等州處之其後折居慶州者號東山部夏州者號平夏部天寶末平夏部有戰功

擢容州刺史天柱軍使其裔孫拓跋思恭咸通末竊據宥州稱刺
史黃巢入長安與鄜州李孝昌同盟討賊僖宗賢之以爲權知夏
綏銀節度使次王橋爲巢所敗更與鄭畋四節度盟屯渭橋中和
二年授檢校司空同平章事俄進四面都統賊平兼太子傅大封
夏國公賜姓李嗣襄王温之亂詔思恭討賊兵不出

通鑑拓跋思恭本党項羗也爲宥州刺史僖宗廣明庚子十二月
黃巢陷長安帝奔興元中和元年辛丑正月帝入成都三月思恭
糾合夷夏兵會鄜延節度使李孝昌於鄜州同盟討賊四月詔以
思恭權知夏綏節度使思恭屯武功與諸道兵破巢於長安巢師
衆東走而諸軍爭掠不相繼巢引兵襲敗之巢復入長安諸軍皆
退思恭又與李孝昌與賊戰於王橋不利七月思恭屯東渭橋黃

巢遣其將朱温拒之八月以思恭爲節度使思恭及李孝昌與尚
讓朱温戰于東渭橋不利引去十二月賜夏州號定難軍二年壬
寅正月以王鐸爲諸道行營都都統以王處存李孝昌拓跋思恭
爲京城東北西面都統思恭屯渭橋四月王鐸以諸道兵逼長安
賊將朱温以華州降賊勢尚強都監楊復光薦李克用而召之十
一月克用將沙陀兵至河中敗賊將黃揆于沙苑癸卯春進軍渭
橋與諸道擊賊于渭南破之黃巢遁走收復長安

考異曰歐史作拓跋思敬意謂薛史避國諱耳按傳唐書實錄皆
作思恭實錄天復二年九月武定軍節度使李思敬以城降王建
思敬本姓拓跋鄜夏節度使思恭保大節度使思孝之弟也思孝
致仕以思敬爲保大留後遂升節度又徙武平軍新唐書党項傳

曰思恭爲定難節度使卒弟思諫代爲節度思孝爲保大節度以老荐弟思敬爲保大留後然則思恭思敬乃是兩人思敬後附李茂貞或賜國姓李歐合以爲一人誤也

卮言曰按舊唐傳云僖宗以拓跋思恭討賊以爲權知夏綏銀節度使不言真授使節也又云中和二年授檢校司空同平章事俄進西面都統賊平兼太子太傅封夏國公賜姓李亦不詳其何時也歐史云以拓跋思敬爲夏州偏將以與破黃巢功賜姓李氏拜夏州節度使宋史傳云唐末拓跋思恭鎮夏州統銀夏綏宥靜五州地討黃巢有功復賜姓李亦不言其封夏公也通鑑中和元年二月宥州刺史拓跋思恭討賊以爲權知夏綏節度使八月以爲節度使中和二年正月以爲都統又不載封爵賜姓之事是時同

盟諸道與破賊者皆建國領鎮而拓跋以外夷入援必有討賊之典以酬其功通鑑未詳年月故闕而不載或以外國畧之然其後李思諫李思孝等皆紀其事而易其姓獨思恭失其始終蓋闕文也

李思諫思恭子思恭卒思諫代

通鑑唐昭宗乾寧二年乙卯二月邠寧王行瑜鳳翔李茂貞同華韓建舉兵犯闕李克用舉河東兵討三鎮七月王行瑜李繼鵬作亂帝如石門鎮克用進軍渭橋遣李存信等會保大節度使李思孝攻王行瑜梨園寨擒其將王令陶等獻於行在思孝本姓拓跋思恭之弟也李茂貞懼斬繼鵬傳首行在上表請在且求和於克用帝復遣使諭克用且令赦茂貞併力討行瑜癸卯以克用爲四

面都招討使保大節度使李思孝爲北面招討使前定難節度使李思諫爲東面招討使克用表請帝還京許之辛亥車駕還京師十一月克用克邠州行瑜伏誅克用進爵晉王三年丙辰保大節度使李思孝表請致仕薦弟思敬自代詔以思孝爲太師致仕思敬爲保大留後八月以爲節度使鄜坊號保大軍其後思敬徙鎮洋州降於王建九月以前定難節度使李思諫爲靜難節度使兼副都統四年丁巳正月以思諫爲寧塞節度使延州軍號寧塞光化三年庚申四月加定難軍節度使李承慶同平章事丁卯朱全忠篡唐稱帝改元開平戊辰十一月定難節度使李思諫卒

歐史曰夏州節度使李思敬卒乾寧二年以其弟思諫爲節度使自唐末天下大亂史官實錄多闕諸鎮四時崛起自非有大善惡暴著於世者不能紀其始終是時興元鳳翔邠寧鄜坊河中同華諸鎮之兵四面並起而交爭獨靈夏未嘗爲唐患而亦無大功朱玟之亂思敬與鄜州李思孝皆以兵屯渭橋其後黃巢陷京師王重榮等李克用等會諸鎮兵討賊思敬與破巢復京師然皆未嘗有所可稱故思敬之世次功過不顯而無顯

卮言曰思恭思敬蓋二人也歐史以爲一人故其事不詳而云史錄多闕不能紀其始終然朱玟之亂在黃巢後十餘年此不必考史錄而易見者乃以黃巢爲朱玟之後何也新唐書云朱玟之亂詔思恭討賊思恭不出兵然則歐史所謂兵屯渭橋者卽討黃巢之事思孝無與也通鑑云王行瑜等三鎮之亂以李思孝李思諫爲招討使然則歐史所謂會諸鎮兵討賊者乃討三鎮之事思恭

無與也是時思孝之弟思敬又代思孝為保大節度使疑於思恭
歐史誤并之而失其次亦其踈畧者通鑑之書最詳密矣然前云
以前定難節度使李思諫為招討使不知何時領夏州也後云以
前定難節度使李思諫為靜難節度使不知何時罷夏州也丁巳
正月又云以副都統李思諫為寧塞節度使延州號寧塞軍思諫既徙邠
州又移延州則夏州之節屬之李承慶矣其事亦不載而光化三
年庚申四月又云加定難軍節度使李承慶同平章事是代思諫
者承慶也不知於思諫何屬檢諸史無承慶名其後又書定難節
度使李思諫卒則承慶亦不知所終而思諫又不知何時還夏州
也大抵歐史以議論叙事多至於失序通考以時事編年每畧於
闕文也

李彝昌思諫子思諫卒彝昌自為留後

歐史曰李思諫卒軍中立其子彝昌為留後梁卽拜彝昌節度使
朔方王李仁福彝昌族父也

綱目庚午

梁開平四

夏四月梁夏州亂殺節度使李彝昌以族父仁福

代之

七月岐晉合兵攻梁夏州梁遣兵拒却之

通鑑三月夏州都指揮使高宗益作亂殺節度使李彝昌將吏共
誅宗益推彝昌族父蕃漢都指揮使李仁福為帥癸丑仁福以聞
于梁四月甲子梁以仁福為定難節度使七月岐王李茂貞與邠
州李繼暉涇州劉知俊各遣使告晉請合兵攻定難節度使李仁
福晉王遣周德威將兵會之合五萬眾圍夏州仁福嬰城固守拒

守八月壬戌仁福告急于梁梁主憂晉兵出澤州逼懷州既而聞其在綏銀積中曰無足慮也甲申遣李遇等自鄜延趨銀夏邀其歸路九月李遇等至夏州岐晉兵皆解去

癸巳

後唐明宗李嗣源長興四

春二月唐定難節度使李仁福卒

歐史曰仁福終梁之世奉正朔而已累官至檢校太師兼中書令封朔方王

李彝超仁福子仁福卒彝超嗣三月唐以李彝超為彰武留後安從進為定難留後彝超拒命

通鑑二月戊午仁福卒庚申軍中立彝超為留後先是河西諸鎮

河西在涼州沙州當作關西歐史只作邊將多言作福

皆言李仁福潛通契丹朝廷恐其與

契丹連兵併吞河右南侵關中會仁福卒三月癸未以彝超為彰

武留後徙彰武安從進為定難留後仍命靜塞節度使藥彥稠將兵五萬以宮苑使安重益為監軍送從進赴鎮丁亥敕諭夏銀綏宥將士吏民以夏州窮邊李彝超年少未能扞禦故徙之延安從命則有李從暉高允韜富貴之福違命則有王都李匡賓覆族之禍四月彝超上言為軍士百姓擁留未得赴鎮詔遣使趣之彝超不奉詔遣其兄呵囉王守青嶺門集境內党項諸胡以自救藥彥稠等進屯蘆關彝超遣党項抄糧運及攻具官軍自蘆關退保金明五月壬辰夜夏州城上舉火比明雜虜數千騎救之安從進遣先鋒使米溫擊走之

七月唐安從進討李彝超不克引還

七月庚辰安從進進攻夏州州城赫連勃勃所築堅如鐵石斲鑿

不能入又党項萬餘騎徜徉四野抄掠糧餉官軍無所芻牧山路險狹關中民輸斗粟束藁費錢數緡民間困竭不能供彞超兄弟登城謂從進曰夏州貧瘠非有珍寶畜積可以充朝廷貢賦也但以祖父世守此土不欲失之葺爾孤城勝之不武何足煩國家勞費如此幸為表聞若許其自新或使之征伐願為衆先唐主聞之命從進引兵還其後有知李仁福陰事者云仁福畏朝廷除移揚言結契丹為援契丹實不與之通也致朝廷誤興是役無功而還自是夏州輕朝廷每有叛臣必陰與之連以邀賂遺唐主疾久未平征夏州無功軍士頗有流言乃賜在京軍士諸軍優給有差既賞賚無名士卒由是益驕

十月唐以李彞超為定難節度使

權知夏州事李彞超上表謝罪求昭雪十月壬戌唐以彞超為定難節軍節度使

綱目乙未唐末帝從春二月唐夏州節度使李彞超卒

夏王李彞興本名彞殷彞超兄也彞超卒彞殷代之

通鑑唐清泰乙未二月丁丑夏州節度使李彞超上言疾病以兄行軍司馬彞殷權知軍州事彞超尋卒三月辛丑唐以彞殷為定難節度使丙申冬唐河東節度使石敬瑭拒命遣使求援於契丹契丹德光將兵救之十一月契丹立敬瑭為晉皇帝大破唐兵唐主從珂自焚死敬瑭入洛陽改元天福加彞殷同平章事壬寅六月晉主敬瑭殂兄子重貴立癸卯八月乙卯夏州牙內指揮使拓跋崇斌謀作亂綏州刺史李彞敏將助之事覺辛未彞敏棄州與

其弟彝俊等五人奔延州綏南至延三百四十九里九月甲午定難節

度使李彝殷遣使至洛奏彝敏作亂之狀詔執彝敏送夏州斬之

綱目甲辰晉開運元春二月晉定難節度使李彝殷侵契丹以救晉

通鑑契丹入寇陷晉貝州二月渡河晉王自將及李守貞等分道

擊之契丹敗走辛亥定難節度使李彝殷奏將兵四萬自麟州濟

河侵契丹之境麟州西北至夏州一百二十里自麟州東北至府州又自府州東北入契丹境壬子以彝

殷為契丹西南面招討使三月契丹寇晉澶州不克引還丙午四

月晉靈州党項作亂六月晉復以馮暉為朔方節度使八月暉擊

破党項入靈州厄言曰靈州與夏州接壤而亂靈州者為拓跋彥超彥超亦彝殷族也故附見於此丁未

正月契丹主德光入大梁廢晉主重貴為負義侯徙之黃龍府二

月晉河東節度使劉知遠稱帝於晉陽四月德光北歸卒六月晉

主知遠入大梁諸鎮多降始改國號曰漢加李彝殷兼侍中戊申

二月漢主知遠更名高尋殂于承祐立三月定難節度使李彝殷

發兵屯境上奏稱去三載前羌族咬毋殺綏州刺史李仁裕叛去

請討之慶州上言請益兵為備詔以司天言今歲不利先舉兵諭

止之四月漢李守貞反於河中密求援於彝殷彝殷發兵屯延州

境上聞漢軍圍河中乃退時彰武延州節度使高允權與彝殷有隙

乃以狀聞彝殷亦自訴漢詔和斛之

綱目己酉漢隱帝乾祐元春二月漢以靜州隸定難軍

通鑑正月漢詔以靜州隸定難軍唐置靜邊州都督於銀州界以處党項降者今漢以隸定難軍

二月辛未李彝殷上表謝彝殷以中原多故有輕傲之志每藩鎮

有叛者常陰助之邀其重賂朝廷知其事亦以恩澤羈縻之史言拓跋

係命廿號
據銀夏漸以驚漢世祖劉崇稱乾祐四庚戌冬漢王承祐遣使殺郭威於澶州不克威遂

舉兵反漢王承祐為亂兵所殺威入大梁以漢太后誥迎湘陰公

贊於徐州威自為監國是春正月威稱帝國號周遣人弒贊於宋

州贊父崇稱帝於晉陽是為北漢周主加定難節度使李彝殷為

中書令

綱目辛亥周太祖郭威廣順元北夏四月周夏州附於北漢

通鑑定難節度使李彝殷遣使奉表於北漢

綱目乙亥周世宗柴榮顯德二春二月周遣使如夏州

通鑑甲寅正月周主威殂養子晉王柴榮立加李彝殷太保封西

平王乙卯二月李彝殷以府州折德扆亦為節度使與已並列耻

之塞路不通周使癸未周主謀於宰相對曰夏州邊鎮朝廷向來

每加優借府州褊小得失不繫重輕且宜撫諭彝殷庶全大體周

主曰德扆數年以來盡忠戮力以拒劉氏柰何一旦棄之且夏州

惟產羊馬貿易百貨悉仰中國我若絕之彼何能為乃遣供奉官

齊藏珍齎詔書責之彝殷惶恐謝罪己未 月周主榮殂子梁王

宗訓立加彝殷太傅

天台胡氏曰夏州自唐以來為緣邊大鎮李氏又世襲節度使

府州漢氏方置節鎮折氏父子又晚出故耻與並列

綱目丁卯宋太祖乾德五秋九月定難節度使李彝興避宋宣祖諱故改名卒

宋史夏國傳曰宋初加李彝興太尉北漢主劉鈞結代北諸部來

寇麟州彝興遣部將李彝玉會諸鎮兵禦之北漢兵遂引去建隆

初獻馬三百匹太祖大喜親視攻玉為帶且召使問曰汝帥腹圍

幾何使言彞興腰腹甚大太祖曰汝帥真福人也遂遣使以帶賜之及卒太祖廢朝三日贈太師追封夏王

卮言曰李彞興自乙未之歲嗣鎮至今凡三十三年矣其間經五朝六姓九主而北漢契丹不與焉中原之君若更傳舍紀綱久頽威令不行藩鎮紛爭邊境騷騷而彞興保有夏州事大交隣不被兵禍其所休養繕葺多矣卒之列爵累朝名爲極品生王西平沒進封夏則夏之業蓋思恭基之而彞興成之也

李克虜彞興子彞興卒克虜嗣

宋史傳曰李彞興卒子克虜自權知州事詔授檢校太保定難軍節度使開寶九年克虜卒兵破北漢吳堡砦斬首七百級獲牛羊千計俘砦主侯遇以獻累加檢校太尉

綱目太宗太平興國三年

戊寅

夏四月定難節度使李克虜卒

宋史傳曰李克虜卒太宗廢朝二日贈侍中

李繼筠克虜子也

宋史傳曰李繼筠克虜子也初爲衙內都指揮使檢校工部尚書克虜卒自權知州事詔授檢校司徒定難軍節度觀察留後太宗征北漢繼筠遣銀州刺史李光遠綏州刺史李光憲率藩漢兵列陣渡河畧太原境以張軍勢

綱目太平興國四年

己卯

秋七月定難留後李繼筠卒

卮言曰宋自開寶癸酉太祖罷王彥超等節度使自是藩臣鮮有授節使者雖邊帥世襲不能遽罷於其卒也惟授其子以留後而已至太宗朝強藩僭國皆已削平而夏州之世據如故固

以兵力之不及亦其勢寢強不得不懷柔之也

李繼捧繼筠弟繼筠卒繼捧嗣

綱目太平興國五年庚辰夏五月定難留後李繼捧入朝獻銀夏綏宥四州六月繼捧弟繼遷叛走地斤澤

通鑑初夏州自李思恭以來未嘗親朝中國五月繼捧率其族入朝帝嘉之賜賚甚厚繼捧陳其諸父昆弟多相對怨乞納其境內夏綏銀宥四州留京居之帝爲遣使如夏州護總麻以上親赴關以曹光實爲四州都巡檢使時繼捧族弟定難軍都知蕃落使繼遷留居銀州六月乙亥聞使至乃詐言乳母死出葬于郊六月乙亥遂與其黨數十人奔地斤澤出其祖像以示戎人戎人拜泣從者日衆澤距夏州東北數百里十一月己酉以李繼捧爲彰德

宋史曰李繼遷繼捧族弟也高祖思忠嘗從兄思恭討黃巢拒賊於渭橋戰沒僖宗贈宥州刺史祠于渭陽曾祖仁顏仕唐銀州防禦使祖彝景嗣于晉父光儼嗣于周建隆四年癸亥繼遷生于銀州開寶甲戌授定難軍管內都知蕃落使繼捧之歸宋繼遷留居銀州及使至召總麻親赴關乃詐言乳母死出葬于郊遂與其黨數十人奔入地斤澤澤距夏州東北三百里轉遷無常漸以強大而西人以李氏世著恩德往往多歸之雍熙乙酉二月繼遷率衆襲銀州據之丙戌遼主冊繼遷爲夏國王淳化辛卯歸降授銀州觀察賜名保吉屢寇邊爲患官軍擊之不利真宗至道丁酉復表歸順授夏州刺史定難節度使封繼遷母衛慕氏衛國太夫人未幾復抄邊咸平癸卯冬陷西涼中流矢奔還卒於靈州元昊僭號

追尊

太宗光聖皇帝名德明繼捧子毋野利氏

偽諡順成懿孝皇后

繼捧卒德明自

立為定難節度使景德丙午奉表歸順且言父有遺命真宗嘉之授特進檢校太師兼侍中上柱國充定難軍節度使充西平王仍賜姓趙氏大中祥符戊申加兼中書令時遼亦遣使冊德明為大夏國王天禧丁巳加守太傅癸亥仁宗即位加尚書令明道壬申十月封德明為夏王未幾卒贈太師元昊僭號追尊

景宗武烈皇帝名元昊

宋史曰曩霄本名元昊小字鬼理國語謂惜為鬼富貴為理毋衛

慕氏

偽諡惠慈敦愛皇后

德明卒元昊襲位宋授特進檢校太師兼侍中定

難節度使西平王景祐甲戌冬毋族人山喜謀殺元昊事覺元昊

節度使帝嘗問繼捧曰汝在夏州用何道以制諸郡對曰羌人

悍但羈縻而已非能制也

綱目端拱五元年戊子夏五月以李繼捧為定難節度使賜姓名趙

保忠

通鑑李繼隆侵擾日甚趙普復請命繼捧鎮夏州五月辛未以

繼捧為定難節度使賜姓名趙保忠帝召見加賜而遣之

綱目淳化元年

庚寅

冬十二月契丹封李繼遷為夏王二年

辛卯秋七

月李繼遷請降以為銀州觀察使賜姓名趙保吉冬十月趙保忠

叛降契丹契丹封為西平王五年

甲午

春三月李繼隆入夏州執趙

保忠送京師夏四月削趙保吉姓名墮夏州城五月賜趙保忠爵

宥罪侯